

Duc Authentique

Inkuru ndende
IBIHE

Duke Stories

IBIHE

Duc Authentique

Copyright 2022 — Duc Authentique

Uburenganzira bwose burabitswe. Ntivyemerewe kugira kopi, gusohora canke gushira ku mbuga ngurukanabumenyi mu mvo zo kugurisha kino gitabo utabiherewe uburenganzira n’umwanditsi Duc Authentique ubwiwe canke uburongozi bwa Duke Stories.

Abagiteguye:

Umwanditsi: Duc Authentique

Umuhiyanyuzi: Duc Authentique

Igifuniko: Duc Authentique

Contacts: Duke Stories (Facebook Page)

+257 71349267 (WhatsApp)

Duc Authentique (Facebook, Instagram, Twitter ...)

duccendrars@gmail.com

Casohowe na Duke Stories

Bujumbura, Burundi

Hamwe na Duc Authentique nyene:

IMBERE YO KUGENDA

RUGIRA IMBARAGA

UBWENGE

UMUSODA

UGUHEMUKA

KURE Y'UMUTIMA

INKURU YA MIKE

INYUMA Y'UBUZIMA

IKIGUZI NARISHE

NIZINDI...

Agace k'ibanze

Isi ni umwigisha yigisha ata bitabo agasobanura atavuze kuko igikoresho ciwe ari kimwe rudende, ico naco si ikindi ni kimwe twese tuzi, kimwe twese tuvuyukira kurondera tukarinda tuva kwisi tutaravuga ko twakironse.

Gihuza bamwe kigatandukanya abandi ukwo ibihe bikurakuranwa maze kigahinduka rimwe na rimwe kigahinduka mu buryo tutaziga ndetse tutanarota ku buryo uwari hasi ashobora kwisanga hejuru canke uwari hejuru akisanga hasi.

Ico naco si ikindi ni UBUZIMA.

Kwishure tubanza kwigishwa hanyuma tukabazwa ariko kwisi tubanza kubazwa hanyuma tukiga ariyo mpamvu kwisi igihambaye si ukuyoberwa mu kibazo ariko n'ukudakura icirwa mu kibazo.

Ubuzima bugirwa na vyinshi ari n'aho bavuga "Uwuramvye arabona" kuko muri bwo hagati y'umusi umuntu atangura kubaho gushika kumusi ahagarikira kubaho hari Umwanya.

Wa mwanya bandika ku musaraba wa yanzu ya metero kwadarato bakugenera kuruhukiramwo ubuziraherezo inyuma y'urugendo rurerure canke rugufi wagendanye na wa mwigisha (isi).

Wa musu abakumenye nabo wamenye bese basidukanira iyonka bambaye umwambaro wirabura, abo wakeneye ntubabone ndetse rimwe na rimwe nabagukeneye ntibakubone baba bahari.

Bamwe bababajwe nuko ubasize abandi baje kuraba ko vyukuri warangije urugendo rwawe nubwo bose isura yijimye ibagaragarako bamwe n'amaso agasuka amarira ndetse abandi nijwi rigahogora.

Uwo mwanya nawo ugizwe n'Ibihe, vya bihe bishobora gutuma urira amarira y'agahinda canke bigatuma urira amarira y'umunezero.

Vya bihe bishobora kuguhuza nabaciriritse kuko uba uri umwe muri bo canke bikaguhuza n'abakomeye kuko uba uri umwe muri bo.

Vya bihe banavuga ko isi izunguruka bishobora gutuma wima uwaguhaye canke ugasaba uwo wimye kuko buca bugacana ayandi.

Vya bihe biduhindura tukisanga twarabaye abandi bantu ku buryo uwuturondera abura aho yatubonye ariko ataho twagiye vyukuri tukihari gusa ari amarori baturabiramwo atakitubona bivanye nibihe tugezemwo.

Abo bose bazoza kuri wa musu wa nyuma nabazoba bakumenyeye mu bihe bitandukanye vya wa mwanya wandikwa kuri wa musaraba wa ya nzu ya metero kwadarato tugenerwa kuruhukiramwo ubuziraherezo.

Ni incuro nyinshi nagiye kuririra ku mva ya Data na Mama, bur'ukwo ibihe vyansoba nkabura icepfo ca ruguru niheba nkabura kubaho nkabura kwiyahura naragenda nkabaganyira nubwo ntabanzi ko banyumva ariko nimiburiburi naba navuze.

Maze murukwo kuvuga inyishu naronka yari Ibihe bigize umwanya wandikwa kur'uyo musaraba inyuma y'urugendo rwo kuduga no kumanuka mu ci no mu mvura mummyonga

mumashamba mu misozi mummyonga munzuzi mubiyaga no mu bugaragwa.

Sinzi ibihe uriko uracamwo ariko nkundira wifadikanye nanje ndakugire ku muriri ndagucire agace ku bihe vyaranze umwanya w'urugendo rwanje naho nubu nkikomeje hari naho nawe wokomezwa maze tugakomezanya kuko sinakomereye kugukomerera ariko nakomereye kugukomeza ncuti.

Nubwo ibi bihe nyene arivyo bidutandukanije ariko kandi ninavyo binaduhuje kuruyu mwanya nkundira untize umutima wawe nanje nzogutiza uwanje ejo untege amatwi yawe nkunda kuko ampa agaciro nanje nkuyabahisha kukuganirira ibiriko biraranga ibihe vyanje muri wa mwanya maze tubandanye ubu buzima kwino si kanatsinda turi bene umugabo umwe niko mpora numva bavuga.

Uwabaye mwiza aba muzima ifunguro ribishe niridasangiwe rero mfasha uhamagare mugenzi wawe nawe ahamagare mugenziwe dutembere gato ndakwijeje ko ntagamije kugusiga ukwo duhuye umeze nzanywe no guterera ku vyigwa nakuye mu bibazo wa mwigisha yagiye arambaza hari naho bizogufasha imbere.

Agace 1

Ico utarabona ucerekwa n'ukuramba kandi ikitarakubako ntuzocamirire kure kuko natahuye ko kwisi rurya abandi atawe rwibagiye kandi ko buri musu ushobora kuvyuka uruyu hama ukaryama wabaye uwundi.

Ndibuka igihe kimwe Charlene na Dorine abakobwa babagenzi banje twigana muri kaminuza bari baje muhira kugira dutegurire hamwe ikibazo bwaca kabiri dukora maze tuza turacishamwo durera inkuru.

Niho naza numva Dorine ambwira:"Kessy uribuka ingene tugitanguye Chacha yarahoze abanyeshure bese bamutinye"

Jewe ntwenga nti:"hhhh sha ndavyibuka ko twatangaye tugiye kumuvugisha tukumva aravuze"

Charlene yaciye yishura nkuwutwiyama ati:"Nimundeke rero ubu rero mugomba mumvuge numva"

Dorine ati:"Uziko nabahungu bagutinye bakavuga ngo uragara?"

Jewe ndasubiza nti : "Cobikoze umuntu ntuzomucire urubanza utaramwegera ntamuntu ndabona azi kuganiriza abantu nka Chacha neza na neza je mpora ndumirwa iyo tuganiye nkumva ukuntu yiyumvira"

Charlene ati:"Gusa ndababwize ukuri, nkije gutangura kaminuza sinarinzi ko nzoronka umugenzi numwe, kuko ubwambere je ndumuntu bingora gutangura umuntu ngo ndamuvugishe, ikindi naco nareraguza nkabona mwishure ryose nije mva ruguru je nyene nkabona abana bo mugisagara mufise nimico ntamenyereye"

Dorine yaciye atwenga ati:"Ahubwo ndibutse ingene wakatiye Guy nubu akimaramara"

Jewe nti:"Hahaha harya yaraje azi ko uc'uca bugufi wemere ibiganiro nawe basha ucuramukurira inkoni kugishitsi"

Charlene ati:"sha nyene sinashatse kumusuzugura ariko urya muhungu nivyo ni mwiza ariko ariyemera uziko yitoye akambaza ati 'wiyumva gute kubona wicaranye nanje?' neza nasanze nahindukiye ndamubaza nti 'saa?' "

Jewe nti:"Basi wibaza ko tutari twicaye inyuma yawe? Rega harya yari yatubwiye ko agira aze kutwemeza natwe tuca twicara hafi"

Charlene : "Nyene harukuntu abanyabujumbura muba mwifitiye icizere mukarenza kuburyo muba mwumva umuntu avuye ruguru yopfukama mugategeka"

Dorine yaciye avuga asa nuwubabaye ati:"Ah chr reka nawe kucufatira muri rusangi, twese siko tumeze"

Charlene ati:"Pardon nyene mwe murabantu banje ntimurimwo"

Jewe naciye mvuga nti:"Ubundi nuko dukunda kwibagira mbere novyita ko ari ubujuju gute umuntu ashobora kwitora akishimira ibintu yisanzemwo ataruhara abigizemwo? Kuba twaravukiye ibujumbura nawe ukavukira ruguru twavyisanzemwo uretse ko aribisanzwe ahubwo Dodo tuzoherekeze Chacha kuri bonane iwabo tuhabone ntakuntu twogira incuti tutazi aho iba"

Charlene yaciye ahaguruka yiyama ati:"Ntivyokundaa"

Jewe nti:"Aaaah kuberiki? Harikibazo?"

Charlene ati:"Iwacu s'ahantu ho kujana abana nkamwe mwakuriye mumagorofa mutaha mugasanga ama frigo aruzuye ndetse mukiga akayaga katanganyika kabatemberako, iwacu niyo catawe, mbere ndazi ko atabuzima bwahasa naho muzi"

Dorine ati:"Ivyo birakuraba kwanza mbere ntirwari uruhusha twariko turagusaba kwarukukumenyesha we rindira duheze ibibazo tuzoza kuruhukira iwanyu je ndagiye kandi ivyo twize biramaze harumuntu dufitanye gahunda"

Jewe nti:"Hhh kutavuga ko ari chr wawe rega imodoka yiwe ndayibona hariya iriko iraza"

Dorine:"Ja hiyo imodoka zose uzobona uzozita iza chr wanje"

Jewe nti:"hhhh ico wamenya na plaque narayifashe umusi wazimiye nzotanga itangazo"

Yaciye adusoma atwenga aca amanuka yihuta kuko twari mukabaraza kamwe ko munzu yo hejuru maze dusigarana na Charlene acasubira arambaza ati:"Ariko tubwizaniye ukuri muba mwiyumva gute muba mu buzima nkubu?"

Jewe nti:"hhhh nukuri je mba numva ntakidasanzwe"

Charlene ati:"Sha je ndi mwubu buzima bwawe novuga ko ndimwijuru"

Jewe nti:"hhhh reka sha kurenze urugero ahubwo nyibwirire iwanyu ingene hameze"

Charlene:"Sha iwacu ni mumisozi ahantu atakaburimbi rishikayo ntamatara ahari ndetse kuvoma tuvoma mumwonga tukanywa amazi ya rusengo, ibifungurwa ntidufungura amafiriti namasalade nkuku kwanyu ngo dushoze imitobe twe twirira ibifungungwa mbubarugo nk'amateke imyimbati ibijumbu nibiharagi bitetse mu nkono, mwijoro duteramira

kuziko data akaducira imigani sinkuku kwanyu muteramira kuri novelas"

Jewe yabivuga numva natwawe nti:"Yooo numva ndahakunze nukuri sije nzobona turaje"

Charlene ati:"hmmm uri sûre kutariko urigirisha Kessy?"

Jewe nti:"Yooo oya nukuri numva nshaka kuba mwurubwo buzima"

Charlene ati:"Je reka nzobatwarayo ico nzi co muzovayo mwarirabuye ntagufyina je ntimumbaze"

Charlene bwarije ndamuherekeza arataha mugusubira inyuma nagiye ndiyumvira kubintu yambwiye vyiwabo ndavuga nti:"burya tuba ku mubumbe umwe ariko uravye ukuntu ubuzima bwabantu bamwe nabandi butandukanye wogira ngo tuba mwisi zitandukanye? None Imana ishingira kuki kugira bamwe bavukire aha abandi hariya?"

Jewe nakuze ataco mbuze kuko twavukana na Gaël musazanje yankurikira tukavukana turi babiri Data yarumudandaza na mama akamufasha.

Naciye nsubira ndibuka kera nkiri umwana umusi Papa yari aje kuntora kwishura imodoka, ndibuka ico gihe nari nicafuje arankarira ariko haheze akanya aca arankinisha agakino twakunda gutaha turakina ati:"Kessy tomboza ikintu cabaye"

Jewe nti:"Wanzaniye crème glacée"

Nawe ati:"Swataaa"

Ndasubira nti:"wanzaniye biscuits"

Papa ati:"Oya vyanse ahubwo emera ko watsinzwe utange amande ntabindi"

Jewe naciye nibwiriza ndamusoma kwitama ariko ndabiye mwidirisha nca mbona umwana twigana ariko agenda n'amaguru nca mbaza Papa nti:"kuberiki Bertrand Papa wiwe atigera aza kumutora n'imodoka yama ataha n'amaguru"

Cari ikibazo cubwana nabajije ariko Papa ntiyanyishuye inyishu baha abana, yanyishuye inyishu ntatahuye ariko kandi ntibagiye kubera yambwiye ati:"N'ibihe mwana!"

Jewe nti:"Ibihe ivyahe?"

Papa ati:"Uzobitahura niwakura ndetse nigihe uzoba utarabitahura uzokwibahe bose kubera kuba hejuru canke hasi n'ibihe gusa ntakindi"...

Agace 2

Vyukuri vyamfasha imyaka myishi kugira ntahure insobanuro y'ayo amajambo kuko nasubiye no kuyibuka umusi nari mvuye kwishure nca mu rugo ahantu Jérôme umukozi wo muhira yariko aramesurira ndamuramutsa nti:"Ni sawa Jero?"

Nawe ac'arimyoza ati:"Wapi ntakigenda meze fo sana"

Natanguye kwibaza ko aribimwe vyawe vyo kurondera ahanca kugira ansabe amahera ndaba kwirengagiza ariko numva ngize amatsiko yo kumenya impamvu avuga ko amerewe nabi nca ndamubaza nti:"Ufise ikihe kibazo?"

Nawe ati:"Ikibazo ahubwo mfise imyaka gusa ahubwo wewe harico utabona? Ubona umugisha w'Imana uzopfuntumbereye nkiri muriyi myaka"

Jewe sinariko ndatahura ikintu na kimwe nca ndamubwira nti:"Jérôme! Urashobora gutomora ikibazo ufise ukareka kuvugira mumigani nkabagamba!"

Nawe ati:"Abagamba bo n'intwari kandi ntamugamba yokwemerera kuba mugasuzuguro nkaka ariko ntaco nubundi n'ibihe, buraca bugacana ayandi"

Jérôme yabivuze ababaye nca ndabona ko ukwo biri kwose ashobora kuba afise ikibazo nca ndamwegera ndavye mwibassin neza nanje narakngutswe nti:"Jérôme izi mpuzu uriko uramesa nizande?"

Jérôme yimyoza ati:"Uriko urambaza? Har'umugore mfise ngo ugire ko ariz'umugore wanje kandi nimba atarizawe uravyibwira hama ngo nogira umugisha!"

Jérôme ntiyarira gusema yarafise umwikomo ufise ishimikiro kuko Mama yari yamuhaye uduhuzu twiwe two musu ngo atumese kuburyo nanje numvise mbabaye nongera ndamaramara nca ndamwaka ibassin nti:"Jérôme wihangane nukuri ntiwagakwiye gusuzugurwa bigeze niyo"

Jérôme yaranyimye ibassin ati:"Reka ndazimese rega ntabwo arikosa ryawe kandi sirya mama wawe ndetse siniryanje ariko ni ibihe, ibihe vyemeye ko nisanga murubu buzima nivyubizotuma nisanga no mubundi"

Je nari umuntu agira ibigumbagumba vyinshi nisanze amosozi atanguye kuza nca ndinjira munzu numva mbabaye cane kuburyo naciye ndindira mwijoro aho Maman atahira kuko numva ngomba kumubwira akareka ivyobintu azotume aza araziha jewe.

Nkuko bisanzwe Papa na Maman bakunda gutaha batevye kuko barakunda guterama cane n'abagenzi ariho Papa yakunda kumbwira ati:"Mwananje uze uje mubandi kandi uze uganirize benshi bashoboka kuko ufise abantu uba ufise ibintu"

Burya nsubiye kuvyiyumvira nama nsanga Papa umenga yarazi gucunguza umwanya umwete yama afise amajambo yambwira ubu ndayiyumviye nsanga yaringirakamaro nkavuga nti:"Papa ntiwari kuramba, warubizi ko ufise igihe gito"

Mama wewe nubwo umuvyeyi aguma ar'umuvyeyi ariko yakunda gushwana cane kuburyo akantu kose atakihanganira, uwo musu nanje naramurindiye kuko nari narakuze sinari nkimutinya na cane cane ko naba numva ko atamakosa nakoze.

Ashitse yansanze nicaye muri Salon atangaye ati:"Kessy! Vyagenze gute?"

Jewe nti:"Ahubwo ndagukeneye ico tuvugana Mama"

Nagiye mbona ameze nkuwukangutswe ati:"Hmmm! Kessy ko unteye ubwoba? Nizere ko utagira umbwire ko watwaye inda?"

Jewe nti:"Rega Mama naho noba nayitwaye uretse ko noba ndayitwaye mugihe ntipfuza ariko umwana yama ari umugisha kuko ni ingabire iva kumana"

Nawe ati:"Uzokwihende uzomenye iyujana je ntanda zibitwarire nkeneye ngaha ntamugongo ngifise woguheka inzoya"

Jewe nti:"Hhhh humura noneho nta nda mbere ninawe uvyadukanye ariko nashaka tuganire kukintu nabonye kitanshimishije"

Maman ati:"Igiki Kessy?"

Jewe nti:"Mama! Nukuri nubwo ntashaka kukwubahuka kuko ndazi ko urumuvyeyi mwiza kandi naho nokura ndigitugu kitazopfa gisumvye izosi ariko Mama nukuza uriyumvira ukishira mukibanza c'uwundi umuntu"

Nawe ati:"Nibiki ko umenga utanguye kuvuga ko nyoko atabwenge agira ngo yiyumvire?"

Jewe nti:"Oya si ivyo mvuze ariko gufata impuzu zawe zo musi ukaziha Jérôme ngo azimese mbona ko ari ukumuhonyangira agateka Maman!"

Maman yaciye ahaguruka yikubita urushi ati:"Naravyaye ndabona! Karashize ingani wihe kumvuguruza? Kessy baraguhenze! Nshobora kuba nsigaye ntekereje nkarenza! Uti

Jérôme iki? Igitandukanye nakazi ndamuhembera yakoze nigiki?"

Ubwo nyene Papa yaciye yinjira ati:"Nibiki ko numva mushwana mwiri joro habaye iki? Hmm Mama Kessy Nibiki ko numva ushwanira umukonwa wanje yakoze iki?"

Maman ati:"Ibaze ngo jewe arashobora kumbwira ukuntu nkoresha umukozi ndisha nkaryamika nkavyutsa nkoza nkanatako nkamuhemba?"

Papa aca arandaba ati:"Kessy Nibiki ivyo numva?"

Jewe nti:"Papa ntumbwire ko nawe umushigikiye?"

Papa:"Mu biki?"

Jewe nti:"Ko Jérôme..."

Ntaraheza Mama yanciriyemwo ati:"Ntanguye kugira amakenga yivyo mwirirwamwo na Jérôme"

Numvise Mama avuze ukwo numva ndababaye mbura nico ndenzako nca ndahaguruka ngo ngende ariko Papa aca aramfata ukuboko abwira Mama ahore aca arambaza ati:"Mbwira mwijambo rimwe ikibazo kihari"

Jewe nti:"Oya ntaco"

Yaranse kundekura ati:"Kessy uremera ko ndi so ukaba umukobwa wanje?"

Jewe namosozi yari yatanguye no gukoroka nti:"Ego"

Nawe ati:"Mbwira rero ikibazo kihari"

Jewe naciye nihanagura mumaso nti:"Ntakibazo gusa nashaka kubwira Mama ko yoreka kuza araha impuzu zo musu Jérôme

azimese kubera nabona atagaciro bimuhesha azotuma azimpa je ndazimumesere"

Papa yarahindukiye araba Mama ati:"Ivyo Kessy avuga nivyo?"

Maman ati:"None ikidasanzwe nigiki?"

Papa nabonye yikorera amaboko acagenda mucumba avuga ati:"Ntakundi rero iryavuzwe riratashe"

Nanje naciye ngenda mucumba ariko kandi nyoberwa igituma Papa avuze iryo jambo atabikindi arengejeko, ntangura kwibaza ko ivyo namubwiye atagaciro abihaye ariko ndibwira nti:"Ntaco igikuru nuko nagerageje ico nshoboye uruhara rwanje narukoze ibisigaye je ntibindaba"

Agace 3

Mu gitondo nasohotse icumba canje ngo ngende kwishure nca mpura na Gaël musazanje nibwo nibutse ko nari maze imisi ntamubona numva ndamaramaye ukuntu nshobora kuyoberwa amakuru yo musazanje kandi tubana.

Musazanje yiga segondere ariko novuga ko nubwo ari we musazanje nari mfise wenyene ntitwari tubanye neza kuko kenshi twakunda kuba turiko turashwana dupfa akarwi yagenderamwo ko mwi quartier kabatamvyi b'umuziki vyavugwa ko kanywa urumogi kandi ni kenshi yataha amota itabi.

Rero uwo musu twahuriye muri corridor mbona asa nabi yambaye nimpuzu zicafuye numva ndababaye ntangura kuzunza umutwe ndamuraba nawe aca aranyitanga ati:"Hey sister ndazi ko ukunda kungorera ubwenge unkinira show zabavyeyi umpimanuro zurutavanako, uno musu mvyutse meze fo ntunyongerereze stress"

Naramwitegereje mbona ukuntu yonze ntangura kwiyumvira kuburyo nzokoresha kugira ndamuhanure kuko nari naravuze ndateba ndaruha ariko numva uwo twonse rimwe ntoheberana kuko igito gitabwa iwabo.

Amashure yaradubura akisubiriza kubera kenshi yaragenda tukamuburira irengero akagaruka baramusize mu vyigwa.

Papa yakunda kumubwira ati:"Wavukiye muri vyose nico gituma ur'igipfu ariko nivyiza kuko bizotuma umwana wawe niwagira amahirwe ukamuronka avukira mubukene maze we azoba muzima kuko azoharanira kutaba nka se ubuzima nikwo bumeze wibaza ko ari kuberiki igihugu kidatwarwa nimvukira

zuyu muji? Ni kubera ubuzima bwiza burera ibifyinate ibifyinate navyo bikarema ubuzima bugoye ubuzima bugoye nabwo bukarera abakomeye"

Ayo majambo Gaël yaca mu gutwi agaserukira mukundi ariko je narayumva akantera ubwoba nkibaza impamvu Papa abwira amajambo nkayo umwana yivyariye ariko inyuma y'igihe niho nagiye gutahura ivyo yaba ariko arasobanura.

Uwo musu rero ntaco navugishije Gaël na cane cane ko nari ngiye gukora ikibazo naramuretse ndagenda naburya aho naba no kwishure hari hariho urugendo rutari musu yiminota mirongwitu aho nahitamwo kuhagenda n'amaguru atarukwo mbuze ukwo niyunguruza ariko ko naba numva no kugorora imitsi ari ngombwa.

Ndibuka ko uwo musu Dorine duhejeje ikibazo yadusanze duhagararanye na Charlene ati:"Alloooo bacheri banje?"

Jewe ntwenga nti:"Aho rero ako kanyamuneza katubwire ko ikibazo cakworoheye?"

Dorine:"Hey attention ! don't kill my vibe umbwira ivyibibazo kandi atakibazo nshaka kwiteza muruyu mwanya"

Jewe nti:"Aho daaa! Uti rero urashaka kwiteza iki?"

Dorine ati:"Nyene ngira ndabahe map ndazi ko muheruka kuva muhira kera!"

Jewe:"Aho sha ntiwumva se vuga neza nari ndanabikumbuye"

Dorine ati:"Nyene uno musu dusohokera mubaki? Tomboza?"

Jewe nti:"Utambwira ko waronse umu come from?"

Dorine ati:"Umwe hoho ko ari soirée gala yabadiaspora umwe mubabiteguye numugenzi yampaye carte d'invitation zitu

rero uno musi soir mwishire kugihe dress code ni udukanzu tugufi twa rouge canke noir!"

Charlene yariko arumviriza ahoze ati:"None ko washushe Kevin murajana ko nzi ariwe musohokana?"

Jewe nti:"Kandi sha nizere kutagiye guca Kevin inyuma ningene agukunda vyasaze kandi afise buri kimwe wokwipfuza"

Dorine ati:"Mubandanya kundeceva! Franchement! Isi tugezemwo mubayeho mutaramenya ko atampamvu yo kwibohera ku muhungu umwe? En plus de ça turacari bato turakeneye kwiryohera tukarya ubuzima! Orosha imitwe basha!"

Charlene yaciye adusezera aragenda ati:"Pardon je ntibiza gukunda ko ndahaba nza kuba ndi muri louange kandi ndabona namasaha ariko aragenda il faut ko ntaha cao muze kuryoherwa!"

Dorine ati:"Ntivyokunda Louange uzogenda mundwiza nikindi gihe je ivyo ntibindaba! Ahubwo 18h tuze gusanga wishize kumwanya Kevin yampaye nimodoka urumva ko ibintu aramavuta"

Tukivugana nanje naciye numva phone isonye ndavye mbona ni Papa ampamagaye nca ndasezera naje Dorine aragenda nsigara je nyene nca nditaba nti:"Allô Papa"

Nawe ati:"Mukobwa wanje ni sawa?"

Nanje nti:"Nisawa Papa! Ko Unterefonye aya masaha nzi ko uba uri mukazi kenshi?"

Nawe ati:"None guterefona umukobwa wanje amasaha nshakiye namakosa?"

Nanje nti:"Samakosa Papa ahubwo ntushobora kwibaza ukuntu nkunda kuganira nawe kuko ndazi ko iyo twicaranye ntataha ukwo naje"

Papa ati:"Ntiwumva! Burya narivyaye imfura yanje niwe mwana mfise ahubwo ndakumbuye kwicarana nawe uri hehe ndagutore tuje gusangira ivya midi nimba utarafungura ivya Jérôme"

Jewe nti:"Ndi kwishure ivya Jérôme sinari bwabishikire"

Nawe ati:"Gumaho ndaje kugutora rero nawe uno musu uraba umugabo kuko ntamugabo afungura muhira sasita"

Jewe ntwenga nti:"Ndumva noneho namabwirizwa y'abagabo ntanguye kuyamenya hhhh"

Yarakufye haciye akanya acaraza arantora anjana ahantu muri restaurant nziza yo mugisagara ntangaye nca ndamubaza nti:"Burya bwose Papa usanzwe ufungurira ahantu heza nkaha?"

Nawe ati:"None wagira ngo iyi nda irimwo sepejere?"

Jewe ntwenga nti:"Ushatse kuvuga CPGL umuryango w'ibiyaga bigari none?"

Papa ati:"Muranyumvira? Sepegere ninrya twarya aho hambere muri restora zo gukuma irido burya ibintu vyose ni Ibihe mwananje haramakuru utazi"

Agace 4

Jewe nti:"None Papa CPGL zari imfungurwa zimeze gute?"

Papa ati:"Mwananje burya ntubone uno musu ndumugabo yahaze wibaze ngo nikwo vyahoze, narigeze kubaho ubuzima bwinzara ndetse niyo sepejere nkayibura, basi wibaza ko nakorotse mva mwijuru? Ni kuberiki atamuryango wanjye musu?"

Jewe nti:"Mpora ndavyibazako nkabura ukwo ndabikubaza"

Papa ati:"Burya urugendo rw'ubuzima ni rurerure, kandi aho uhuriye n'umuntu ageze wibaza ngo niho yahoze ariko burya aba yaragenze nibirenge bigahindukira. umuryango wanjye wahitanywe nintambara y'irindwi nakabiri mba ndabaye impfuvyi munyuma nisanga mwibarabara ntangura kwirwanako kuko nari nsigaye meze nkaka gati kirebanga ariko kateretswe n'Imana kuko imiyaga ntiyabuze kuza iransiga.

Ndakubwiye ko nakoze akazi ko munzu nkakarya Jérôme akora uretse ko we koroshe kuko agakorera ahantu heza ntiwovyemera, ndakubwiye ko nadandaje amazi mwibarabara, nkaba umutaxi vélo, nkaba motard nkatwaza itaxi gushika ndaronka umutahe nkataka ivyashara nkagenda ndaduga wogira ngo nizankuru abantu barema kugira bateramishe abantu.

Ninkuru ndende vyosaba ko tuyifatira umwanya ukwiye nzoyikubwira umusi uzoba uvyipfuza ariko ngomba kukubwira ivyambayeko igihe nakora akazi ko murugo kwa Marimbo.

Ninkuru ikomeye kandi nshaka ko ukurugutura amatwi ukantegera ntihagire ikigucika canke ngo gice mugutwi

giserukire mu kundi kuko izogufasha gutahura ibizoba bishobora kuba binegereje.

Sinzopfa ndawibagiye uwo musu kuko niwo watumye ubuzima bwanje buhinduka kuko nagize indahiro imbere y'Imana na jewe.

Burya ivyabaye ejo cabaye ikimenyetso kinyereka ko imisi mibi ishobora kuba itwegereye nubwo ntari Imana ngo menye ibizoba ariko narigeze kuja gusenga umusi umwe baravugaga ko Imana ataco izokora itaburiye abasavyi bayo kandi nizera ko Imana ivugaga mu buryo bwinshi harimwo n'ibimenyetso.

Ndavyibuka ko nanje muka Marimbo yampaye impuzu ziwe zo musu ngo ndazimese maze numva nagasuzuguro bimbera imbarutso yogusezera akazi ko munzu ndetse nirahira ko ngiye gukora nk'umutima maze nkihindurira ibihe.

Ariko ndahira ko nanje ninahava ko nzokwirinda gusuzugura abo nahasize ko nibishika nkabikora umuvumo w'Imana uzombonekako.

Nari maze imisi ndota indoto ntatahura ariko ejo numvise birya cabaye ikimenyetso ciyongereyeko.

Burukwo nryamy nibona umuryango wanjye uriko urarohama mukiyaga ariko nagerageza kubakwega bikanka.

Sindabikubwiye ibi ngo ndagutere ubwoba sha Kessy wanjye ariko nshatse uze wame witeguriye ibihe vyose ndetse ibihe vyiza ntibizokwibagize ko ibihe bibi bibaho kandi ntibizotume wumva ko abari mubihe bibi harico ubarushije uzokwubahe ibihe kuko bisobanura imisi ndahekeje kandi ndagiye. "

Papa yarahagurutse ansoma muruhanga acaragenda nanje nsigara ndiyumvira kubantu yarahejeje kumbwira numva

ubwoba buranyishe ndetse nawe yagiye yihuta kuburyo nasigaye nicaye nkomeza kwiyumvira hamwe ubwenge bwanje bwagiye Kure nkibagira naho ndi.

Nasubiye gutora ubwenge numvise terefone yanje isonye ndavye mbona ni Dorine ndavye isaha mbona ni isaha cumi nimwe ndikanga sinari nigeze menya aho amasaha yagiriye.

Nahagurutse ndasohoka nihuta mfata taxi ndataha numva Dorine arasubiye kunterefona nca ndamwitaba ati:"Ko ndaguhamagara ntiwitabe ga wakantu we? A-ha ntiwoza ukanyugurira canke ushaka undindirize?"

Nabwiye Dorine ko ndiko ndataha ndamusigurira ko Papa yarankeneye arandindira antukagura kuri terefone mukanya gato mba ndamushikiye.

Niteguye amputagiza kuburyo na makeup nagiye ndayigirira mumodoka tugiye gutora charlene uretse ko umwanya munini naguma ntakarira muvyiyumvira nkaza numva Imodoka irahagaze nkahakwa kwiseka kumodoka kubera naba natakaye nkaca nsahuka kumbe Dorine yaba yabibonye ko natakaye agaca afata ifure bukwi na bukwi kugira ankangure.

Kugeza aho yatevye arahagarara arambaza ati:"Kessy ufise ikibazo ikihe?"

Nanje nti:"Nukuri ntaco gusa numva ntatekanye"

Dorine ati:"Rindira dushikire Charlene ndabaha akantu"

Turiko turagenda harumuntu nabonye ndikanga nca nsaba Dorine guhagarika imodoka nti:"Uri sùr ko umuntu tugiye kuraba tutamurenganye"

Twaciye duhindukira tuca tubona Charlene ariko agenda n'amaguru wenyene tuca tugira rivanse tumushikiriye Dorine

aca aravuzza ihoni maze Charlene aravye mumodoka aca aratubona ati:"Ah mwebwe kandi? Je n'agira ko muza mushikayo?"

Dorine ati:"Dushika hehe tugusize?"

Charlene ati:"Je ngiye muri Louange nabibabwiye rega Burya naho turi abagenzi ntitubaye mwisi zimwe namwe murabizi kandi isi yanyu siyo gupfa kwimenyereza kuko abayimenyeye ikabihinduka ntivyaboroheye"

Yavuze aya majambo numva nsubiye gutakara ndayahuza nayo Papa yari yambwiye, burya mu buzima hari igihe uguma wumva urukurikirane rwabantu umenga bose bavyukiye kukubwira inkuru imwe umwanya umwe ukihumuriza ko ar'uguhurirana kw'ibintu ariko uwundi umwanya ukiyemezo ko ushobora kuba uriko uraburirwa kuko ngo ntakabura imvo.

Sinamenyeye igihe na Charlene yinjiriye mumodoka ningene Dorine yamugondoje kuko vyagaragara ko ivyiyo soirée yarishuhije Dorine we bitari bimwirukanza uretse ko nanje ubwanje kwabaye ugupfa gakurikira ariho twashitse muri ville aca aducana ahantu muri magasin imwe agurira ikanzu Charlene makeup yoyo nari nayigendanye nije naciye ngenda ndamukora turi mu modoka.

Agace 5

Twarashitseyo turinjira ku rwinjiriro twahasanze umuhungu ahagaze yambaye umwambaro vyaboneka ko akora aho hantu aca aza adusanga ati:"Kaze karibu bienvenus welcome bienvenidos"

Twasanze twatwenze nanje nca ndamwishura nti:"Urakoze asante merci Thank you gracias"

Umuhungu yaciye atwenga acarasubiza ati:"pueden ustedes venir conmigo por favor?"

Nagiye numva Dorine ati:"Hey petit twe ngaha ntitwaje kuvumba turabatumire rero ivyo birimi vyawe ubitware hirya!"

Nawe ati:"Muradutunga! Nikibera nabahaye kaze mukanyishura mu ndimi zose ubundi ngaha nikwo twakira abakiriya hanyuma umukiriya nawe akihitiramwo ururimi yipfuza kubandanya tumuganirizamwo muri ziry a zose navuzemwo kaze rero kubera nabonye mwanyishuye mundimi zose nanje naciye mpitamwo urwo mbandanyamwo!"

Dorine ati:"Nawe rero muri zose wabonye ko urubereye kubandanya utuganirizamwo arigihindi?"

Jewe nasanze naturitse ndatwenga nti:"Dodo ntabwo arigihindi cari iki espagnol ahubwo shahu uzokinyigishe urazi ko ndagikunda"

Umuhungu yavuze atekanye atwenga bukebuke aca ashira ikiganza ku gikiriza ciwe arunama ati:"Umukiriya ni umwami ndahari kugira ngo ndabakorere!"

Uwo muhungu sinzi impamvu ariko nari ntanguye kubona umenga akazi kiwe agakora neza mfatiye kukuntu yariko

aratuganiriza ariko nkiriko ndamuvugisha numvise Dorine ankwega ukuboko ati:"Ntitwambariye twisigira kuvugisha aba serveur hewe Ingo tugende rekana nako gahungu kireshwangisha ibihindi"

Ariko tutarashika kure umuhungu yaratugaruye ati:"Munyahanganire ariko simbereyehe kubatesha igihe na cane cane ko ndabizi ko umwanya aramafaranga ariko munsigire amakarata yanyu y'ubutumire"

Dorine yakoze mwisakoshi akurayo ama carte d'invitation maze arazimuterera kuburyo zasanze hasi umuhungu arwana no kuzitoragura numva ndababaye bidasanze nca mpindukirira Dorine nti:"ariko Dorine kuki uriko wifata nkukwo atavyo nahora ndakuziko?"

Dorine ati:"Je ako gahungu ntikanryoheye mbona kigira vyinshi"

Charlene ati:"Ariko umuhungu je kuva dushika ntakintu mbona arakora gitandukanye ninshingano ziwe"

Dorine ati:"Nimumuvugire rwose musumvye aho"

Tukivugana har'ukuntu twaciye twumva imirindi n'amajwi y'abantu batambuka inyuma yacu twese duca duhindukirira rimwe maze tubona abahungu batatu baje batugana badushikiriye batangura kutuvugisha.

Umuhungu yaciye avuga ati:"Salut bakobwa beza kuki mwagumye muhagaze ngaha ntimushike"

Dorine ati:"Salut niho twari tugishika"

Umuhungu arasubira ati:"Rero murisanga jewe nitwa Scott ababagenzi banje nabo barashobora kubidondora maze tukicarana twamenyanye nimiburiburi amazina"

Umuhungu yari iruhande yiwe yaravuze ati:"Jewe ni Yves"

Uwundi ati:"Nanje ni Cedric"

Natwe twarakurikiye Dorine arivuga kugira amahirwe acagirako anaturugira amazina maze Scott aca aramubuza ati:"Ariko nimba atakibazo bovuga nabo tukabumva amajwi meza yabo"

Vyahavuye biba ngombwa ko twivuga maze baca baratujana mukarwi kamwe kimiyabaga ahantu bari bicaye mbona imbere yabo hateretse amacupa menshi y'ibinyobwa ntashiboye kumenya kuko nubwo nakuriye ibujumbura nari namenyeye nishokanira nabagenzi tukaja kwiririra udu crème glacée ariko mvugishije ukuri ryari iryambere nshokeye mukabare ariko ndavugaga nti buri kintu cose kigira incuro ya mbere kandi ninayo igorana kenshi.

Burya ibintu vyose mu buzima bigira intango, irya mbere urihenda irya kabiri ukamenyera irya gatatu ikaba ingeso irya kane bukaba ubuzima bwawe, ukwo nibwo umuntu uheruka yaruyu ejo ukazosanga yarabaye uwundi.

Scott vyagaragara ko ariko aratwitaho yarasubiye ati:"mwumve mwisanze ngaha hari abantu bugurutse mumutwe rero namwe ntimwifunge mwirekure ndetse ibinyobwa n'ibifungurwa biruzuye mufate icyo mushaka"

Dorine nagiye numva avugaga ati:" dusukire kuri ka champagne rero tugarure ubwenge"

Scott ati:"Avec plaisir"

Nanje nti:"Wait! Dorine ugomba unywe inzoga!"

Dorine ati:"Ntumbwire ko wosohokera ahantu nkaha ukanywa nza ma fanta oya nawe!"

Charlene ati:"Jewe nibansukire amazi ntanikindi numva nshaka"

Scott ati:"Nivyo buri wese afate ico umutima wiwe wifuza igikuru nuko mwiyumva muguwe neza hamwe natwe"

Yaciye ahindukira arandaba nanje ati:"Nawe ndagusukire kuri champagne, cocktail canke jus?"

Jewe nti:"Mpa jus"

Yahejeje kudasukira turamushimira maze tugihejeje hari uwaje atugana tumubonye Dorine atangura kuvuga ati:"Murambonera wa muhindi aragarutse kutubihiriza umusi"

Nabonye wa muhungu twasanga kurwinjiriro aduhagaze hejuru asa naho harikintu ashaka kutubwira ariko Dorine agakomeza kumwiyama nanje mbwira Dorine nti:"Ariko Dorine wogabanya gusuzugurana ko utazi nikimuzanye"

Umuhungu yakomeje gusa nuwuduhamagara ariko Dorine aratubuza kumwitaba kuburyo nagerageje guhaguruka ariko aramfata ukuboko mbura aho nca niho hacye uwundi muhungu adushikiriye ashika aturamutsa ati:"Dodo wamaze gushika? Ntavyo nari namenye mba naje kukuramutsa nubu sinzi ukuntu ndakubonye harabantu benshi?"

Dorine ati:"Nari gusiba ntapfuye ahubwo ramutsa abana babagenzi banje twazanaye"

Umuhungu yaraturamukije ati:"Nitwa Bruce"

Natwe twaribwirije turivuga duhejeje Dorine ati:"Yamara rero wodutabara ukadukurako uyu muhindi atuguma hejuru"

Bruce ati:"Umuhindi uyuhe?"

Dorine yamutungiye urutoki amwereka ahahagaze wamuhungu maze Bruce aca aratwenga ati:"Aaah Diego? Kuva ryari arumuhindi Diego?"

Yaciye agenda aramusanga sinzi ivyo bavuganye acaragaruka adusanga aho turi ati:"Nivyo mutamenye..."

Agace 6

Bruce ati:"Rega ntimwamenye ko Diego atakindi yashaka kubabwira uretse ko kuma karata mufise mwategezwa kuba mwicaye muri VIP"

Dorine ati:"None muri VIP nihe?"

Bruce ati:"Ni hariya hejuru"

Yadutungiye urutoki tuca turabona ahandi hantu hejuru hari harwiriye mwo nabazungu Dorine ati:"Ntumbwire! Tugendeyo sha!"

Jewe namubwiye nti:"Ariko mbona no ngaha ataco habaye Dodo?"

Charlene:"Mbega nyene dutaha ryari ko mbona amasaha agiye?"

Dodo:"Mais t'es folle où quoi? Dutaha ariho tugishika?"

Charlene ati:"20h nzoba ntashye ukwo biri kwose"

Dorine ntiyavyumvise ahubwo yaradukweze atujana hahantu Bruce yaratubwiye ngo ni muri VIP dushitseyo kandi koko hari hatandukanye naho twashikiye, kuko hoho hari hatekanye nakayaga kadushikira ningonga kuko hari hejuru.

Hari heza kuburyo twatanguye kwifata amafoto gushika aho haciye haza umuhungu w'umuzungu yavuga igifaransa afise appareil photo avuga ko yipfuzaga kudufotora ariko twe na Charlene turanka ahubwo tuca tuboneraho akanya ko kuba turatembera.

Charlene ati:"None niyihe objectif yibi birori?"

Jewe nti:"Mbaza nkubaze! Usanga ari kugira biryohere nyene!"

Charlene ati:"Cobikoze bafise amahera menshi yo kwonona!"

Jewe nti:"Rega bitwaza ngo ubuzima ni buto cane"

Charlene ati:"Izo nimvugo zivyihebe kuko ubuzima buba buto iyo worohewe ariko ugowe ni burebure kuko uno musi mumfuruka imwe y'isi hariho umuntu umusi wabereye muremure yiriwe ariruka arondera ico rirenza akabura ariko aba bashize amamiliyo mubinyobwa nibifungurwa bahereza yanda buca ikubaza ico wayirarije"

Jewe burukwo tuganiye na Charlene natangazwa n'amajambo yiwe niho naca ndamubaza nti:"Chacha bigenda gute ngo wiyumvire nkukwo?"

Nawe ati:"Hhhh niyumvira gute Kessy?"

Jewe nti:"Sha nyene harikintu uvuga nkumva uvuze ibintu bifise insiguro iremereye nkibaza ati none uyu mwana yaciye mubiki kugira yisangane imyumvirire nkiyi?"

Nawe ati:"Ntakidasanzwe Kessy, kandi nawe burya urihariye, uratandukanye na Dorine, mwese murabanyabujumbura ariko ibibakwegaga si bimwe akarorero hindukira urabe ivyagezemwo"

Narahindukiye ndavye nkubitwa n'inkuba mbonye Kessy ariko asomana nawa muhungu ndavuga nti:"Mana yanje! Ndiko ndarota canke amaso yanje ariko arampenda?"

Charlene ati:"Kwisi turatandukanye kandi duhagaciro ibitandukanye nico gituma tudashobora kugira imyumvirire imwe gusa isi n'umwigisha kuwushaka kwiga kandi ibidukikuje vyose nibitubako biba bitekeye isomo kuri twese je rero ivyombako vyose imbere yokwibaza impamvu bimbako nibaza icigwa vyoba biriko biransigira"

Charlene nasanze namuhobeye ndamugumya nca ndamubwira nti:"Merci Chacha nukuri ndashima Imana yakuzanye mubuzima bwanje"

Twaciye twumva ijwi inyuma yacu turarimenya ryari irya Scott ati:"Holà! Mwaciye mugenda hehe? Ko nasubiye kubaraba nkababurira irengero"

Jewe nti:"hhhh nyene ntiwari wahatuboheye"

Skott yaravye Charlene ati:"Ariko sha ko uyu mugenzi wawe atavuga"

Jewe nahindukiye mfata kurutugu Charlene nti:"Uyu nyene avugisha abanyamugisha yamenyereye"

Scott ati:"Nimumbwire nanje ibisabwa kugira ninjire mwuwo murwi mutoyi wabanyamugisha nimba arico mfise ndacikoreko arico ntafise naho mbaririze mubagenzi bibaye ngombwa ndige imisozi manuke iyindi gushika ndonse ivyo vyangombwa!"

Hari ikintu kinryohera kwisi ni ukungene abantu bashobora guhuza imboni kuncuro yambere atanumwe azi uwundi ariko bikamera nkumwampi w'ikibiriti unyereye kuri kakantu gatuma haka akabeya k'umuriro kamwe kaba gato ariko karonse ivyo kadomeka numusozi woshobora kwaka ugatokombera.

Rero mwuwo mwanya nabonye imiravyo mu maso ya Scott mbona imboni ziwe ziriko zinyerera ku za Charlene maze nkumuntu mukuru ndibwiriza nca nongorera Charlene nti:"Ngiye kuri toilette gatoyi ntugire ngo ndagutaye"

Nca ndavuga nijwi ryumvikana nti:"Scott sindakuzi kandi nubwo amaso matindi adasiba kwihenda ariko ndakuravye uhumeka icizere rero uncungire iyi ncuti yanje ndagarutse"

Charlene ati:"Oya ntivyokunda ntunsiga aha"

Skott:"Noneho ndabona ko ntahumeka icizere nkukwo ubivuga kuko incuti yawe yinuvye ibiganza vyanje irarahiye irarengwa"

Jewe naravye Charlene ntwenga nti:"Ah Chacha reka gusarisha"

Naciye ndamwiyaka kubera yari yamfashe ukuboko ndagenda maze mu buryo ntazi nisanga ngeze ahanu mukabuga kari gateyemwo utwatsi namashurwe meza hakamwo udutara kuburyo nahihweza nkumva ndatwawe ariko kandi umutima ugatera nkeraguza hirya no hino nkaho umenga harico umutima uriko uransaba kubona naho mwuwo mwanya ntashobora gutahura ivyarivyo.

Ubwo nyene nabonye abagabo babituzza nibitugu amahero bambaye udupira twirabura namarori yirabura baje bariruka bancako numva umutima urasimvye nkiri muri ivyo nabonye hirya wa muhungu twasanga kumwango asa nuwuriko avugira kuko kantu kameze nkaterafone nca ndamwegera nizina ryiwe nari narimenye nca ndamuhamagara nti:"Diego!"

Yarahindukiye ambonye arikanga ati:"Pardon? Izina ryanje warimenye gute?"

Jewe nti:"Kuba narimenye ni ikibazo se?"

Nawe ati:"Muradutunga! Ahubwo ndiko ndibaza iryo teka ntewe no kumenywa kuko ngaha bose baduhamagara izina ryubuhizi nako ryakazi ariryo serveur rero umuntu ampamagara ngaha nuko aba anzi ahandi hantu"

Jewe nanje nti:"Ahandi hantu? Ngira muri kazoza hhhh"

Ubwo nyene kakantu kameze nka terefone karasonye nza numva havugiyemwo amajwi ntashoboye kwumva neza aca arikanga batangura kwereguza hirya no hino ahantu twari duhagaze nza numva avuze ngo:"Asha nuyu nyene ntawundi"

Diego yatarutse kabiri mbona acakiye umuntu batangura kunigana nanje ngira ubwoba ariko sinzi ukuntu nitegereje ngwa mugahundwe mbonye...

Agace 7

Maze nitegereje neza uwo banigana ndavye mwisura ngwa mu mazi nti:"Gaël ?!"

Sinariko ndiyumvisha ikintu cazanye musazanje aho hantu bigeretseko nkamubona yiruka bamufata nk'umusuma nca ndegera ndamubaza nti:"Gaël ibi nibiki?"

Diego atangaye ati:"Uyu musuma murazinanye?"

Jewe mbandanya gutangara nti:"Ntibishoboka mwamwihenzeko musazanje si umusuma"

Diego yumvise mvuze ko ari musazanje aca amera nkuwumurekuye ati:"None je ko bambwiye ko aje ariruka agana aho mpagaze nimba atari umusuma ariko yirukanzwa niki?"

Jewe nitegereje Gaël nti:"Gaël oya nsigurira neza nizere ko ivyo ndiko ndibaza atarivyo!"

Gaël yandavye ahemagirika nibimaramare ati:"Sister sorry"

Diego amaze kumurekura yameze nkuwunyegera aca ancako ariruka amaguru ayabangira ingata Diego amukurikiye ngo amufate ndamubuza nti:"Diego please umundekere musazanje nimba hari nivyo yivye canke yononye mubimparureko ariko undinde kumaramarira ngaha"

Diego yariyumviye gato akiriko ariyumvira babagabo bibigango baba barashitse umwe muribo ashika abaza ati:"Akajinga wagacakiye? Karihe tugakosore?"

Umwanya umwe nariyumvira ko uwo bariko baravuga ari musazanje twonse rimwe ariko araba iciro ry'umugani kandi yavukiye ahari vyose vyangomba umwana yokenera kugira

abeho ubuzima bwiza bunyuranye nubwo kwitwa ayo mazina yose bari bamaze kumwita muminota idashika nitanu.

Uwundi mwanya nibwira ko zoba arindoto mbi noba ndiko ndarota ariko amaso yanje ntiyahengeshanya kuntamaza ko ukuri kuri imbere yanje atanikibazo nkwiye kubaza kuko ikimenyetso vyose vyanyemeza ko musanzaje yabaye umusuma asigaye arengana bakirukako.

Diego nyakuntunga yabishuye azunza umutwe ahakana ko atawaje agana aho twari duhagaze nabo abagabo bari bariye amavubi ntamwanya wo gutakaza bari bafise baduciyeko kumuvuduko urenze nsigarana na Diego isoni n'ibimaramare arivyo binyuzuye kuburyo vyananiye kwunamura amaso ngo tuyahuze ahubwo nabonye ko icoba ciza nanje nokora nka musazanje nkikora kumaguru nkasiga inzira amavuta kuko ivyo nari maze kubona ubwenge bwariko burateba kuvyakira.

Naratambutse ngenda ntasezeye Diego maze ngenda nderaguza kubwamahirwe nabonye Charlene akiganira na Scott hamwe nabasiga maze ndamushikiye acaranyitanga ati:"Shahu nari mukuja muvyambu"

Jewe nti:"Ahubwo reka ndabe amasaha aho ageze"

Natoye terefone nkiravye isaha nca ndabona message ya Dorine yagira iti:"Hey les filles je ntimundondere ngiye gutembera mwijuru numulalaika yalbonekeye nzogaruka ejo ndababwira ubuvugishwa"

Neretse message Charlene tuca turasezera Scott nawe ati:"C'est dommage ko mugiyeye ibirori vyagira bitangure"

Charlene vyagaragara ko batanguye kumenyerana niwe yamwishuye ati:"ivyiza biri kwisi ni vyinshi ntawobimara kandi Imana idutije kuramba tuzobona vyinshi"

Scott ati:" Nivyo none murafise ukuntu mutaha?"

Jewe nti:"Turafata Taxi haracari kare"

Scott ati:"Sha Taxi Ino harigihe urindira nisaha utarayironka reka ndabashikane nce ngaruka"

Scott yaciye adutwara nicara inyuma kubera nari numva ntashaka kuvuga vyinshi Charlene bicarana imbere bagenda baraganira je nije natanguye gushika nca ndabasezera hama baca barabandanya nanje ndashika muhira nsanga ntanumwe ahari uretse Jérôme.

Nashitse nja muri douche kugira ndabe ko notora itiro kuko nari numva umusi wabaye muremure ubwenge bwakiriye amakuru menshi vyukuri buri kimwe narumva kigarutse nkatakara nkibagira ivyo ndimwo.

Nashitse mucumba nkiriko ndihanagura mvuye muri douche mbona phone yanje irasonye yari Charlene yari yandondeye incuro yagira gatatu nca ndikanga mbangutsa kwitaba nibaza ko yoba yagize ikibazo.

Nashize kugutwi nti:"Alloo Chacha sorry sha nashikiye muri douche narinzi ko nca ndakubaza ko washitse neza"

Nawe ati:"Shahu nashitse neza ahubwo nagumye mpangayikiye wewe kuko twatashe mbona ko utameze neza nanka kukubaza kubera Diego"

Jewe nariruhukije nti:"Sha Chacha ninkuru ndende ariko kandi ntakidasanzwe gusa reka unkundire tuzobonane ejo ndakugire ku muriri kuko mwiri joro numva atanguvu ngifise"

Charlene vyarankundiye turasezerana maze nshira phone kuruhande ngarama mugitanda ubwenge batangura kuzunguruka bungarukanira amashusho amwamwe nibuka ikiganiro twagiranye na Papa nibuka Dorine nibuka Gaël nkumva ivyiyumviro bimbanye uruhuri.

Nasubiye guteba kwijambo yamye akunda kumbwira kuva mubwana bwanje ariryo 'ibihe' maze nsesangura ibihe vyose vyaranze umusi wanje nibuka ko Charlene yambwiye ko igikomeye s'ibihe niyo bizanana ariko nico bigusigira.

Nasubiye kwibuka Diego nsanga ubwenge bwanje bugumye bunyereka inyifato yagaragaje mu bihe bitandukanye gushika aho nasubiye kwikangura nsahutse ivyuya vyandenze kubera indoto nari mpejeje kurotera Dorine.

Mu buzima sinkavya indoto ariko uwo musu vyarananiye kuzifata ibisanzwe kubera vyaranse ko nsubira gusinzira gushika aho umutima wangobeye gutora terefone nkamuterefona ntitaye ko ijoro ryari ryitereye.

Naramuterefonye numva terefone yiwe ntisona nza ndasubira kugeregeza burukwo haciye iminota itanu ariko kincuro ya gatanu mbura ico nkora nca nibuka umusi umwe nigeze kujana na Charlene gusenga mwisengero gusenga ko uwigishije yatubwiye ati:" Igihe cose uzoba mu bihe ukumva inzira zose zirafunze ukumva uraherewe ukumva urabuze ico ukora uzomenye ko Haribo ikintu kimwe wagakiwye guherako imbere yuko ugerageza ibindi ico naco sikindi ni ugusenga"

Nanje naravuye kugitanda ndasenga mbwira Imana ibintu vyose nari maze kwumva ibimpagaritse umutima mbere nindoto naroteye Dorine inyuma yakanya numva amajambo yarandi ku umutima nayavuze yose.

Burya abantu basenga hariho ibanga barushije abasenga naho abenshi babipinza, nivyo ntituzi ukuntu Imana ikora ariko kubamaze gusenga barazi ko igikuru atari inyishu yibibazo dutura Imana ariko ni ugutekana twumva mu mutima inyuma yo gusenga naho ibibazo biba bikihari.

Natoye igitabo ngo nsome kugira ndabe ko itiro ryomfata ariko nza numva terefone irasonye ndavye ndakangukwa.

Agace 8

Neza natangajwe no kubona ari Dorine anterefonye nca ndabangutsa kwitaba nti:"Allô"

Dorina ati:"Kessy kabaye"

Jewe nti:"Ndumva sivyimbeshere ubuvugishwa bugira butangure"

Dorine ati:"Reka sha iryavuzwe ahubwo riratashe"

Jewe nti:"Kumenga ni apocalypse ubwo ijuru wagenda ugana ntiryakurwiriye"

Nawe ati:"Ubivuga urabizi, canke ndi muyabira"

Dorine numvise avuga nkuwugomba kurira ndavyumva mwijwi numva ikintu gitanguye kuncumita ku mutima nce nibuka indoto narose.

Narose ngo tugenda na Charlene tumusanga mu cumba kimwe cahantu hasa no mwihoteri tumusanga aryamye hasi icumba cose cuzuye amaraso ngo nawe arambaraye hasi ataka cane munda hiwe hamushinzemwo imbugita.

Izo nizo ndoto nibutse nca nihutira kumubaza ahantu ari nawe anyishura ati:"Sinzi ahantu ndi gusa ndabona nsa nuwuri kumusoza w'ubuzima Kessy kuko ahantu ndi sinzi ko ndahava ndi muzima"

Yavuze ukwo numva umutima uramvuyemwo ariko atanikindi ndamubaza terefone yarikufye ngerageza kumuhamagara numva yasubiye kuvako sindamutora.

Nisanze nguma ngerageza kumuhamagara gushika bunkerako ndabuze ico nkora ijoro naryo ubwaryo ryari ryambereye rirerire.

Nakangutswe mbonye urugi rwicumba canje rwugurutse ndavye mbona ni Dorine tureha ashoka yicara kugitanda yubika ibiganza mumutwe nanje nca ndahaguruka bukwi nabukwi ndamwegera ndamufata kurutugu ndamubaza nti:"Dodo wabaye iki?"

Yaciye aturika ararira avuga ati:"Kessy! Kuberiki meze ukwo meze? Kuberiki ntameze nkamwe nshuhira ibije intaro zisesa nkata agatarotaro?"

Jewe sinariko ndatahura imvo nimvano y'amarira namajambo ya Dorine nti:"Dodo oya reka kurira Mbwira neza ikibazo wagize kuko nanje naraye ndakuroteye nabi kandi nararanye ubwoba sinigeze nsinzira"

Dorine yakomeje kurira haheze akanya arihanagura aca atora terefone yanje mbona agiye muri whatsapp aca yugurura discussion ya groupe imwe nza mbona yuguruye vidéo imwe nakubise amaso mbura ayo ncira nayo mira.

Yari video yerekana Dorine ari gusa ukwo yakavutse mugitanda ntangura kwibaza ko yoba ari inkorano bakoze kugira bamutyoze ariko nkibaza umuntu yoba amwanka gushika kururwo rugero ndabura nikwo kuca ndamubaza nti:"Ariko nizere ko iyi vidéo arinkorano Dodo?"

Nawe ati:"Iyo biba nivyo!"

Jewe ntangaye nti:"None ibi vyagenze gute?"

Ataratangura kuvuga nabonye umwango usubira kuvuga twese tumanza turahora turavye tuca tubona ni Charlene, harukuntu

baje muhira barangurura mucumba kuko bari bahamenyereye rero baje barisanzura.

Charlene yaje amakuru yayaronse ntiyiriwe aravuga vyinshi ahubwo yicaye iruhande yifata kwitama maze Dorine aravuga ati:"Nishinze kunywa Champagne none irankojeje ibara ndiko ndiyumvira aho nzosubira guca muhira hoho baranyica abavyeyi bakabiri Imana yampaye ndabateje icyeyi nukuri"

Dorine yari impfuvyi yatoye ubwenge yisanga mwirerero ry'impfuvyi maze igihe kiragera umuryango umwe warumaze imyaka cumi utararonka ikibondo nibwo wigira inama yo kurera umwana bakuye mwirerero arikwo Dorine yisanze muruwo muryango ataco ubuze.

Yabandaniye yidoga ati:"Ndibuka igihe kimwe nkiri mwirerero nasenze nsaba Imana ko niyampa abavyeyi nkiri muto ntazokura ngo ndababere gito none uno musu ndi icyo ry'imigani ndariye abavyeyi imvi nabo batandiye imvanda, ariko Mana yanje je ndabaye uwande?"

Charlene yacyiye amufata nawe nyene ku rutugu ati:"Humura Dodo ikintu cose kibera impamvu, kandi ibihe bikomeye nivyoye birema abanyenkomezi, kurira kwiyanka no kwiheba sivyoye biza gukemura ibibazo ufise kandi ntibiza no gukuraho ingaruka z'ibikorwa vy'amahitamwo yawe, kwisi bamwe dutahura dukubiswe rero iga utahure hama ufate umwanzuro kuko uravye nabi ubuzima bwawe uriko urabwijanira mukangaratete, kandi ibi bibaye ukwo ndabibona n'imiravyo gusa inkuba ntiziraturagara ariko ni Imburi Dodo urabizi ko tugukunda rero dukundire uhinduke urekane niyo mico nkuko wabiseraniye Imana ntubere gito abaguroye ukiri muto w'umuziranenge"

Charlene yari afise impano yo guhanura ku buryo naje yavugana nkumviraho, Dodo nawe yabandanije atugira kumuriri ukwo vyagenze aho yatubwiye ko yabandanije kwiryohera nawamusore w'umuzungu twasize ariko aramufotora mu nyuma dusubira kubona yariko barasomana aho vyahavuye birangira bagiye muri hôtel maze kubwa champagne nyinshi aratakaza contrôle ariko bigaragara ko umuhungu we yari kwihangiro.

Umuhungu yamufashe amasanamu ari gusa ndetse ntiyahengeshanya kuyashira kumbuga nkoranyambaga arazunguruka aho bwakeye inkuru yakwiye hose.

Vyari ibintu bitoroshe ku mugenzi wacu ndetse no ku muryango umutunze kuko vyabaye ngombwa ko amara igihe adasohoka muhira mbere nibibazo twari dusigaje gukora ntavyo yaje gukora ibintu vyamuviriyemwo gusibira uwo mwaka.

Kevin umuhungu bari bakundanye wewe ntiyashoboye kuronka inkomezi zo kumubabarira kuko wewe yamublotse atanamwumvirije.

Nkuko umugenzi umubonera mumagorwa natwe ntitwamuteranye twamuguyeko mbere turamufasha gusaba ikigongwa abavyeyi kuko bahatswe kumwirukana ariko turapfukamana nawe turatakamba maze nkuko umuvyeyi yama arumuvyeyi imbabazi zama hafi baramubabarira ubuzima burakomeza.

Ku ruhande rumwe narabishimye kuko vyaramwigishije ndetse arahinduka kuburyo butangaje igihe nticatevye kugera maze gahunda yacu turayipanga aho isango wari ku musi ukurikira.

Agace 9

Gahunda ntayindi yari imwe twigera gupanga turiko turategura ikibazo yo kuzodugana na Charlene iwabo kumaryo imisi y'akaruhuko nkuko twari twarabimwemereye.

Uwo musu bwaca tuduga twategewe kuzinduka kubw'ukwo urugendo rurururwategewe kuza kumara amasaha munani maze nanje ndara ntekeye.

Ariko nkiriko ndatekera naguye kuri album y'amafoto yacu tukiri abana jewe na Gaël maze nisanga nasubiye kuyaraba nca nsubira kwibuka wa musu nari ntahanye na Papa agenda arambwira gutomboza ikintu cabaye nkananirwa ko maze kumusoma naciye ndamubwira nti:"Rero Mbwira Papa none amande sinayatanze!"

Papa yaciye atwenga ati:"Hahaha ntivyokunda!"

Jewe nca mera nkuwushavuye nti:"Papa wambwiye ko kubesha ar'icaha?"

Papa ati:"Ego ariko je sinakubeshe ariko we tenyenya gatoyi nshaka kugutangaza!"

Nubwo nari nkiri muto narabonye ko inzira twahora dufata atariyo twafashe maze nuhweje neza mbona dushitse ahantu ku bitaro nanje nk'umwana uwari wese ntangura kugira ubwoba mbaza Papa nti:"Papa uranzanye bantere igishinge?"

Papa ati:"Oya mwana! We bogutera igishinge kuberiki? Ahubwo ingo ico ndakwereka"

Natanguye gukunjira isura ndetse birangira nanse kuva mumodoka nubwo Papa yakomeza kumpendahenda ariko ndamubera ibamba.

Kubw'amahirwe nabonye Tante Catherine aje kandi naramukunda cane nca ndungurura niruka kumuyambira nawe acaranterura aranzungurutsa nkukwo yakunda kubikora nanje nca ndahumiriza kubera ibizunguzungu nasubiye guhumura mbona twashitse mu cumba kimwe naravye mbona kirimwo abantu mbere Mama aryamyeye nca ndakangukwa nti:"Maman wabaye iki?"

Maman aho yararyamyeye naramwegereye nca mbona ariko yonsa akana nza numva Papa aravuze ati:"Tadaaaa! Surprise! Kessy wabonye ko waronse musazaweee!"

Kuvyukuri nubwo nari nkiri muto narinryohewe no kubona ndonse umwana tuzoza turakina kubera narakunda kubaza Maman ryari azozana akana.

Nanje nakimeje kuraba ayo mafoto twifotoje mu buto bwacu jewe na Gaël maze nsubira gutembera muri kahise ari nakwo numva nkumbuye vya bihe, vya bihe jewe na Gaël tutavana, vya bihe dusohotse ishure atakindi ciyumviro canca mumutwe uretse kwiruka ngana kumuryango wishure yigako maze nkamufata ukuboko kugira ntituzimirane ngo Papa atubure aje kudutora.

Nasubiye gukumbura vya bihe umuhungu twigana yanyirukako agomba kunkubita ariko Gaël akangwanira akanesha uwo muhungu kuburyo abahungu bose bahora bampohotera atanumwe yasubiye kunyegera kuko nabakangisha ko mpamagara musazanje abereke.

Nisanze amarangamutima atanguye kuduga kuburyo habuze gato ngo amosozi akoroke ngira amahirwe ku mwango nca numva uwudodoye nca ndiyegeranya ndanihanagura nca ndavuga nti:"Oui"

Yari Papa aca arinjira yitegereza isakoshi yari kugitanda numva arambajije ati:"Hmm! Iyo sakoshi nahe ga Kessy?"

Jewe nti:"Papa uza wibagiye mundwiheze ko nakumenyesheje ivy'urugendo nzofata ejo kuwagatanu?"

Papa ati:"Ah sigaho sigaho kibondo imyaka n'imyitwarariko y'ivyu'ubu buzima vyonyene biratuma uta umutwe ukaniyibagira imyaka n'ubusaza navyo bitaritamwo!"

Jewe ntwenga nti:"hhhh birumvikana Papa"

Papa nawe nyene yegereye kugitanda maze acatora ya Album atangura kuraba maze aca yicara kugitanda nanje ndamwicara iruhande aho wabona ko nawe yishimiye kuziraba kuko ntiyahengeshanya kunyibutsa ibihe bitandukanye twaba tugezemwo igihe ayo mafoto yafatwa.

Haheze akanya atawuvugisha uwundi Papa yarambwiye ati:"Mwananje niwaba umuvyeyi uzokwirinde gukora amakosa nkayo twakoze!"

Jewe nti:"Amakosa ayahe ko je ataco ndabagayira mwatubereye kandi n'ubu mukiriko abavyeyi neza?"

Papa ati:"Oya kibondo! Nivyo twarabahaye buri kimwe mu bifadika ariko tubima umwanya twitwaje ngo turiko twiruka n'amafaranga! Rero niwaba umuvyeyi uzohe umwanya umwana nkuko kera bavuga ngo indero y'umwana ibazwa nyina ariko je ndavuga nti indero y'umwana ibazwa abavyeyi kuko umwe wese afise uruhara rudasanze mu ndero y'abana!

Ikosa twakoze twizere abakozi bo mu nzu ngo baraturereye abana ariko tukirengagiza ko benshi muri bo baza kurondera amafaranga kubera bananiranye iwabo bagata bakomoka hama

natwe tukaca tubaragiza indero y'abana umugisha n'inshingano Imana iba yadusangije.

Ariko rega ibintu bipfa kare! Ubwenge noneho buza inyuma ya iyo mbimenya!"

Papa yaciye ahaguruka aragenda nsigara ndiyumvira kurayo majambo nigituma Papa ahereje kuri iyo mbimenya kuburyo namwitegereje neza nkabona ko afise ukwicuza kudasanzwe ntangura kwibaza ko hoba hariho ikindi ikintu ntazi yoba atarambwira ariko numva noreka kubitebako kugira ntibihave bimbuza gusinzira ngo kumusi ukurikira nzosinzirire mumodoka kandi nkeneye kuzogenda ndirabira imisozi amashamba n'ibiyaya bitatse igihugu cacu naburya ryari iryambere nduze ruguru.

Ariko ntararyama nabonye ku gitanda ingondo ya Papa yakorotse nca ndayitora ariko kandi ntangazwa nagafoto nabonye karimwo kariko umukobwa nitegereje yagomba gusa na Charlene ariko nkabona ako gafoto karashaje biboneka ko arakakera cane nyoberwa nyeneko ariko ndeka kubitebako gusa mvuga nti:"Umusi umwe nzobimubaza" nca ndagenda kucumba ciwe ndadodora ndayimuha nca ndagaruka mucumba.

Narasenze ndaryama maze nsubira kwumva ikengeri ya terefone nari nashizemwo yo kunkangura isaha cumi na zibiri zigitondo zigeze nca ndatangura kwitegura ndanywa nicayi mpejeje numvise imodoka ivuza amahoni nsohotse ntangazwa no gusanga ari Papa nsohotse acambwira ati:"Ingo sha ndagushikane ku gituro c'imiduga"

Nafashe terefone nterefona Dorine na Charlene bese bavuga ko bamaze gushikayo namaticket bamaze kuyatabuza barindiye

jewe nimodoka ko yanduruka maze nca nurira imodoka Papa anshikanayo aca arabaramutsa maze acarabaza Charlene ati:"Harya iwanyu ni hehe?"

Charlene yamubwiye intara komine zone n'umutumba yaho avuka mbona Papa arakangutswe mbere...

Agace 10

Papa yatanguye kumubaza ati: "Uri mwene nde harya?"

Charlene atwenga ati: "Ariko Papa Kessy aho rero wibaza ko wobamenya?"

Papa ati: "Oya pfa kumbwira"

Charlene ati: "Mwene Kizimba"

Papa yaramwitegereje cane ati: "Kandi sha nkabona umenga usa...oya nako mugire urugendo rwiza mujane n'Imana"

Yaranyegeye aransezera aca yurira imodoka dusigarana turabana na Charlene twe tuzazaniwe Charlene ati: "Kessy Papa wawe arayobeye!"

Jewe nti: "Sigaho wamuntu we nanje numirwa ukwo bukeye ukwo bwije"

Dorine yaciye avuga ati: "Basha twurire imodoka ngiyi iraje Jewe nkeneye kwicara kwidirisha kuko ndakarirwa ningendo zirezire"

Twaruriye amasakoshi turayarera kuko ntiyararemeye cane ku buryo twari kwirirwa turayashira ahagenewe imizigo, maze tururira twicara mubibanza bitatu vyari hamwe Dorine turamureka yicara kwidirisha.

Muminota mikeyi ingenzi zabandanije zurira iba iruzuye shoferi na convoyeri nabo barurira umwango barashirako imodoka iba irandurutse mukanya gatoyi tuba turasohotse igisagara nanje nkanura maremare ngenda ndihweza mbazagiza Charlene ahantu hose twaba tugeze uretse ko rimwe na rimwe nawe nyene yahayoberwa ariko abandi baba bari mumodoka baramufasha.

Nisanze meze nkawamwana aguma abazagiza utubazo aho abantu baguma bantagarira ndavuga bagahindukira kundaba batwenga nanje nkabihorera kuko icangombwa n'uko nari nezererewe urugendo nari mfashe.

Dorine wewe ntivyamworoheye kuko twapfuye gusohoka igisagara atangura guhagurwa Imana yose twagize nuko twari twitwaje ubusashe maze burukwo yahagurwa yikora kugasashe agaciramwo canke akarukamwo kuburyo twagize ubwoba turateba turasaba shoferi guhagarara ndetse nabandi bari mu imodoka baradufasha gusaba aratwemerera Dorine arasohoka turamara nkikiringo ciminota cumi nitanu ariko arasama akayaga.

Hanyuma turabandanya urugendo rwabaye rurerure kuburyo twashitse duharuye adusanga twamaze amasaha atandatu mu nzira ndibuka ko twururutse tugihageze imbere yimodoka hari umwe mû bagore yadusanze aho duhagaze araturamutse aca akwega ukuboko Dorine baja kuruhande sinzi ivyo bavuganye Dorine aca araza adusanga aho ari ahoze cane natwe twirinda kutuvugisha vyinshi kuko twari tubizi ko arushe kuturusha naburya urugendo rutari rwamworoheje na bukebuke.

Haheze akanya wamugore yaragarutse aca amupfumbatisha ikintu cari kizingiye mugipapuro maze Dorine aca arabika mwisakoshi atatweretse jewe nsanga namubajije nti:"Dodo utwo nuduki shahu ko unyegeje utatweretse?"

Charlene nawe ati:"Ngira nutwunzango twabakuze?"

Jewe nasanze natwenze nti:"Iki? Utwunzango natwo nuduki?"

Dorine yaciye atubwira ati:"Basha tuve kwirizuba ndasavye hama ibindi ndaza kubibabwira ninamera neza"

Charlene yaciye atambuka maze natwe turamukurikira aho twashitse imbere gatoyi tubona urutavanako rwamamoto aguma atuzunguruka bese basiganirwa kutubaza icyo twajye maze kubera twese tutari twamenyereye Charlene niwe yavuganye nabamotari maze bumvikanye tururira nabo baziha umuriro ariho nabonye ko ruguru batari kunyonga buke buke kuko twashitse ibitugu vya motari vyakomereye amakofi namuha ndamubaza gutwara cane.

Ndavyibuko twashitse nkumva motari ati:"Nizere ko urarenzako niporo kumakofi ningumu ngye ndarya utobeshera abatimbo b'igiheta"

Jewe ntwenga nca ndimyoza gatoyi nti:"Ahubwo urasara emwe ntanucasha untorako kukuntu ubuzima bwanje wabushize mukangaratete"

Motari nawe ati:"Oya sha raba umpe nindege canke ingazi?"

Jewe nti:"Mbega ivyovyho vyindege ningazi nibiki?"

Charlene yaciye aza ati:"Sha Kessy rekana n'uwo musazi twigire"

Motari yaciye avugaga ati:"Uvuze rwike ga Mpundu? Uribagiye ko ariye nahora ndagucapira tukiciga muwagatanu?"

Charlene ati:"Nanje uribagiye ko nahora ndakuzanira ibigori? Harya nyene twaravanyeko"

Charlene yabahaye amahera maze bakata bagenda baravugaga amajambo menshi aho vyagaragara ko bari bamenyeranye acatubwira ati:"Abo bese rega nabaha mukarere twariganye baca baraheba"

Nanje nti:"Bagiye kwicira amahera sha araryoshe"

Charlene nawe ati:"Nanje Basha sinabarengeje iporo"

Jewe nasubiye gutwenga nti:"Ariko namwe muragira imvugo mugakavya none nkubu uvuze iporo ubuvuze iki?"

Charlene ati:"Hhhh iporo nibihumbi bitanu"

Jewe nti:"numvise avuga n'ingazi?"

Nawe ati:"Ingazi namajana atanu"

Twavugana tuduga mukayira kaca mubitoki aho Charlene yaciye atubwira ati:"Karibu rero iwacu turashitse"

Twaserukiye ku nzu imwe yari ikikujwe n'imirima y'ibitoki n'ibigori n'ibindi ntashoboye kumenya ntangazwa ningene nabonye urugo rwubatswe n'ibiti nisanga navuze nti:"uno umuntu yubatse urugo numuhinga?"

Charlene ati:"Hhhh ino nyene si bimwe vyiwanyu muba muri mungo zubatswe namatafari nisima Ino twikora kunsobanywa"

Jewe nti:"Insobanywa?"

Charlene ati:"Nugutora nyene agakaye nikaramu ukandika insiguro y'amajambo agoye ntakindi"

Twarashitse murugo dusaga ntagakakaza Charlene aca atubwira ati:"Mbega si mbona dushikiye kumyugariro? Usanga batarava kwitongo Muhizi nawe ataracura kuko Ubu ndazi mubiruhuko niwe acaragira inkya rero mwebwe ntanikindi muce muba muricaye ngaho kukirago manuke mumwonga ndabe ko ariyo Mama ari"

Muvyukuri n'ijambo ikirago ryari iryambere ndaryumvise ariko naciye menya ko ar'icitiranwa c'umukaze maze turicarako

ntora amazi nari nsigaranye mugacupa mba ndanywa Dorine we yaciye yiryamira kubera uburuhe batangura gusinzira.

Haciye akanya twabonye Charlene yinjiranye n'umumama ashaje bukebuke baza baravugana atubonye aca ariyamira ati:"Yooo murambabarira bibondo aha nari nagiye kubagara uduharage twanje iyo mugasumo numva ibicuro ku maso ariko binanira kwibwiriza ngo nduge none raba mwashikiye ku rwugaye ngwino duhoberane bibondo murakaza neza!"

Agace 11

Naciye mvyura Dorine turahaguruka turamuhobera numva avuze ati:"Gir'umugisha!"

Jewe nishuye nti:"Murakoze"

Charlene ati:"Sukwo bishura we zuritabira eeh gusa"

Mama Charlene yarasubiye ambwira gir'umuryango gir'incuti, gir'abuzukuru, nguma nitabiriza ukwo Charlene yari yambwiye ndetse Dorine Nawe nyene abigenza ukwo nyene Hama acaratubwira ati:"Nukwo kira amayira bibondo"

Charlene yishuye ati:"Urakoze"

Sinzukuntu nabonye Maman Charlene yaguma anyitegereza cane nza numva arambwiye ati:"Kibondo ndakuraba ukanyibutsa umuntu mperuka haciye imyaka myinshi!"

Jewe sinatahuye nakimwe nti:"Wosanga uwo muntu dufitaniye isano mu buryo ntoshobora kumenya"

Aca arugurura turinjira twicara kuntebe zari muri salon haheze akanya mbona Charlene atuzaniye ibintu vyari bimeze nkibikombe ariko vy'ibiti araduhereza ndavye indani mbona harimwo amata aca atubwira ati:"Hey iyindi insiguro y'amajambo agoyi ibi bavyita ivyansi"

Mama Charlene yaciye azana isahani yicuma yariko ibijumbu bitekanye ibishishwa ati:"Akira ndazi amazi yazindutse ageze kure kandi noneho Rugira yabanzigamiye ibarinda rwuba rwa bigata"

Charlene yaciye atwenga ati:"Mama ivyo ibintu uriko urababwira ntavyo batahura reka kubagora"

Jewe nti:"Mangwa sha Mama turabitahura ahubwo urakoze nari nshonje vyukuri"

Charlene yatweretse ingene basomeza ibijumbu n'amata maze muburyo butangaje numva biraryoshe ariko Dorine wewe haheze akanya twabonye asohoka yiruka tuca turamukurikira dusanga ivyo yaramaze kurya vyose yamaze kubidahwa ibintu vyakomeje kuduhangayikisha.

Natanguye kwibaza nimba vyukuri ari urugendo rwamugendeye nabi canke nimba atakindi ikibazo kihari haheze akanya amaze kwiugumuza amazi niho yasaba Charlene kumuzanira isakoshi yiwe aca atoramwo yabahasha yamuha wa mugore twazanana mumodoka.

Dorine yabajije Charlene ati:"Mu bwiherero ni hehe?"

Charlene yaramujanye nanje nca nsubira muri salon tuba turaganira na Mama Charlene aho naciye numva hanze umuntu aje aravuzza uruhwa avuga cane numva n'inka zabira nca ndasohoka kuraba.

Yari Muhizi musaza wa Charlene yaracuye inka aza arivuga amazina yongerako akobereza ibintu vyari biryoheye ijisho yarambonye mbona arakangutswe aca araza kundamutsa nti:"Ni Muhizi ndibaza?"

Nawe ati:"Ego nawe ngereraniye urashobora kuba uri Kessy canke Dorine? Igihe duherukira kuvugana na Mpundu yarambwiye ko yaronse abagenzi babiri bitwa ukwo nyene rero ntaneka urumwe muribo"

Jewe numvise binkoze ku mutima ubwa mbere ingene Charlene yatuyagiye umuryango wiwe imbere y'ukwo tuza ubwakabiri ingene Muhizi yabizirikanye ntiyibagira amazina yacu ndetse

ningene yaciye atangura kunganiriza ubona ko kunganiriza abantu atakibazo abifisemwo.

Muhizi ati:"Nari mfise igishika cinshi co kubabona umusi atubwira ko muzozanana n'agira ariko arabesha ariko kandi nciye mbona ikindi ikintu atambesheko"

Jewe numvise ngize amatsiko nti:"Ikintu ca gute?"

Nawe ati:"Sivy'imbeshere kubaraba gusa biragaragara ko mwakuze mû buzima babafata nkamata y'abashitsi"

Jewe ntwenze nti:"Ushatse kuvuga amwe Chacha nako Mpundu ahejeje kuduha?"

Nawe ati:"Hhhh nshatse kuvuga ko mwakuriye mu kizungu ahubwo Dorine nawe arihe?"

Jewe nti:"Dorine arindani gusa ntameze neza urugendo rwamuruhishije cane"

Nawe ati:"Yooo disi umwana w'abandi! Karibu kandi iwacu hatandukanue kure cane n'iwanyu nanje ngira ndabe ncanirire ubu butunzi bwacu mukanya nkame ndazi ntiwari bwabone ingene bakama"

Naciye ngumana na Muhizi aguma anyereka yongera ansigurira ibintu bitandukanye bijanye n'inka kuburyo nisanze natanguye kumenyera kuba mu nka ntazitinya no gukama ndagerageza.

Mu nyuma twarinjiye twicara muri ruganiriro turindiye ko ivyo mwijoro bisha kuko Charlene yari yanse ko ngenda kumufasha guteka tuca tuba turaganirira nabarumuna biwe muri Salon aho hageze igihe Maman wa Charlene yaciye atubwira ati:"Ndabacire umugani kugira amasaha abe aragenda ntimusinziye bidahiye ngo muburare kandi kwa Kizimba Imana

yatwimye ibikwegana ariko iturinda kubura ico turaza mugashishito"

Twese twazugije imitwe twemera na cane cane jewe ntari bwumve umugani maze amatwi ndayatega aratangura ati:

"Harabaye igihe kimwe ijoro n'umutaga vyarahuye bitangura guharira bipfa umukuru murivyo, umutaga uratangura n'ubwishime bwinshi uti:" Nankana nije ndi mukuru ehe raba isi yose ndaseruka igasohoka maze igasohora amasuka amasoko akarema imirimo igakorwa! Muyandi majambo Iyo ntabaho n'isi nyiyari kubaho"

Ijoro ryarihweje umutaga ingene wishira hejuru hanyuma umara umwanya uhoze inyuma yakanya uti:"Ntiwabeshe uraseruka bagasohoka ariko wibuke ko urenga bakirihutsa! Nsubiza hamwe abo watandukanije ubajana mumiraho nkabakoraniriza mumuryango bagatera ryarenga inanga zikavuzwa ibitito n'imigani bikumvirizwa! Nimba atavyo waruzi n'Imana mugutanga ibibondo irindira jewe!"

Bigiharira hari uwaje yitambika hagati murivyo ati:"Bangwe bangwe ahari abagabo ntiharwa ibara mwipfa ubusa kuko mwese muri bene umugabo umwe! Muri amahasa ariko nta butoyi nta nukuri kuko nabavyariye rimwe kandi mwese muriho kugira muryoshe ubuzima"

Mama Charlene yaciye aturaba ati:"Ndabapfinze uwo yaje kubanguranya yoba arinde? Uwugitora ndamuha ikintu"

Muhizi yaciye yitanganiza ati:"Aaaah ikibazo c'abana reka kwanza manze ndabareke bishure jewe ndaherezaa kuko nseruka inyuma ariko nsinsubizwa inyuma"

Jewe ntwenga nti:"ego kueli urumva ingene wiyemera? Nanje dupinge ukagitora ndaguha ikintu"

Muhizi ati:"Ico ntanikindi umuvyeyi wijoro numutaga ni ubwirakabiri"

Mama Charlene ati:"Ihibambewe ikibazo cagutaye kuwamazi kandi kikabananira mwese muzoba mumaramaje"

Sinzi ukuntu niyumviye numva ikinemwo nca ndavuga nti:"Nibaza ko umuvyeyi w'umurango n'ijoro ari Ibihe"

Mama charlene yaciye akura akabangiri yari yambaye kukuboko aca arakanyambika ati:"Aho kibondo Ibihe niwe muvyeyi w'ijoro n'umutaga rero yaba ijoro y'aba umutaga vyose namahasa kandi ntihazogire nakimwe kigutera ubwoba canke nguhurumbire kimwe kuko Iteka vyose bizohora bikirakuranwa harigihe uzobona umenga ijoro ryabaye rirerire nikindi igihe umurango wawe uzokubera umwaka ariko uze wame wibuka kari amahasa yibihe ata bukuru ata butoyi yose abereyeho kugira ibihe, ibihe bimwe biha ibindi, ibihe bimwe bigize ubuzima...

Agace 12

Yambwiye ayo majambo numva nasubiye gutakara ariko ntaraja kure Chacha yaciye azana imfungurwa ashira kumeza aca agenda guhamagara Dorine kuko wewe yari yabaye araryama ariko birangira nubundi ataje ku meza tuca turafungura duhejeje turagenda kuryama.

Natangajwe no gusanga yicaye hasi ariko ararira ndakangukwa nikwo kumwegera ndamubaza nti:"Dodo nibiki? Wabayiki kuriko urarira? Wahavuye uremba?"

Dorine yaciye atora akantu arampereza kari kameze ukuntu ntashoboye kumenya nca ndamubaza nti:"None aka nagaki?"

Dorine ati:"Ntaturongo tubiri ubonako?"

Jewe nti:"Ndatubona ariko sintahura impamvu uriko urarira"

Charlene yaciye yinjira ashika ambwira ati:"Kessy iyi ni test de grossesse urinze ubonako uturongo tubiri nuko uba ufise inda"

Ku vyukuri inkuru yo kwumva ko Dorine afise inda yaraduciye ivutu twese dutangura kwibaza ibigiye gukurikira nikwo kica ndamubaza nti:"None Dorine ninde yayiguteye?"

Dorine ati:"Ico mutamenye nukwo muri rya joro wa muzungu atatahiye kumfotora gusa ariko munyuma yankangishije imbugita maze aranshurashuza kunguvu rero nari naratinye kubibabwira sinarinzi ko munda yanje yatayemwo akabuto kabandanije kankuriramwo! Ariko Mana yanje kuberiki ari jewe bibayeko? Kuberiki nukuri! Mbaye uwande?"

Yabandanije yidodomba nanje nca nibuka za ndoto namurotera ko zari zifise insobanuro ndetse ko iyo ntavyuka ngo ndamusengera zari gihava ziba impamo inkota bakayimosogota

nkuko nari navyeretswe ariko niyumvisha ko kuba bitabaye Imana yakinze akaboko atakabuza.

Iryo joro twasinziriye bigoranye kuburyo twanavyutse bwakeye kera aho vyacye biba ngombwa ko dusibira umusi umwe umusi ukurikira twagomba gusubira i Bujumbura kubwa Dorine nubwo twese twiyumvira ingene azohinguka imbere y'abavyeyi biwe maze akabaha inkuru twese tuzi ko umuvyeyi afise umwana w'umukobwa aba ahora ku mavi asaba Imana ngo ize imurinde kuyumva.

Ariko murico igihe ntakindi cari gisigaye uretse kwemera ingaruka zivyo tudashoboye guhindura ndetse dusezeranya Dorine kuzomuba hafi muburyo bwose tuzoshobora.

Ndibuka ko ku musi ukurikira twiteguye tugatekere hanyuma bakaduherekeza aho Maman Charlene yatwikebukanije twe na Dorine aratubwira ati:"Muhumure! Ivyabaye ntibibatere kwiyanika no kwiheba! Ndabizi iki gihe sico twari witezemwo kuba umuvyeyi kibondo kuko nawe warugikeneye kurerwa ariko ukwo zivugijwe nikwo zitambwa"

Jewe batanguye guhindukira ndaba Charlene aho yarahageze nzunza umutwe kuko nibaza ko ariwe yoba yabibwiye Maman wiwe ariko acarabandanya ati:"Ndumuvyeyi sinkeneye kumanza kubibwirwa kuko aho nahacye incuro irenze imwe! Gusa icyo nobabwira nukwo mfise ibicuro ko uyu mwana ari munda azohoza amarira yabenshi! Kibondo niwarira ugahogora uzomenye ko Imana iguhaye uwuzoyaguhoza yose kandi igihe uzomuraba ntuzomurabe nkisanganya ariko uzomurabe nkingabire wahawe utiteze kandi uyihabwa utabikwiriye kuko kwisi haringumba vyinshi zisenga ijoro n'umutaga zipfuza iyi ngabire wagabiwe na Rurema!"

Vyukuri yatubwiye amajambo yadukomeje kuburyo Dorine yaciye aturika ararira acaramuhobera umwanya utarimuto yongera amushimira inyuma yakanya Papa na Mama Charlene barasubiye inyuma Maze Charlene abandanya aduherekeza gushika kuri Parking nca ndagerageza kuvuga ibindi nti:"Chacha akaryoshe ntigahora mwitama nari numva nishakira kuhaguma"

Dorine atwenga ati:"hhhh noneho ubu warabonye inzira ubukurikira uzokwigarukana"

Charlene ati:"Hhhh itwengere! Ndi sûre ko atibuka nintara twacyiyemwo na kwakwibagira kwa Kessy!"

Dorine ati:"Urazi ingene yari yarengeje induru abantu muri bus abazagizaaa atametero twamuterana"

Jewe ntwenga nti:"Hhhh sha namwe nimureke kunyinjirira rero gusa nzohakumbura nukuri"

Twagiye turatera inkuru gushika kuri Parking munyuma Charlene aradusezera twuriye imodoka inyuma yiminota mike turafata urugendo dusubira ibujumbura aho Dorine yaciye asinzira vyagaragara ko yari yaraye adasinziriye uretse ko nanje ryantwaye nsubira kuzazamuka nsahutse ntazi iyo tugeze nahakuwe numudamu yari yiweye iruhande yacu yabibonye aca aramfata ati:"Mpore mpore mwana subiza umutima munda agatiro kari kakwivye hhhh"

Jewe naciye ntwenga nti:"Hhhh Yesu we ndateye isoni aha nari ntanguye kwibaza Iyo ndi"

Nawe ati:"Hhhh nanje nabibona nca ndatabara ahubwo urampemba"

Jewe ntwenga nti:"Shahu ngaha wakoreye ubushake ntampembo noguha uretse kugushimira mvuga ko wakoze kumbera maso igihe ayanje yari yahumye"

Nawe ati:"Rega nubundi ntampembo iruta umutima ushima ineza wakorewe kuko ibisigaye nibishira"

Yaciye araba Dorine numva aravuze ati:"Mwasanze bimeze gute uyo mugenzi wawe"

Jewe narakangutswe nca ndahindukira ndamwihweza neza haheze akanya nca ndamwibuka nti:"Yoooh kandi niwewe twazananye hirya yejo"

Nawe ati:"Nabibonye kutari wanyibutse ariko je nababonye nca ndabibuka ahubwo wa mukobwa wundi arihehe?"

Jewe nti:"Urya yasigaye kubera aha nimuhira iwabo twari twaje kumuramutsa"

Nawe ati:"None ko mwihuse gusubira inyuma?"

Nanje naciye ndamwongorera mugutwi nti:"Twasanze ari positif"

Nawe ati:"Yooo pole sana ariko ntanakimwe ivyo nibisanzwe"

Jewe nti:"Niyo mpamvu rero duciye dusubira inyuma twihuse kuko ubundi muri gahunda twari abohamaze indwi zibiri"

Twabandanije tunganira nuwo mudamu naje kumenya ko asanzwe arumuforoma akora kwivuriro rimwe ngaha mugisagara maze aza arantero inkuru zitandukanye gushika igihe Dorine yikanguriye yumvise ijwi ryuwo mudamu nawe nyene arikanga umudamu acaramwitanga ati:"Bwakeyeee! Ndabona weho ijoro ryabaye rirerireee"

Umudamu twaciye dukaba ibibanza aca yegera Dorine baca bagenda baraganira nanje nca ndegamira nsubira kwiyumvira kubihe zitandukanye twari tumaze gucamwo gushika kuruwo mwanya ntangura kubona ko vyukuri kwisi atamuhinga.

Urabona uvyutse ariko ntushobora kumenya Iyo bwira ugeze, Dorine kumusi wimbere yaho yari yavyutse azi ko arinkumi muzindi ndetse ateganya ubuzima nkinkumi ariko rirenga yakiye ko buca kabiri akaba umuvyeyi.

Nasubiye kwibuka ibihe ingene bihinduka bidateguje rimwe vyahindukirira aho twipfuza tukarira amosozi yumunezero vyahindukirira aho tutipfuza tukarira ayumubabaro.

Vyukuri ibihe ni ijambo nama niyumvira nkasanga naritevyeko...

Agace 13

Urugendo rwabaye rurerure aho nanje agatiro kasubiye kunyiba ndetse hoho nasubiye kwikangura wamudamu ankanguye akambwira ko twashitse kandi koko nitegereje mbona ingenzi zindi ziriko zirururuka nanje nca ndatora isakoshi yanje niya Dorine maze tururuka.

Dushitse hanze umudamu yavuze ati:"Mubona gute none twicaye ahantu tukivuna inyota ninzara ko amasaha mumodoka yabaye menshi namazi yazindutse ageze kure?"

Dorine yaciye avuga ati:"Merci sha Jackie nukuri vyarivyo ariko numva ndushe cane nkeneye kuja kwoga nkaruhuka hama nkiga ingene ndabamenyesha inkuru Ntazi ukwo baza kuyakira"

Kumbe umudamu naciye menya ko burya bwose yitwa Jackie bashobora kuba bidondoranye nasinziriye aca yongeramwo ati:"Sha nivyo reka tugende turuhuke inimeru zanje nizo hagize ikibazo ugira ntuzohengeshanye kumbwira"

Yaradusezeye nsigarana na Dorine nca ndamubaza nti:"Dodo reka manze ndagushikane muhira shahu"

Dorine ati:"Hhhh Aaah Kessy ushaka ntangure kwibebeza rega ninda yukwezi kimwe"

Jewe nti:"Shahu nyene ngomba kukwitaho sije mbere nzobona akabebe karavutse uzocukangabira"

Dorine ati:"Hhhh mbe we warasaze! Aho rero nari nzi ngo care zawe nizagusa kumbe nzoziriha umwana"

Jewe nti:"Nyeneeee iwanje ntavyagusa"

Dorine yaciye ambwira ati:"Sha we nokwishinga wohava umvuna imbavu nzozikenera mugutera ufise reka ndakubise"

Jewe nti:"Sawa basi ariko wiyiteho kandi nze kuba uwambere menya ukwo vyagenze ndasavye"

Dorine ati:"Nimwe ncuti magara mfise reka kwigira gugu urabizi"

Naciye ntwenga nca ndamuhobera umwe wese aca afata bus imujana mwiqumbaraga yabamwo.

Nashitse muhira nsangaho Maman ambonye arikanga ati:"Kessy? Kugarutse ningoga!"

Jewe nti:"Maman noneho ndumva ko utari unkumbuye ntiwashaka ko ngaruka"

Maman ati:"Reka kuvuga nabi chéri ntakumbuye umukobwa wanje noca nkumbura nde rero!"

Jewe nanje nti:"Nanje nobibaza wewe!"

Maman ati:"Sha ngwino umpobere nari ndagukumbuye"

Naramuhobeye Maman ndetse ntangazwa nukungene yariko aranyitaho kuko sinari ndabimuziko nca ndamubaza nti:"Maman n'impore?"

Maman numvise yiruhutsa ati:"kuberiki umbajije ga mukobwa wanje?"

Jewe nti:"Sinzi impamvu numva umenga haricahindutse"

Maman acambwira ati:"Rega mwananje ikintu kidahinduka ni ihinduka ryonyene kuko rihoraho, ahari ibihe bihinduka ntihobura nabantu bahinduka"

Jewe numvise nikanze nti:"None hahindutse ibihe ibihe ga maa?"

Nawe ati:"Oya ntakidasanzwe chéri genda umanze woge uruhuke ibindi tuzoza turabivugana bukebuke ndazi umwanya wo kuvugana ubu ugiye kuboneka"

Numvise ngize amatsiko adasanzwe ntangura kwibaza impamvu iriko iratera Maman kwitwara murubwo buryo ndavuga nti:"ukwo biri kwose naho Ntazi impamvu ariko biranryoheye kubona Maman angirira igishika"

Maman yarumuntu nakuze dukunda gushwana dupfa ubusa, yarumuntu yashika muhira nkitegurira gushwana kuko ashitse naba nzi ko agomba atangure kunegura ibintu vyose no kudutukagurira buri kamwe yabona.

Ndibuka igihe kimwe nari mbabaye aho namubaza nti:"Maman burya wewe uradukunda?"

Nawe ati:"Ndabakunda nyene nkanka amakosa yanyu"

Jewe nti:"None bigenda gute ko buri gihe ibitagenda neza arivyo ubona gusa ndetse buri kantu kakubera impamvu yo kuturya umutima? None nkubu tubanye uku turabana bawe ubona uwokuzanira impfuvyi ngo uyirere itota ikomoka"

Ico gihe sinzi Iyo nakuye inguvu zo kumubwira ukwo ariko ndibuka ko uwo musu yamaze igihe atamvugisha nanje ndamwihoza kandi koko nkuko babivuze ingeso iraraba ntihwera inyuma yigihe yarasubiye ndateba ndamutunga ukwo kuko umuvyeyi aguma arumuvyeyi umwe bita akabura ntikaboneke.

Naragiye mucumba nshikira muri douche mpejeje nca nirambika kugitanda maze niho naciye numvira vyukuri ko nari

ndushe maze naciye nsizira nasubiye gukangurwa na terefone isonye aho naravye nsanga iravuyeko ariko ndavye nsangamwo appels manqué zitatu za Charlene nimwe y'a Dorine maze nca ndamaza mpamagara Charlene nti:"Sha sorry cane nukuri nashitse nahwereye nabaye bwirambike ubwenge busubiye kugaruka Ubu nyene tuvugana"

Charlene ati:"Basi wewe itiro ntiryagukoye rikakurongora ahubwo ngira mufitanye umwana sigusa"

Jewe nti:"Hhhh nyene jewe itiro turiyubakiye rukirisu ariko twashitse neza sha kandi merci kuduhangayikira nayubundi nibaza ko inkuru mbi iranyaruka yari kuba yagusanze kera"

Nawe ati:"Reka sha naciye nterefona Dorine yaciye ambwira hari hasigaye wewe ko uncomfirma rero Ubu bye ngira nigumure kuko ntakuntu mwonyihoza bigeze hiyo"

Jewe nti:"Chacha reka ivyo ibintu sha urazi ko ndagukunda caneee"

Nawe ati:"Hmmm suko baturya"

Twabandanije tunganira na Charlene gushika phone yikufye nca ngerageza guhamagara Dorine ariko numva ntiyitavye nca ndavyuka ngenda muri salon natsa télévision mba ndaraba ijoro ryari ryitereye nza mbona Gaël arinjiye sinzi iyo yaravuye ambonye candamwitanga nti:"Hey bro vipi?"

Yaciye atwenga ati:"Hhhh aho rero ugomba wigire umubile ko nzi we izo mvugo atari rwawe"

Nanje nti:"Rega baca umugani mukirundi ngo uwushaka inka aryama nkayo"

Nawe ati:"Noneho ndumva imisi ibiri umaze ruguru ugarutse uvugira mumigani gusa ndagowe noneho karabaye"

Nanje nti:"Eeeeh ahubwo uwokujanayo niho hokumara amanyama"

Nawe ati:"Ntivyokunda notuma ngaruka namaguru"

Nanje nti:"Ahubwo hariho inkuru tutavuganyeko ntubone ntashotse ndakubaza narindindiye kukuronka akaryo rero naka nkeneye unsibanurire"

Nawe nabonye ahaguruka ati:"Birya vyikaushe ufate ko utambonye kwanza nanje sinakubonye kandi iki kiganiro kigarukiye a-ha"

Yaciye ahaguruka ndamuhamagara aranka nca nsigara je nyene nsigara numiwe.

Agace 14

Gaël yaragiye nsigara muri salon je nyene gushika mbonye amasaha agiye numva ndashonje ndahaguruka ndagenda guhamagara Gaël ngo aze dusangire aranka bica biba ngombwa ko nisangiza ariko nkiriko ndafungura nabonye Maman ava mucumba aza kumeza ashika yicara ndikanga nti:"Eeeh Maman wari ngaha?"

Maman yaciye atwenga bukebuke ati:"None ko bigutangaje ahubwo nyarurira dusangire canke ushaka kwikorana sha?"

Naruriye Maman turasangira nshishika kumubwira ingene ndiko ndatangazwa n'ihinduka giturumbuka niho na Papa yateba akaza adusanga ku meza haheze akanya numva Maman avuze ati:"Gaël nawe ari he ko harikintu nshaka kubabwira mwese?"

Numvise ngize amatsiko nca mvuga nti:"Ari mucumba!"

Papa yaciye ahaguruka agenda ashika akubita kumwango cane ati:"Ubwo bugesera buriyugarana harikindi atari ibiyayura mutwe kaba karimwo cira ngaha ubunyene"

Haheze akanya nabonye Papa aza arakwega amatwi Gaël yongerera amutukagura ati:"Ivyo wihaye nibiki? Ubu rero wigize akagabo mu rugo ngo ntawugifise ijamba imbere yawe?"

Maman yaciye avuga ati:"Bangwe bangwe! Mumanze muntege amatwi ibindi murabibandanya munyuma canke muzosigara murabibandanya ntakihari!"

Yaravuze ukwo twese turikanga Papa ati:"Ivyuvuga nibiki Mama Kessy? Utambwira ko inyuma y'imyaka n'ivyo

twacyiyemwo wabonye uwundi ubu rero ugira utekere utwawe unsige?"

Maman ati:"Oya arukugenda kwo nagiye ntakabuza ahubwo nukuba murategura imitima"

Nabonye Papa atanguye kuduza ijwi nca ndavuga nti:"Maman reka kuduca imitima dudurirako ureke guca hirya nino kuko ngaha uriko uratudugiriza tension"

Maman yacyiye akora mwisakoshi yariteretse iruhande akuramwo impapuro zasa nizo kwamuganga arazitwereka ati:"Nari maze igihe numva akantu kakabuye ngaha mugikiriza ariko nkumva kagenda gakura ukwo bukeye ukwo bwije namaze igihe nirengagiza ariko mumisi iheze natanguye kugira ububabare budasanze niho nafata umwanzuro wo kuja kuraba umuhinga w'ivyamagara rero nari maze imisi mu bipimo aho inyishu zavyo zose zakomeje kugaragaza ko mfise cancer yo mwibere kandi yambwiye ko igeze kuri stade terminal ngo yaramaze gukwira no mumaraso ntaco bagikoze uretse ko nzofata imiti yo kugabanya ububabare no kurindira imisi isigaye kugira ndabavemwo! Rero mugabo mwiza namwe bibondo vyanje nkunda ntimugire ngo ntaye agatarotarwo kubera intaro zasheshe ariko mwumve ko nanje nkomeretse umutima kwumva ko ngiye kugenda ndabasize ntababonye mutera imbere mushika ku ndoto zanje ariko ivy'Imana ishaka nivyo vyiza.

Mboneyeho nakaryo ko kubasaba Imbabazi ku vyo ntakoze neza nkinshingano z'umuvyeyi mu rugo gushika uno musu ndabizi ko meze nkawawundi yibuka kwifuka bukeye ariko vyibura mumbabarire nabaye umuntu cane ncudika nisi maze nibagira ko kugira ubuntu arivyo bigira umuntu muzima.

Iyaba vyari bikunda ko nsubiza ibihe inyuma ndarahiye imbere y' Imana ko nokosoye amakosa menshi nakoze mu buzima uhereye ku ntango!

Papa Kessy! Umbabarire kubona naraguhatirije kungira umugore wawe kandi ndabizi neza ko warufise uwundi wihebeye wari warahaye isezerano ariko kubwo kwikunda nkina amanyanga yose kugira ndakwegukane nishimikije ubushobozi amafaranga yampaye!

Ndavyibuka umusi wa mbere ndakubona wari uje kundangurako amarangi uherekejwe na Fiancée wawe maze ndabihweza ingene mwari mwishimye munezerewe ndabagirira ishari maze nkora icaha co kwipfuza nipfuza kuba mukibanza ciwe ndetse ndabiharanira gushika ndagutandukanije nawe!

Sinokwibagira amafaranga natanze ndayaha abantu bo kumugirako itera bwoba ndamutegeka kuguheba nanje ndakwiyegereza mbere ndagusaba ko dukorana imigambi y'ubucuruzi atari iterambere ryawe nipfuza ariko ari kugira ndakwegukane.

Ndibuka igihe ndagusaba ko wokwemera ukangira umugore wawe hama tukavanga imitahe tugakorana maze bigoranye uremera.

Ikirenze ico umaze kunshikana mu rugo nakubereye umugore gito niyobagiza inshingano zanje aho kwita ku rugo ahubwo nishora mumarigala naba ndi bagore aho ububare bwose ubwo muriki gisagara atanakamwe batanzi.

Nukuri mpfukamishije amavi y'umutima aya mosozi mubona acuncubuka mwumve ko mfise ukwicuza kudasanzwee ninaco gituma nemeye kwatura ivyaha vyanje imbere y'umuryango na

mwebwe bibondo vyanje mwumvireho mumbabarire hanyuma muhakure icigwa mu buzima buri kimwe muzokora cose muzokwame mwibaza nimba ico muriko murakora arikintu kizotuma mwirata muri kazoza canke atarikizotuma mwicuza!

Ahanje ndazi amahirwe yo kwikosora ni make kuko igihe nsigaje kiraharuye ariko ndabasavye imbabazi nukuri."

Maman yahejeje kuvuga twese twarize uherye kuri Papa aho nawe nyene vyamunaniye kwifata ya mosozi y'umugabo atemba aja munda yarashotse kumatama Gaël nawe biba ukwo ndetse jeho vyari ibindi nugusevura Nariko ndasevura niho Papa yaca amwegera aramufata mu biganza aramubwira ati:

"Maman Kessy! Humura kandi wumve amahoro! Imana ntiyihenze yaduhuje kandi yo yemeye ko bigenda ukwo vyagenze kuko ukwo biri kwose irafise ivyo yatwigishije kandi hari n'ivyiza vyinshi yaduhereyemwo! Yaraduhezagiye turatera imbere turubaka turaronka n'uruvyaro! Reka nanje ahubwo mbonereho akaryo ndagushimire kubona waramvyariye abana beza kandi nkunda! Imana niyo itanga ubuzima kandi niyo ibwaka uwo ishatse kugihe ishakiye rero izo mpapuro za muganga je ntaco zimbwiye igikuru n'ukwo uhari uno musi ivyejo navyo bibara abejo hari naho nogutanga kugenda rero nturinde kuvuga nkuwuraga ahubwo ngwino umpobere ivyejo navyo tuvuyehoze kuko bibara abejo!"

Papa na Maman barahagurutse barahoberana nanje nca ndahaguruka mumarira menshi ndamuhobera ku buryo vyananiye no kuvuga uretse ko navuze bigoranye nti:"Maman ndagukunda!"

Agace 15

Twe na Gaël twaravuye ku meza umwe wese arangurura mu cumba ciwe ariko vyukuri nibaza ko iryo joro ntigeze nsinzira naraye ndarira bunkerako nkanura aho nagiye gutora itiro bwakeye nasubiye kwikangura mbona umuntu anyicaye iruhande ndakangukwa ndavye neza mbona ni Dorine aca aravuga ati:"Hmmm oya vraiment iyi détente nihere dusubire kwishure kubera nimba utanguye kwiga ingeso yo kwirirwa mu gitanda uzosubira kwishure wamaze guhimbira!"

Naramanje ndigorora ndayura numva numutwe uramenetse nca ndamubaza nti:"Ni sangapi?"

Dorine ati:"18h! Uzi ko Jérôme yambwiye ko kuva bwagaca utigeze usohoka icumba! Rega naje nkuwutabaye nzi ngo harico wabaye!"

Jewe nkangutswe nti:"Saaa! Oya uriko urambesha mpereza Iyo terefone nirabire!"

Natoye terefone yanje ndavyemwo vyukuri mbona ni saa kumi na zibiri nca ndabona ko igihe kigeze nkava muri co cumba.

Nagiye muri douche mvuyeyo nsanga muri sallon Dorine yanyaruriye acantegeka gufungura nubwo nari numva atakayabagu mfise ariko ntiyankundiye yarangobeye turasangira twongera tuganira ati:"Ubu rero karashize ingani ufungure utamitswee urinkumi yasatuye ntasoni"

Jewe ntwenga nti:"Hhhh ahubwo urampemba kuko uriko unyigirako kugaburira umwana ndazi ntahandi wari bwabikorere"

Dorine ati:"Ahubwo nyene uzi ko ejo nababwiye muhira nkatangazwa ningene bavyakiye neza?"

Jewe nti:"Yooo! Ntumbwire! Vyagenze gute?"

Nawe ati:"Hewe neza na neza Maman yansanze mucumba ndiko ndarira hanyuma mbura aho mpera ndamubwira nza numva arambwiye ati 'humura tuzomurera nakare nari nikumburiye kurera akana' hewe nabaye neza nkuwukubiswe ninkuba"

Jewe nti:"Yoo umuvyeyi nikindi kintu harya yaramaze igihe akwihweza aravyibwira"

Dorine ati:"Nanje narumiwe naciye ndamubwira vyose ukuntu vyagenze burya yaciye ambwira ahubwo nirinde stress ko aza kubivuganako na Papa rero mugatondo Papa niwe yaje kunyibwirira ntekane mugitondo aha mundwiza nzogenda muri échographie ya mbere"

Jewe nti:"Wow! Ntushobora kwibaza ingene binezereye nukuri! Ahubwo tuzojana!"

Dorine ati:"Ntakibazo ahubwo reka nterefone Chacha nawe ndamwihere amakuru nimba ntasanga yarayizimije ndanamukumbuye honyene"

Twabandanije durera inkuru na Dorine gushika amasaha agiye ndamuherekeza gushika aho yafatira Taxi, nanje nca ndasubira inyuma ntambuka buhorobuhora aho nasubije ubwenge inyuma nsubira kwiyumvira inkuru Maman yadusangije mwijoro ryari ryahise numva ndababaye ariko kandi numva ndaryohewe kubona ingene vyatumye Maman atahura amakosa yiwe ndetse akanayasabira imbabazi ariko kandi nibuka ko asigaje igihe gito numva umutima urancumise.

Nkiri murivyo nasubiye kwumva ijwi ry'umuntu avugira iruhande yanje numva umenga nijwi ry'umuntu nzi nukwo guca mpagarara nkaraba neza ariko mbona n'umuhungu ndabona neza kubera yarampaye umugongo ariko aganira nuwundi mukobwa batwenga cane.

Nageragejeje kwirengagiza ariko numva umutima ungobeye kurengana ndamuravye niho naca nkata kwibotike ngira imbombo kugira nce ndamuraba ngarutse, niho nahindukira ndalwitegereje nisanga vyukuri amatwi yanje ntiyampeze kuko namuravye nkamwibuka neza.

Yari Diego wa muhungu twahurira muri ya soirée twigera kubamwo ajejwe kwakira abantu bari bayijemwo.

Narakomeje kumuhanga amaso kuburyo naciye nibuka vyose, nibuka uguca bugufi kwiwe, nibuka ukuganiriza neza kwiwe, nibuka ingene yakingiye ikibaba Gaël aho aba Sécurité bariko baramwirukako, neza nibutse vyose kuburyo mwuwo mwanya nari numva icipfuzo ari kimwe, kumusanga nkamuramutsa nkanamushimira kuri vyose ndetse vyukuri naciye numva muri je ko nari ndamukumbuye.

Ariko harya nkicikoresha inama yingene nza kumuvugisha nongera ngira amakenga ko nshobora gusanga atakinyibuka nubwo namuraba ukuntu yatwenga nkumva biranryoheye kuguma ndamuraba nubwo mu mutima harakajwi katari keza naguma numva kambwira kati iyaba nkubu arije ariko atwengera nkukwo noba ndi umunyamugisha vyukuri.

Nasanze ndiko ndipfuza nca nibuka inkuru ya Maman ingene ukwipfuza kwiwe kwamukoresheje amakosa yicuza uno musi nca numva ntanguye kwiyanika kuko muruwo mwanya kuko

nari natanguye kwipfuzza kera mbere nca mfata umwanzuro wo guhindukira nkataha ataranambona Diego.

Nubwo namuhingishije amaso n'umutumba ariko namujanye mu ubwenge bwanje kuko narinze nshika muhira ariwe yiganziye muvyiyumviro vyanje.

Narashitse muhira nsanga Maman yicaye muri Salon tuca tuba turaganira ibintu vyari binryoheye cane natangajwe no kubona na Gaël aza akatwiyungako turakubita irigala muhira ibintu ntari bwigere mbona kuva nagakura.

Ndibuka ko uwo musu Papa nawe nyene yatashe kare kuko kare yaba Papa yaba Maman ntanumwe yataha musu y'a saayine zijoro batashe kare ariko uwo musu saa tatu zageze na Papa yamaze gushika ndibuka ko twasangiriye hamwe ivyo mwijoro ndetse Maman aranadusaba ko dusenga dufatanye amaboko imbere yuko tuja kuryama maze aradusabira umugisha yongera araduhezagira.

Ndibuka ko iryo joro nagiye kuryama numva umunezero mumutima, wa munezero ugirira ahantu ubaye ukumva ko haryoshe kuburyo naciye ntangura kubona igicapo c'umuryango nipfuzza kuzogira muri kazoza naho ntari bwabone umuhungu tuzokwukana.

Sukuvuga ko atabahungu bandondera kandi sinababenga bose ariko gushika kuruwo musu ntamuhungu twari bwahure ngo numve ndavuye muvyo ndimwo hahandi nabona abandi bakobwa bakunze bagashuha kuburyo bibananira kugira ibanga.

Sinzi ko yari amahirwe make canke igihe kitari bwagere ariko abahungu bose nari maze guha amahirwe tukaja mu rukundo

twamara kabiri nkumva birandambiye ndetse tugatangura gupfa ubusa kuburyo vyarangira ndabasezeye.

Ndibuka umuhungu wanyuma naheruka gukundana nawe namubwiye ko ivyo turimwo ntavyiyumvamwo ndamusaba ko twohagarika atanindwi zibiri ziheze ndamwemereye urukundo ariko amajambo yambwiye niyo yanciye umutima atuma nifatira umwanzuro wo kutazosubira kwishora munkundo ntizera neza ko ivyo ngiyemwo arivyo nshaka vyukuri.

Ndibuka uwo musu naranatinye kumuhinguka mumaso uburyo nabonye bushoboka bwo kumusezerera kwari ukumwandikira ubutumwa.

Namwandikiye nti...

Agace 16

Vyukuri uwo muhungu ntakosa narimwe ndamwagiriza kandi yarankunda ariko uwombaza icatumye ntamukunda nanje sinokivuga ariko umutima w'umuntu nikindi kintu kubera uvuze ego ntawuvuga oya ndetse niyo uvuze oya ntawuvuga ego.

Nico gituma nonahanura n'uwundi mukobwa wese uzokwirinde kubwira umuhungu ego mugihe uzi neza ko umutima wawe uriho ukubwira oya.

Kuko uwo uzobwira ego azoyifata nka ego kandi azobwira umutima wiwe ko yabwiye ego maze aje narwo akamwemwe kamusage gushika umusi uzomugaragariza ibisobanura oya yari ku mutima wawe kuva kuntango.

Umutima wiwe uzokomereka uzova amaraso ndetse azotakariza icizere buri mukobwa, uzomusanga mwirigala avuga yemye ko abakobwa ata rukundo bagifise maze azofata umwanzuro wo kuzobafata nkibikinisho vyo kwinezeraza no guheza igihe kuberiki? Kubera umusi yizeye ego yabeshwe!

Ivyo ndabivuga ndabizi neza kuko Délice yaramaze igihe andaba ryiza kwakundi uba ubona umuntu ko yishimiye kuba kumwe nawe, kumwe uba ubona umuntu adahengeshanya kukwandikira no kukubaza amakuru yawe, kwakuntu uba ubona umuntu yipfuza kugukorera nivyo utamusavye.

Vyari bigaragara neza ko Délice yankunda.

Ndibuka Dorine niwe yakunda kumbwira kuko ico gihe twari tukicigana mu wambere ati:"Kurya kwifi mu rusenga nikwo Délice umufise mu kiganza ahubwo sinzi ico urindiye ngo umukoze ico ushaka"

Jewe nti:"Ndamukoze iki nyene ko atagihari!"

Dorine ati:"Oya nyene muhe amahirwe rega l'appétit vient en mangeant hhhh"

Ico gihe ndavyibuka nigiriye inama yo kumwemerera igihe azonsabira urukundo nawe ntivyatinze yansavye gahunda ndayimuha ntazuyaje.

Maze umusi uri zina uragera aho yikokoye akanjana ahantu heza muburyo buke yarafise kuko nawe nyene yarumunyeshure naho tutiga muri faculté imwe ariko ndazi neza ko vyasavye ko yiniga ndetse agakoresha udufaranga twose yari yaraziganije kugira ngo bikunde romantique arivugire ahantu nza kuba nguwe neza.

Ndavyibuka ukuntu yanganiriza asa nuwufise ubwoba yapanitse kuburyo yabura nukuntu atondeka amajambo ariko hari amajambo bisa naho yari yayateguye ntashobora kwibagira ingene yayavuze.

Ndavyibuka tumaze gusoma kukajus yarikoroje maze arambwira ati:"Kessy! Mbere ya vyose manje kugushimira kugaciro wampaye ukancagura muri benshi bari bipfuza kuba bicaranye nawe kuruno mwanya batamarira inseko yawe ndetse akayaga kagucako kabahitaniza akamoto kawe gatamirana!

Ndumunyamugisha muruno mwanya ntushobora kwibaza uretse ko ntanamajambo mfise yobisobanura ukwo biri vyukuri ariko reka noneho ndeke kukwicisha amajambo ntumbere kungingo ncunguze umwanya umwete nakare kuvuga menshi sikwo kuyamara.

Kessy amaso yanje yarakubonye akurangira umutima wanje maze nawo uvuga natanzwe burukwumusi wagenda wampatira guca kibiti kumabuye kugira nshike ahuri ndakubone ubone gutuza barayamaze noneho ngo akababaje umutima kazindura amaguru.

Rero uno musu nahisemwo kuva mubwihisho nkavuga akandimwo akandudubizamwo ukwo bukeye ukwo bwije kuva umusi nagukubita iryahumye nako ayaanuyeye maremare.

Iryo naryo sirindi ni ndagukunda Kessy kandi nipfuza ko wompa amahirwe maze nkafatanya urugendo n'umukobwa umwe rukumbi mubihumbi nibihumbagiza vyabari kwisi, umutima wanje unyotewe maze wacaguye enda ndagusavye ntera iryo teka ungire umuhirwe je Muhirwe Delice"

Vyukuri nabaye nkuwukubiswe ninkuba ndamerereza kubwamajambo Delice yaramaze kumbwira maze nanje mû majambo make namwishuye nti:"Nukuri Délice numva ntatise ico nokwishura na cane cane ko je ntari imvuzi nziza nkukwo kwawe ariko amahirwe wansavye ndayaguhaye reka tujane mururu rugendo ntawomenya wobona imbere ari heza"

Kuvyemera vyari vyoroshe ariko nagiye kubona ko nemeye ibidashoboka umusi yampamagara urutavanako nkumva bitanguye kundengera, umusi yahora ansaba ko tubonana nkumva sindabishuhiye ahubwo nukungora gushika aho ukwihangana kwanje kwashitse ku musozo nca ndamwandikira ubutumwa bwagira buti:

"Délice, ndakomeretse cane ku mutima kubona bigiye kuba ngombwa ko ndakwandikira ubutumwa nkubu! Mfise isoni nyishi cane kuburyo numva noshobora nokuguhinguka imbere ngo ngire ico mvuga kuko ndazi ngira ndakubwire inkuru

yanyuma amatwi yawe atari yipfuza kwumva, nshaka ndakubwire ko bitagikunze ko dukomezanya nukuri umbabarire kuko sinkishoboye kubandanya ku kugira umunyamahirwe nkukwo nabigusezeranije kumvo zitakuvuyeko ariko amakosa yose nayanje nihuse kwemera none ukwo imisi igenda umutima unyemeza ko nemeye ivyo ntashoboye! Mumbabarire kubona narakinishije umutima wawe ariko ndakwipfuriye kuzohura nuwuzoguhaza amarira ndaguteye akazokwomora nibikomere ndaguteye! Sindakwanse ariko nanse kubandanya ndakwizeza ibatangaza! Urabeho!"

Inyuma yo kurungika ubwo butumwa numvise ngize ubwoba nca ndazimya na terefone nasubiye kuyatsa ku musu ukurikira nsangamwo message yiwe aho namanje gusenga kugira ndayisome naho ikaba yagira iti:

"Kessy simbabajwe nuko unsezeye ariko mbabajwe nukwo wubahutse ukambesha undaba mu maso! Sindi buhangane namahitamwo y'umutima wawe ariko nashaka ndakumenyeshe ko ntazongera gukunda ukundi! Mu buzima nakunze rimwe ariko naryo nyene nta Mugisha ndarigiriyemwo! Icukoze urakoze je ndakubabariye ahasigayo nivyakworohera kwibabarira uzobe amahoro kandi nanje ndakwipfuriye amahirwe masa!"

Iyo message vyarananiye kuyifuta nayisomanye amosozi ukwiyanka n'ukwicuza kudasanzwe ku buryo naciye mfata umwanzuro ko bizogorana kugira nsubire kwemerera urukundo umuhungu uwari wese.

Mbere natanguye kwibaza ko urukundo atari ikintu nagenewe ko burya atari abantu bose bageneye kuba murukundo rwiza nkukwo numva baruvuga.

Ninaco gituma nari narahisemwo kwiberaho bisanzwe babagenzi banje bo ku mutima Dorine na Charlene ubuzima bwari bumaze kumpa gushika kuruwo musi.

Agace 17

Igihe carageze co gutangura umwaka wa kabiri aho Dorine wewe atasubiye kwishure kuko ninda yari itanguye kuboneka yaciye aba arabangiye gusubira kwishure gushika yibarutse.

Kuvubwo umugenzi twamarana umwanya munini yari Charlene ariko bâ Dorine twaramutemberera kenshi gashoboka.

Ndibuka umusi natoye terefone ya Charlene ngo mbe ndaraba amafoto aho natangajwe no gusanga galerie yose yuzuyemwo amafoto ari kumwe n'umuhungu ntazi nca ntangura kumubazagiza nti:"Chacha ndumugenzi wawe?"

Nawe atangaye ati:"Nibaze ko ico kibazo kitagira ishimikiro Kessy kuko urabizi ko atanabandi bantu benshi tuzinanye"

Nanje nti:"Yamara amaso yanje ariko anyereka ibitandukanye nivyuvuga"

Charlene yaciye anyaka terefone yiwe araba ifoto nariko ndaraba nza numva avuze ati:"Aaah uvuze aya mafoto? None ugomba uvuge ko uyu muhungu utamwibuka?"

Jewe nca ndasubira ndamwaka terefone nti:"Ihibambewe ahubwo mbwira ukuntu usigaye uncinyuma ukagira abandi bagenzi ntanazi mukanahira mukishimana atahabari mfise"

Charlene yarabonye ko nari ntanguye kubabara aca ambwira ati:"Sha Kessy sukukwinyegezamwo ariko haribintu mba nabuze aho mpera ndabikubwira gusa nabiteganya kubikubwira nukuri"

Jewe nti:"hmmm raba nkizi photo nukuri uzimaranye ukwezi warihoreye kandi je mba nakibwiye amakuru yanje yose sivyiza Chacha je n'agira turi abagenzi tubwirana vyose"

Charlene yaciye yikaruma arambwira ati:"Pardon Kessy reka Basi ndabikubwire icunca amande yose ushaka sivyo?"

Jewe nasanze natwenze nti:"Shahu unyibukije amande nciye nibuka nkiri umwana ko twakunda gucana amande na Papa"

Charlene ati:"Hhhh nanje rero ndayemeye none ngirente ko arije natebeje kukubwira ko aho wansize utahankuye ukwo wahansize"

Jewe ntangaye nti:"Hmmm aho naho nagusize nihehe ga shahu?"

Charlene ati:"Uribuka ca gihe dusohoka muri ya soirée?"

Jewe nti:"Yooo reka kuyinyibutsa namakuba twayiboneyemwo"

Nawe ati:"Hhhh ivyo birabaraba! Kazima je aho wansize ukagaruka kuhantora ntahavuye ukwo"

Jewe nti:"Sha wahatoye iki ko twatahanye ukwo waje ga wakantu we"

Charlene ati:"Ntiwibuka umuhungu wansize duhagararanye yitwa Scott?"

Jewe nasubije ubwenge inyuma nca ndibuka umuhungu nari nabonye amuraba ryiza nkaca ndamuha umwanya nca ndasubira ndaraba kwifoto ndavuga nti:"Aaaaaanhhh! Kandi shaaa nciye ndamwibuka yoooo uyu niwamuhungu yaguma atuganiriza umwe nagusiga muhagararanye?? Yooo ego disiii! Kumbe vyahavuye bikomera sha!"

Nawe ati:"Hhhh nyene burya twabandanije tuvugana kuri terefone gushika aho twapanga gahunda yo kubonana mu misi iheze ariko wumve ko atakidasanzwe turavugana ni juste ubugenzi"

Jewe nti:"Hmmmm ntivyokunda! Ubugenzi nubu bwiwacu nayo hagati y'umuhungu n'umukobwa ntabugenzi bikunda Ahubwo Mbwira dot ni ryari?"

Yaciye ankubita agakofi kumumutwe ati:"Tais-toi ! Ivyo navyo ubizanye gute?"

Nanje nti:"Hhhh nyene ndavye izifoto ndabonamwo save the date"

Nawe ati:"Hhhh we warasaze nukuri"

Jewe nti:"None Basi uzomudupresenta ryari? Yooo ahubwo reka nterefone Dodo ndamuhe inkuru itwikaaa"

Nawe ati:"Hhhh rindira nyene muzomubona vuba nivyaba ngombwa"

Jewe nti:"Rega nubwo udashaka kubimbwira neza urukundo ndabona mururimwo kandi wumve ko ndabanezererewee cane nukuri kandi ndabipfuriza ivyiza vyose iyo biva bikagera"

Namenye ko Charlene ari mu rukundo na Scott numva biranryoheye na cane cane amafoto yabo naravye nkabona baranezerewe kandi baraberanye kuburyo budasanzwe bica bisubira gutuma nanje nibaza ryari ayo amahirwe azontwengera nkaja mu rukundo vyukuri apana bimwe vya twe na Délice naba ndi naho ndavyibuka nkumva ndamerereje.

Ndibuka uwo musu naratashe ndangurura mucumba kuko ntanumwe nasanze muri salon ariko haheze akanya nza numva

Gaël arampamgaye nca ndava mucumba ndamusanga muri salon nti:"Bro namaki n'uwo muganda wibitabo?"

Gaël ati:"Nyene ngaha ndiko ntegura interrogation yejo kandi nkeneye kuza kumfasha"

Nari ndushe kuburyo nari numva nshaka kuryama ariko nibutse ko ariryambere Gaël ansavye ubufasha mubijanye no kwiga uretse ko atanubushake yakunda kugaragaza bwo kwiga rero numvise ngomba gufatiraho ako karyo nkamutera intege ndetse nkagerageza kumuganiriza.

Twarize ndamusigurira ivyo yaba adatahura aho duhejeje yaciye ambwira ati:"Uno mwaka nshaka gukora cane sinzosubire kuyoberwa kuko ndateye isoni"

Jewe nti:"Rega Gae we ubwenge urabufise gusa agakuku niko kakugize nabi ubu uburi muwanyuma none raba! Ariko ntaco ntihararengerana igihe cose wigiriye inama nziza ukanayishira mungiro biba vyiza kandi uze wame wibuka ko inama nziza ariyi wigiriye ko inama utigiriye biragiye kuyikurikiza"

Nawe ati:"Ndabizi sis! Nkubu Maman ari mugupfa! Sinshaka ko azojana intimba nagahinda kubera jewe!"

Yavuze ukwo nisanga amosozi yasubiye gukoroka vyukuri kwiyumvisha ko buri musu wavako waba uvuye kumisi asigaje.

Maman yari yarahindutse yarasigaye akunda gusenga kenshi yaragenda kwisengero akirirwayo ariko arasenga akagaruka atubwira ingene yavuganye n'Imana ibintu ntatahura ariko yarasigaye aduhimiriza twese gukunda Imana.

Ndibuka umusi umwe yatubwiye ko Imana yamubwiye ko imwongeye umwaka wokubaho tubifata nkinkuru ariko we vyagaragara ko abivuga ashimitse.

Imisi yakomeje kugenda ndetse namezi aragenda kuburyo na Dorine yatevye akegereza igihe co kuvyara ndibuka umusi tujana kugura impuzu z'umubebe ingene twari dushushe twaguma duharura imisi isigaye kugira twibonere akabebe kacu aho twese twasiganira kuzokita izina kuburyo vyarangiye jewe mbaye uwuzomutorera prénom charlene nawe nom turavyumvikana turabisezerana.

Uwo musu rero twari mwisoko ariko ndiko ndamucaguza impuzu hakaba hari izari ziri hejuru ca mbanza kwurira kugatebe kari karaho ariko sinzi ukuntu nagiye numva kavunitse nca ndatamba no hasi ngo baaaa...

Agace 18

Nahenutse wese mbura nico nishimikiza ariko kubwamahirwe nza numva hari ibiganza vyumuntu vyamfashe ntarashika hasi kuko jewe naza nahumirije niteze kuvunagurika.

Ntarahumura numvise umuntu akomye amashi atwenga cane ntawundi yari Dorine yaciye avuga ati: "Wow! Ifoto nayifashe nzoyerekana uriko urashinga intahe ko bimwe vyo mumafirime yabahindi aho umukobwa arwa umuhungu akamusama hama bagaca bakundana"

Naciye nkanura nca ndiyaka umuntu yaramfashe kuko nari numvise Dorine atanguye kuvuga menshi ariko sinzi ukuntu nahuje amaso nuwari yansanye numva umenga mfashwe namashanyarazi naramuravye binanira kuvuga binanira no kumukurako amaso kuko natanguye kwibaza ko ndiko ndarota.

Nagiye numva avuga ati: "Pole sana urahatswe!"

Je nasanze navuze nti: "Diego?"

Nawe mbona arikanze ati: "Turazinanye?"

Jewe numvise maramaye ukuntu ndamwibuka nkuwamubonye ejo ariko we akaba atanzi ahantu nahamwe nabuze ico ndenzako nca ndagenda ariko ntarashika kure numvise amfashe ukuboko aho hose ikintu cakomeza kumbabaza nukwo Dorine yariko arafata vidéo aguma atwenga nanje nkomeza kumwiye aca ambwira ati: "Ndiko niyumvamwo ko ndakurekuye nshobora kuba ndakuye amahirwe yo kuzosubira kukubona nkahomba kumenya umwiza yamenye ntamuzi"

Diego yavuze ayo majambo nca ndamubwira nti: "uzi ko atariryambere umbajije aho ndakuzi?"

Nawe ati:"Kubera akazi nkora vyama birambako nkabakiriya tugahura bakamenya ariko sindabamenye kubera nkorera ahantu henshi kandi hose mvugana nabakiriya gusa rero umbabarire wumve ko atari ku kwirengagiza"

Jewe naciye ndamwishura nti:"Ah ok nanje ndumukiriya mpora nza kugurira impuzu ngaha"

Nawe ati:"Urabeshe ndabibona mumaso yawe kandi bigaragara ko kubesha ataribintu vyawe ariko ntaco Mbwira basi izina ryawe hanyuma uzontege nsubiye kukwibagira"

Namubwiye nti:"Nitwa Kessy"

Nca ndagenda mbwira Dorine nti:"Urashobora kuzimya iyo caméra?"

Dorine ati:"Iyi firme nzoyirorera nampaka"

Namwatse terefone ngomba ndayifute aca ambwira ati:"Kessy ukayifuta ucunkura mubagenzi bawe"

Nafashe phone mbanza kuraba ivyo yafashe ariko sinzi ukwo naroreye mbona nsanga ahubwo nagumye nsubiza inyuma birangira anyatse phone Dorine tuca turataha.

Turiko turataha Dorine yaguma ambaza ati:"Ariko sha urya muhungu muzinanye hehe?"

Jewe nti:"Sha ahantu ndamuzi nawe urahibuka kuko niho nyirabayazana yibi vyose?"

Nawe ati:"Hmmm bisigura?"

Jewe nti:"Ntiwibuka ya soirée watujanamwo kunguvu umuhungu yatwakiriye waguma wiyama ngo avuga igihindi?"

Dorine ati:"Ntumbwire ko aruyu?"

Jewe nti:"Hmm nuyu nyene"

Dorine ati:"Yoo none ko yabaye mwiza cane? Sha dusubire kumuraba?"

Jewe nti:"hhhh wibagiye ingene wamusuzuguye urya musu?"

Nawe ati:"Basi tugende ndamusabe imbabazi"

Nanje nti:"Ntivyokunda si nshaka Nukwo amenya"

Nawe ati:"Kessy aho uri sûre ko urya muhungu utamukunze wewe?"

Jewe ntangaye nti:"Indee? Ndasara jewe?"

Kassy aca aratwenga cane ati:"Hhhh tayali inyishu namaze kuyironka! Ahubwo dutahe we ndakwereka umuti nza gukora"

Natanguye kwibaza ico Dorine ashatse gusobanura nti:"Dodo wihende ukore ikosa!"

Uwo musu natashe inzira yose ngenda ndiyumvira ibintu vyambayeko umwanya umwe nkumva nditwenge uwundi mwanya nkumva ndamaramaye nkongera nkibaza impamvu yanteye kutabwiza ukuri Diego ndayibura nca mpitamwo kureka kubitebako ndabandanya ngeze imbere niyumviye guhita ndaraba Papa kuko nari nciye hafi yaho akorera.

Namusanze mwiduka nini yadandarizamwo hari abakiriya nasanze ariko arakira nca mba ndicara indani kuntebe mba ndaraba ingene yaganiriza avakiriye abatwenge yongera abizeza ibitangaza kuma frigo bagira bamushorere aho naguma nsanga natwenge nza mbona araje ati:

"Eeeh kwifaranga ntagufyina mwana aha nireresi ndazikina we gusa gumangaha uraza kubandanya wumirwa ahubwo nyene nimpore kungendeye izi saha?"

Nanje nti:"N'impore nariko ndarengana nca ngira nti reka ndahace"

Nawe ati:"Karibu mwana uzuraraba ahava umukate wanyu ubone ko kwisi atamichezo uraruha kugira abawe baruhuke"

Nanje nti:"Emwe nanje nakanuye maremare kuko buca kabiri azobe ari jewe ndamukiwe"

Papa ati:"Mbe nyene nzoronka umukwe ryari sha? Canke urindiye kumera amahembe kugira wibwirize ko wakuze?"

Jewe ntwenga nti:"Nyene niyo ndindiye"

Nawe ati:"Urakumbura uyihoye kuko Maman wawe urabona ko bitera vyanka ushaka agenda utanamweretse umukwe wo muri kazoza Basi?"

Nabuze ico nishura nca Mbwire Papa nti:"Vuba cane muramubona ntumugire ubwoba"

Papa yararyohewe ariko nasigaye ndiyumvira ibintu mvuze ico ndabikuyeko ndabura niho naza numva message ije muri terefone ndavye izina mbona ni message y'a Délice numva nagize ubwoba nca ndasezera Papa kuko ngomba kuza kuyugurura ndahantu hatekanye.

Ntarashika Kure Papa yarangaruye ambwira ati:"Uribuka za ndoto nakubwira ca gihe zantero ubwoba ndarota?"

Jewe nti:"Ndazibuka Pa ariko ntusubire kuntera ubwoba"

Nawe ati:"Urakumbure ugabanye agafyinyi kuko ibihe biri mbere ndabifitiye ubwoba bivanye nizi ndoto ziguma zisubiriza nguma mbona muri mukiyaga muriko musoma nturi nanje ngerageza kubakurayo ariko bidakunda bisa naho hagati

yanje namwe harikintu kidutandukanya kikambuza kubashikira ariko reka twizere ko arindoto zidafise ishimikiro gusa."

Jewe nti:"Reka tuvyizere Papa akaba atarukwo naho uwuza gusiga imvura arayirindira reka tubirindirize amaso kuko mwuno mwanya ntanico twobikorako"

Nasezeye Papa ndataha nshitse muhira ndangurura mucumba iciyymviro cari kimwe co kwugurura message Délice yandungikiye kuko hari haheze igihe kirekire atanamakuru yiwe mfise.

Naruguruye message ndavye indani nkangukwa no kubona...

Agace 19

Nashitse mucumba nihutira gutora ingendanwa yanje maze nugurura ubutumwa bwa Délice ntangazwa no kubona harimwo ifoto handitseko musu ngo:

"Nizere ko utariko urakinisha umutima wiwe kuko imitima s'agapira uzoza uradunda ukwushatse wiyobagije ko nawe ufise umwe kandi aha hanze hatobura umukinyi mwiza awudunda nkuko ubikorera abandi ruriye abandi rutakwibagiye kandi musu y'ijuru ntawutonyagirwa"

Sinari bwugurure isanamu yazananye nubwo butumwa ariko amajambo yonyene kuyasoma vyarancumitse ku mutima nsubira kwumva ukungene guhemuka bimera.

Burya umutima w'umuhemu aho azoja hose n'inyuma y'imyaka ijana uhora umwagiriza kandi naho yoba mu bihe vyiza gute umunezero ugira wama uteye amazi ndetse naho wotwenga uba uzi ko utwengera kwihwa rigucumita burukwo wibutse ko wahemutse n'uwo wahemukiye.

Burya nasanze kandi guhemuka bidasaba kubishiramwo inzigo nyinshi ariko ikosa rimwe rivuye kugusamara gatoyi canke ukwirengagiza rishobora gusanga wakoreye umuntu kikamushira ahantu atazopfa yikuye mu buzima bwiwe bwose.

Jewe nabigiyemwo mfyina nukuri sinarinzi ko ninjiye mu bintu nzosohokamwo nitwa umuhemu, ubu mbayeho nzi ko hari amarira y'umuntu yatemvye kubera jewe! Sivyo nari ngambiriye ariko nkuko bavuga buri kimwe cose kitubera icirwa.

Kuva icyo gihe namanye ko haribintu bidakwiye gukinishwa mu buzima na cane cane nk'amarangamutima ry'umuntu kuko

burya niwe muntu kandi icudashaka ko bagukorera ntukagikorere abandi.

Vyarananiye no kubandanya nkoresha terefone naciye ndayijugunya kugitanda nca ngenda muri Salon ngira amahirwe nsanga Maman niho yicaye tuca tuba turatera inkuru ivya Délice iteka yaharanira kunyibutsa ko nahemutse mba ndavyiyibagije.

Igihe carageze ndavyibuka, hari mwijoro nryamye aho numva terefone isonye ndavye mbona ni numéro ntazi mbaza ndatinya kwitaba irateba iriheza Ariko ubwo nyene nza numva irasubiye nca ndahitishamwo ndayitaba nshize ku gutwi numva nijwi ry'umudamu ariko naciye ndamumenya yari Mama Dorine yambwiye ati:"Kessy tugiye kwa muganga Dorine arafashwe nibise"

Naciye ndandamuka mpaguruka ndamubaza ibitaro bagiyeko arabindangira nanje naciye kubiti nca kumabuye nkura ipinjama nambara impuzu nabona hafi zimbangukiye nca ndatora nagasakoshi kari karimwo ivyangombwa nsohoka niruka ndibuka ko nashitse muri salon nkasekana na Maman hafi gutemba numva arambajije ati:"Namaki Kessy kugiye utazambaye ugiye gutabara urwahe mwiki gicugu?"

Namwishuye nti:"Maman Dorine agiye kwibaruka kandi ntegezwa kuba ndahari"

Maman nabonye ankurikira turasohoka acarankwenga yurira imodoka nanje ndamwicara iruhande Jérôme yugurura umuryango tugenda ndibuka ko naravye inyuma nkabona Papa asigaye arahamagara dukase mwibarabara.

Naciye nibwiriza ndamuhamagara ndamubwira iyo tugiye kugira ntasigare ahangayitse maze mukanya gatoyi twari

dushitse kubitaro ifure yambere twayifatiye kuri maternité niho naca mbona ahantu hicaye Maman Dorine tuce turagenda tumudanga ndamushikiriye nshika ndamubaza nti:"Dorine ari hehe?"

Nawe ati:"Arindani abaganga bariko baramwitaho"

Maman yarinyuma yanje aca ashika amuramutsa nca ndamubwira nti:"Uyu ni Maman wanje"

Baca baramukanya baba baraganira ariko haraho naravye muri corridor mbona umudamu wamugangakazi ariko aza atugana nca ndangurura ndamusanga kugira ndamubaze amakuru ya Dorine ndamushikiye ntaragira ico mvuze nakangutswe mbonye ari Jacquie nawe nyene yarambonye arikanga ati:"Kessy? Kuri ngaha warwaje?"

Jewe nti:"Oya ahubwo Dorine yaje kwibaruka!"

Jacquie yararyohewe aca aza aranyaruka ambaza ahari ndamubwira ko arindani acambwira ati:"Yooo! Reka nyaruke mbere nije nca ndamwioccupa mwe mugumire aha mukanya ndabazanira akabebe"

Jacquie yaciye yinjira yiruka nanje nsigara numva nryohewe mbere mpumurijwe kubona hari umuntu nizeye ariko arakurikirana Dorine noneho nari numva ari mubiganza vyiza kuvuwo mwanya.

Nagiye mbona Maman anyegera ati:"Uyu mudamu ninde ko mbona musa nabazinanye cane?"

Jewe nti:"Urya yitwa Jacquie twamenyanyiye ku rugendo cagihe tuduga kwaba Chacha twaraduganye turongera turanamanukana kuburyo twavuyeyo twamenyanye ahubwo sinarinzi ko akora ngaha sinzi n'ukuntu Imana imuzanye"

Maman Dorine yaciye yongeramwo ati:"Sha ikidahura n'imisozi umurundi yabivuze ntiyabeshe kandi uwo muhuye uno musu ntumenya ahandi muzohurira nico gituma umuntu atarakwiye gutera akagere uwo udakeneye uno musu kuko ntakiba kikwemeza ko budaca kabiri ngo umukenere"

Nanje nti:"Nukuri ntubeshe naho ntakuntu kibabaje gusaba uwo wateye akagere"

Twabandanije tunganira amasaha aguma agenda burateba buraca na Jacquie atarasubira gusohoka ntangura kwumva ubwoba nkibaza ikintu coba cabaye Maman akampumuriza ati:"Humura Kessy aha iyaba harico yabaye baba baje kubitumenyesha kuko urazi ko inkuru mbi yihuta ahubwo nibisanzwe kuko ndibuka nanje inda yawe yaranyanikiye namaze amasaha atandatu kugise kuburyo na Papa wawe yaza yihebuye!"

Twakomeje kwicara aho twese kubwo umwanya muremure twari tuhamaze amajambo yaratevye arahera twese turahora je nabona umwango wugurutse nkahaguruka niruka nibaza ko batuzaniye inkuru ariko nkasanga baje guhamagara abaherekeje abandi.

Ndibuka ko hari saa mbere zigitondo aho nabona Jacquie aje aranyaruka ashika atubaza ati...

Agace 20

Jacquie yanje arihuta nakayashu kamurenza ahika atubaza ati:"Impuzu z'umwana zirihe?"

Maman Dorine yaciye yihuta akura mwisakoshe yarafise impuzu nibigoma vyumwana aramuhereza aca asubiraye yihuta ndibuka ko namubajije nti:"Jacquie mbwira basi ko aramahoro?"

Ntamwanya yaronse wo kunyishura ahubwo twasubiye gusigara aho Maman aca avuga ati:"Humura aho umwana aravutse reka turindire numuyeyi aramera neza ahubwo nukumutegurira agatoki aza kuvayo ashonje"

Maman Dorine yaciye yishura ati:"Sha ubona kotegurwa tutaramenya ko yasimvye Imana"

Tukivugana twabonye umuryango wongera kwuguruka tubona Jacquie asohotse ateruye akabebe twese duhagurukira rimwe tumusanganira kukaraba.

Twese twagakubise amaso turumirwa karakazungu neza kuburyo vyananiye kugaha uwundi ngo agaterure kari agahungu keza cane mu buryo butangaje abantu bose baraho baratangaye baguma baza kukaraba batubazagiza ibibazo ariko tukabihorera kuko ntitwashaka kuvuga inkuru ya se wiwe kuko yari inkuru yadukomeretsa twese uretse ko tutanabitebako ahubwo haheze akanya Maman Dorine yabajije Jacquie ati:"Dorine nawe ameze gute?"

Jacquie ati:"Yatakaje amaraso menshi ariko turiko turamwongerereza ayandi mumwanya turamujana mu cumba abe araruhukiramwo"

Kandi koko hacye akanya twacye tubona basohoye igitanda kimwe banyonga aryamyeko baragisunika Dorine yarafise utuguvu dukeya ariko twarahuje amaso nca ndamubwira nti:"Dodo we buragenda kuruhuka aka kazungu koko sinzi ukwo biza kugenda ngo ndakaguhe inama rukokomwa iraza gukorwa"

Dorine yacye atwenga hanyuma Jacquie aca avuga ati:"Ahubwo nimujanirane mubone icumba agiyemwo kandi dè's que aronse utuguvu ace yonsa umwana ntamwicishe inzara"

Twaragiye ndabasiga bariko bavugana na Maman Dorine tugeze imbere twahuye na Charlene agemuye ndatangara acambwira ati:"Eeeh wamenye ivyabaye iyerusalemu?"

Nawe ati:"Hhhh nyene inkuru yansanze igalilaya none ndaje gushikanira akana kavutse"

Jewe nti:"Ewe ngaka sha raba nakazungu kibereye ngaha"

Warumunezero ntangere kuri twese ndetse nakomeje gutangazwa nubwishi bwabantu baguma baza kumuraba abanyeshure twigana bose basidukana iyonka bakaguma bagafotora kuburyo vyari ibintu vyiza cane nanje naricara ahantu nkatangura kurota umusi ayo mahirwe azontwengera nkatanga ubuzima nkumva akana gakinira munda yanje nkarera mubiganza vyanje amaraso yanje nkagasomagura nkakita amazina yose meza numva mu mutwe.

Narakaraba nkumva ndatwawe umwanya umwe nkibuka ko harabantu kwisi baniga utuyoya bakaduta mumayarara abandi mu buzu bwa sugumwe ntangura kwibaza ubwoko bw'imitima baba bafise kuko je ndiko ndakihweza nabona akaziranenge kakamalayika kibereye ngaho nkumva ndagakunze kurusha

nukwo nikunda nari nsanzwe nkunda abana ariko ako koko abantu bahakwa kwibaza ko arakiwanje kuko Dorine yapfa kugatereka naba nakanyakuye kera kakanasinzirira mubiganza vyanje.

Ndibuka ko Dorine yaciye ambwira ati:"Désormais ubu usubiye kumpamagara Dorine tuzobipfa ubu ndi Maman nde harya ? "

Naciye nibuka ko arijewe nahawe iteka ryo kugatorera izina nca ndamubwira nti:"Hhhh ubu shahu uhinduriwe amateka ndakubatiye kwizina rya data niryamwana niryamutima mweranda ko ugiye kwitwa Maman Don du ciel"

Dorine ati:"Wow ndagakunze nakazina keza"

Charlene nawe yaciye yongeramwo ati:"Hmmm! Ntivyokunda je nzoguhamagara Maman Uzompoza"

Dorine ati:"OK! Noneho birangiye niswe Maman Uzompoza Don du ciel ndatesaaaa!"

Igihe carageze Dorine arava mu bitaro umwana abandanya akura afise ubwiza bwigitangaza kuburyo igihe kimwe namubaza nti:"Wiyumva gute ufise umwana mwiza nkuku?"

Nawe ati:"Hhhh rega na nyina ni mwiza"

Nanje nti:"Hmmm we wirabura nka kiwi iyi nzobe woyikura he ahubwo bazokibwira ko aruwo wivye"

Nawe ati:"Tais-toi! Ninde yaguhenze ko jewe nirabura? Vuguti mfise inzobe nkeya wana"

Nanje nti:"A vos ordre Maman Uzompoza Don du ciel"

Dorine ati:"Sha iyi ngabire yaje iva mwijuru izompoza ayo narize nayo nzorira nkubu niyambaza se nzohora ndamwishura nte?"

Jewe nti:"Uzomubwira ko yagiye kumuzanira Chocolat azogaruka umusi urizina"

Nawe ati:"Ntiwumva ko nzoba ndamuhenze?"

Nanje nti:"Hari igihe mu buzima kubesha biba bikenewe uzomubwiza ukuri niyakura"

Ukwimisi yagenda nikwo Maman yatera aremba ndetse aho igihe cageze akinjira mu bitaro kubera ikivylimba kwibere cari caraturitse hari ikiguma vyabaye ngombwa ko yinjira ibitaro bakaza baracoza kabiri ku musu mugitondo no mwijoro kandi naho nyene twari tubizi twese ko arindiye umusi gusa.

Rero kuva ico gihe nari nsigaye nibera kubitaro kuko nje nari ndamurwajije kwishure nagenda rimwe rimwe nari ngeze muwagatatu nakunda kwibaza ko bizohava biba ngombwa ko uwo mwaka ndawucira hagati kuko vyukuri nti vyari bikinkundira kwibanda kuvyigwa nkuko vyari bikwiye kugenda ariko Maman akambuza akambwira ati:"Jewe kibondo buca kabiri ndabasige kandi ubuzima bugomba kubandanya rero ahubwo korana ishaka numwete ntuzomaramaze"

Ndibuka umusi umwe Charlene yazananye na Scott kudasuhuza kuko bari basigaye bakunda kuba bari kumwe kuburyo urukundo rwabo rwaranryohera cane uburyo bari babanye biri mu bindi vyantera kurota nkitembereza muri kazoza ndaba ukwo nzoba merewe nanje.

Ndibuka igihe kimwe Dorine yaridoze ati:"Sha Chacha ntakitwiteza ubu yigumanira na Scott naguma bakwegana ahantu hose"

Jewe nti:"Hhhh none ko umenga uramupfuhira"

Nawe ati:"Nyeneeee! None igihe Scott atari bwaze nibande bagenzi yarafise?"

Jewe nti:"Hhhh turabagenzi biwe nubu ariko twe haraho Scott ashika twe tutoshika ikindi naco ntazoserana kubana natwe ibihe vyose harya uwamutwaye umutima niwe yamutwaye n'umwanya!"

Chacha na Scott bari bakundanye kuburyo twe yarasigaye aturonkera umwanya uharuye arivyo vyatera Dorine gupfuha adapfuhiye iterambere n'umunezero wiwe ariko apfuhiye ubugenzi bwacu ntamenye ko ibihe vyahindutse.

Ndibuka uwo musu ndabaherekeje baje kusuhuza Charlene yanshize kuruhande tuba turaganira ambwira ati...

Agace 21

Ambwira ati:"Kessy sorry kueli twaraburanye nizere ko utanshavuriye nka Dodo?"

Jewe nti:"Hhhh oya sha ndabitahura kuko nanje nishira mukibanza cawe nkabona ko ubu usigaye ufise igifashe cagufashe wese utagikakaza ariko sha nukuza uratwibuka"

Nawe ati:"Sha nyene burya mba numva ndabakumbuye nyene nkakumbura yamyanya twamarana ariko nkibuka ko ubu nubatse ntakicigenga nkakera ahubwo ni hatari"

Jewe ntwenga nti:"Ahubwo nyene kutadutumira namaki? Ushaka tuzoze nkabavumvyi nizina ry'Imana?"

Charlene ati:"Ahubwo no muvyanzanye birimwo aha narije kugusaba kandi noneho sikugusaba kuko utegerezwa kumbera marraine rega ntawundi mfise ntanuwo nzorondera naramaze kuguhitamwo"

Jewe narakangutswe nti:"Chacha urasara wewe? Je ubona nokubera marraine nyabaki ko marraine aba arumuntu winararibonye mubijanye nokwubaka ingo kwa nza nkibaza ko marraine ategerezwa arumugore"

Charlene yambwiye ati:"Iki kiganiro twagihejeje ahubwo nshika ndagushira muri groupe ya comité kugira umenye ibizokurikira ninama aho izobera"

Charlene yaciye agenda asezera Maman be na Scott baca baragenda je nsigara numiwe nibwo Maman yambaza ati:"Namaki ko wumiwe?"

Nti:"We woreka kumirwa ubwiwe giturumbuka ko uzoba Marraine"

Maman yararyohewe ati:"Wao biraryoshe! Uzi ko Scott ansigiye invitation mariage ari mukwezi kuza!"

Jewe ntangaye nti:"En plus haranageze ataninkuru yaribwambwire"

Maman yambwiye ati:"Urazi ibintu ukwiye kwirinda mu buzima ga Kessy?"

Jewe nti:"Ivyaha?"

Nawe ati:"Uzokwirinde kugayira uwuguhaye atakugaya no kwanka Iteka uzoba uhawe n'uwugukunda kuko haba hariho impamvu watoranijwe mu bandi wibuke ko gukura ari mu mutwe kuko imyaka yoyo nibiharuro"

Vyarangiye ngondoje nitegurira kuzoba marraine wa Charlene ndetse ntivyanatevye nisanga muri groupe ya Comité yurubanza aho hari uwidondoye atubwira ko ariwe Président wa comité ndetse atumnyesha ko inama y'urubanza izoba kuwamungu isaha icenda ashirako naho tuzohurira.

Ndibuka ko uwo musu nyene na Dorine yaraje kudasuhuza azananye na Don du ciel aho wabonako yari yabaye umuhungu akuze uwo musu twaririrwanye durera inkuru nongera nikishiriza umwana aho hari abantu binjiye mucumba twarimwe baraturamutsa umwe muribo acaravuga ati:"Amahoro y'Imana abe kuri mwebwe"

Maman niwe yabishuye kuko jewe narababonye ndabibwira kuko bari bafise isakoshe nibitabo vya bibiliya aho nakunda kubona mubitaro abantu be nabo bagenda baravuga ijambo ry'Imana ndetse novuga ko hagera igihe nkumva ndabarambiwe kuko bagenda bakurakuranwa hari nigihe nashaka kubankira ariko Maman akambwira ati:"Sigaho

mwana! Aburahamu yakiriye abashitsi atazi arabagaburira ahejeje asanga yakiriye abamalayika rero ntuzokwirukane uwuje akugana kuko harigihe uzosanga wirukanye umugisha wawe"

Maman kuva agwaye yari yarabaye uwundi muntu kuburyo umwanya nicara nkashimira ingwara kuko yaramuhinduye nubwo nya ngwara nyene yagira imuntware nkimukeneye kuko umuvyeyi ntiyigera ashira uburyohe ariko nyene ntakundi akaje karemerwa.

Abo bantu rero batanguye kudasigurira ko hari igikorane kidasanzwe cimirije kuba kandi kikazoba kiremeshejwe n'umukozi w'Imana avuye hanze ndetse kukaba nkako baduhaye ibipapuro vy'ubutumire hariko n'ifoto ariko je sinavyitayeho naciye ndabitereka ku ruhande Dorine niwe yabisomye bamaze kugenda numva arambwiye ati:"Kessy! Tuzokijeko iki gikorane?"

Jewe nti:"Hahaha sha vyoba bigenze gute ngo ugende ko nzi we ibintu vuabakizwa ataribintu vyawe"

Nawe ati:"Kandi si blagues nzogenda nukuri Ahubwo uzomperekeze ndagusavye"

Dorine yakomeje kunyinginga nibaza ko ashaka kuba aranyumviriza nca ndamwemerera kugira ndamwikure tuca tubandanya tunganira gushika bwije agataha.

Amaze gutaha negamiye kuruhome nsubira kwiyumvira uburyo ngiye kuba marraine wa Charlene numva ubwoba kuko siniyumvisha ko nzobishobora ariko ndarya umutima amenyo ndavuga nti:"Imana yo nyene niyo izomenya ukwibigenza hari naho wosanga nanje iriko irantegurira inzira kuko nizera ko ntazosaza ndi nyamwigendako nanje umusi umwe

izondungikira umumalayika murinzi azontembereza muri rya juru rito"

Karacamwo rimwe rimwe nkaraba abandi nkipfuza, nkipfuza igihe ntazi kizogera nkakunda nanje nkakundwa nka Charlene n'abandi benshi bari bamaze kunyitangira imbere muruwo munyenga w'ingabire Imana yatangiye ubuntu kandi nizere ko itarobanuye ku butoni ko twese dufiseko uburenganzira.

Ndibuka umusi w'inama ya Comité warageze Charlene aranyibutsa aho naciye mpamagara Gaël kugira aze kuba aransigariye ku bitaro nanje nsimbire muri yo nama aho nari mfitiye igishika co kwumva ibiza kuvugwamwo kuko ryari iryambere ngiye muri comité y'urubanza ariho natanguriye kwibwira ko ukwo biri kwose nshobora kuba nakuze naho Maman yambwiye ko gukura ari mu mutwe burya uzobona ko wakuze ubonye batanguye kukuzeza amabanga amwamwe.

Uwo musu nisanze nacerewe kuko Charlene yaguma anterefona ambaza aho ngeze ambwira ko arije ndabatebeje bose bamaze gushika barindiriye jewe kugira batangure.

Ndibuka ko nahashitse nakayashu kandenze siniriwe ndanabaramutsa nashitsz nicara ngwana no kwihanagura iyashu aho nagiye mbona ikiganza imbere yanje kimpaye agatambara ko kwihanagura nca ndatora nti:"Merci"

Nawe ati:"De rien"

Numvise ijwi sinzi ukuntu nunamuye mpuza amaso nawe ndakangukwa bidasanze...

Agace 22

Narakangutswe ku buryo abari ngaho bose bibajije ikibaye ndetse mbura nico mvuga nguma ndamuraba gushika aho nagiye numva we nyene yibwiriza ati: "Kessy! Imana Ishimwe ko kuriyi ncuro ntakubajije aho unzi!"

Ntarasubiza naciye numva uwundi mugabo avuze ati: "Ok! Nibaza ko ubu dushobora gutangura ntitubandanye gutakaza uwundi mwanya"

Bose bazungije imitwe bamaranya nawe nanje nkomeza guhanga amaso Diego aca amvunira akagohe ntahura ko ambwiye ko tubisubiramwo inama iheze nubwo gushika mwuwo mwanya ntari bwiyumvishe ko vyukuri dusubiye guhura na Diego.

Mvuze ngo harico natereye muriyo nama noba mbeshe ndetse mvuze ko nivyahavugiye noba narumvise nkicacumi cavyo naho nyene noba nyomanyomye ico nibuka nuko ku ncuro nyinshi nunamura umutwe nkahuza amaso na Diego nkasanga nawe ariko arandaba nkaca maramara nkirabisha hirya.

Natanguye kwumva ntatekanye numva mbuze amahoro nkaho umenga ndahangayikiye ikintu ariko bakwibaza icarico nkakibura ndibuka ko natevye nkigira inama yogutora terefone ntangura kwugurura ama discussion yose ya whatsapp nayamaze umwaka ariko hariyo naguyeko ndakangukwa.

Nisanze nashikiye iya Délice imwe yanyandikira andungikanye nifoto ariko nca nibuka ko ntigeze nitaho kuraba iyo foto nca numva ngize amazinda yo kuyugurura nkayiraba nibwo nayugurura ntangazwa no gusanga ari foto Dorine yafotoye igihe twagenda kugira impuzu zumwana maze nkatemba

nkagwa mumaboko ya Diego mu buryo butangaje ariko ntangazwa ningene yashikiye Délice nca nibwira ko ukwo biri kwose ashobora kuba yarayishize ku mbuga nkiranyambaga nca numva ndasubiye kumaramara nongera ntwenga bukebuke aho nisanze ndiko ndazunza umutwe nza numva wa mugabo aravuze andaba ati:"Marraine hari ikibazo ufise canke ico ushikiriza?"

Je narakangutswe kuko sinari nzi niyo bageze nca ndikoroza nti:"Eeeuuh oya vyose ni sawa"

Nawe ati:"Aho ni sawa reka rero umwe wese agenda yitwararike inshingano ziwe sinkeneye ikosa na rimwe canke ugucererwa na gutoyi nkeneye ko uru rubanza ruzoba nsumbazose"

Bose baritabiriye bemera inama iba iraheze turaguruka aho Charlene yaciye aza ati:"Marraine wanje uri tayali?"

Jewe nti:"Hhhh kurusha ukwo nigeze ahubwo ukwiye gutangura kunyubaha kuko marraine n'umuntu adasanzwe burya"

Nawe ati:"Hmmm manza umbwire harya couleur du jour yo kuri dot azoba ariyahe?"

Jewe natanguye kwitoza utunyoni kuko sinamenyeye igihe babivugiye nza numva aratwenze ati:"Rega nabibonye ko atariho waruri Ahubwo nkeneye kumenya icagutwaye umutima nimba atari uwagutwaye umutima"

Jewe nisanze ndiko ndaharira nti:"Inde? Ndasara jewe!?"

Nawe ati:"Rega nakurikiranye ijisho mwarabana na Diego ndetse nkinararibonye ndabona ko ritari iryo kuraba abandi bantu"

Tugiharira twaciye tubona Scott na Diego baza batugana ntangura kwumva ubwoba nza numva Charlene aravuze ati:"Eh bien quand on parle du loup voilà qui vient"

Baradushikiye baraturamutsa ndibuka ko atajambo narimwe nigeze nkura ku munwa gushika aho Scott yakweze Charlene baragenda nisanga nsigaranye na Diego nza numva aravuze ati:"Hey amakuru yawe? Ko wahoze cane nimpore?"

Nanje ntangura kudidinganya nti:"nda..ndavuga daa"

Yaciye ankwega ukuboko ati:"Ingo rero natwe dukore inama ya Parrain na Marraine"

Jewe kubera uguta umutwe ntazi ico vyariko biravako nasanze terefone yankorokanye aca arunama arayintorera ariko sinzi ukuntu yaravye muri terefone ngira amahirwe make mukiyo hari hakirimwo ya foto yo muri discussion ya Délice nza numva arambajije ati:"Iyi foto ni nziza mwari muberewe"

Naciye ndamwaka terefone nyarutse kuyizimya nti:"Eeeuu iyi nyene ni nziza eeh nako ntaco ibaye"

Natangajwe nukuntu atayitevyeko mbere bigaragara ko atamenye ko yari jewe nawe nimba yarabimenye naho ashobora kuba yarigirishije ariko ukwo biri kwose yarantabaye atabandanije ayiraba canke ayimbazako ikibazo kuko sinzi ko nari kuronka ico ndamwishura.

Ndibuka ko yambwiye ati:"None uracafise akanya tukicara ahantu tukaganira nkasabira nimbabazi z'incuro zose twahuye sinibuke umumalayika Imana yaguma ikomeza kundungikira"

Diego yarabivuze numva ndaryohewe nca ndatwenga bukebuke nti:"Sha vyari vyiza ndetse nanje vyonryohera ariko

ntivyokunda ndarwaje Maman ku bitaro aha nahasize Petit frère kandi urabona ko amasaha agiye"

Nawe ati:"Yooo Pardon ahubwo nagutebeje sinabimenye"

Nanje nti:"Oya ntanakimwe reka nce ngenda tuzosubira"

Nawe ati:"Oya ahubwo reka ndahashike ndamuraba"

Twarasohotse aca ambwira ati:"Guma aho nyene gato ndaje"

Nabonye amanuka arenga inyuma gatoyi nsigara ndiruhutsa mvugira ku umutima nti:"Ukwo biri kwose numva nryohewe mu buryo Ntazi"

Nagiye numva imodoka ivugirije ihoni iruhande yanje nca ndahindikira ndavye ikiyo kimanutse mbona ni Diego acarugurura umwango mbona aruguruye arasohoka aca arazunguruka hirya yugurura umuryango ati:"Urashobora kuntera iteka nka kubera umushoferi?"

Nanje ntwenga nti:"Urakoze"

Narinjiye ndicara maze nawe arinjira arandurutsa agenda aranganiriza kuburyo mu mwanya muto nanje natanguye kwirekura kuburyo nisanze nubwoba batanguye guhera ndanamubwira ningene Maman agwaye biramukorako ku buryo yagiye arandemesha numva birankoze ku mutima gushika dushitse kubitaro.

Twarinjiye dusangaho Gaël natangajwe no gusanga ariko aramunweshya ubuyi nca ndamwaka akabole nti:"Bro ruhuka ganiriza umushitsi ubu harageze ko tugira remise et reprise"

Nabandanije kunywesha ubuyi Maman, ndetse nongera ndamuganiriza nca ndamubwira nti:"Maman uyu yitwa Diego niwe azoba Parrain wa Scott"

Maman aryohewe ati:"Wow! Biranryoheye muze muhambere bibondo"

Diego yabandanije aganira na Gaël nza numva aravuze ati...

Agace 23

Diago yavuze ati:"Ariko umenga siryambere ndakubonye"

Gaël atangaye ati:"Vya kueli? Je ijisho niryambere pe gusa ntawomenya"

Je naciye nikanga kuburyo akabole nari ndiko ndanywesherezamwo ubuyi Maman habuze gato ngo gakoroke ngira amahirwe Maman acambwira ko ahaze nca ndagenda kwoza ivyombo bitari vyogeje ndabasiga bavugana ngenda ndibuka uwo musu Diego na Gael bahuriyeko ingene nagize ubwoba.

Nasubiye kubona ba bagabo budupira twirabura bacanacanako bahigisha umusuma nawe akaba yari petit frère nisanga ntanguye kubabara nsubira muri kahise aho nakangutse Gaël ampamagaye ati:"Kessy Diego ashaka kugenda ingo umusezere"

Naciye mvayo ndakaraba nca ndaza nti:"Aka kanya uzugiye"

Nawe ati:"Ego sha Kessy amasaha aritereye ubu ko ndahabonye nzogaruka ejo"

Naherekeje Diego ndamushikana ku modoka nti:"Diego merci pour tout nukuri sinzi ingene nogushimira"

Nawe ati:"Hmm hariho uburyo bumwe wonshimiramwo"

Jewe numvise ngize amatsiko nti:"Ok bumbwire sinza gutevya kubugushimiramwo"

Nawe ati:"Uri sûre?"

Jewe nti:"Et certaineeeeuu"

Yaciye akora mumufuko akuramwo terefone acaramperezwa ati:"Andikamwo akanimerwa kawe rero sinotaha ukwo naje"

Jewe nanditse muri terefone nihuta nongera ntwenga nti:"Akira mama wanjye ndakurinde gutaha imbokoboko ndagusubirize mukoko"

Yaciye yakira terefone arabika mumufuko atwenga neza kuburyo ntahengeshanya kwirabira intwengo nziza ya Diego acambwira ati:"Gracias"

Yaranyegereye ansoma kwitama ansezera nca ndamubwira nti:"Buenas noches"

Nza numva avuze ati:"Wow kumbe urazi iki espagnol ? "

Nanje nti:"Hhhh eeh uzoze ndakwigishe"

Nawe ati:"Wow! Nanje ndumva ayo mahirwe atakintu nakimwe kwisi kizotuma ndayapfusha ubusa"

Yaruriye imodoka nanje ndahindukira ninjira nitwenga nkumwana mutoya nakibuka ingene ntanguye kuvugishwa indimi ntanazi nkumirwa nca nibuka ko umusi wa mbere mpura na Diego namusavye kuzonyigisha iki espagnol akanyishura ngo "ndihano ngo ndabakorere"

Nca nsubira gutangazwa nukungene mumyaka idakwira nibiri yateye imbere kuko umusi wa mbere namubona yarajewe kwakira abakiriye baje muri ya soirée Dorine yadutumiramwo ndetse nongera gusubira kumubona mwisoko adandaza impuzu zabana ubu naho tukaba duhuriye muri komite yurubanza rwa Charlene asigaye atwaza imodoka rwiye numva ndagize amatsiko yo kumenya inkuru y'ubuzima bwiwe.

Natangajwe ningene incuro zose nari maze kumubona ndazibuka neza nkaho umenga zibitse mu bwonko ahantu

zimpora hafi kuburyo ndazikeneye ntamanza gucumukura ndazirondera nca ndibuka numusi ndamubona imbere yibutike iraho arikumwe n'umukobwa ntangura kwibaza nti:"Nkubu wosanga urya ariwe mukunzi wiwe?"

Nca nongera ndiyishura nti:"Kessy bikuraba he none?"

Nashigutse numva Maman ambwiye ati:"Kessy ivyo uriko uridoga nkagakecuru ko muri rimwe nibiki?"

Naciye maramara nti:"Hhhh Maman rega burya n'imyaka si mike"

Papa yaciye adusanga tuvugana nza numva Maman abwiye Papa ati:"Papa Kessy urahomvye Kessy avuye kunyereka fiancé wiwe"

Jewe nkangutswe nti:"Maman ivyo ibintu ubikuye he?"

Papa ati:"Ayayayaaa ko ndumuhomvyi none? Kessy kutambwiye sha ngo nze kare nganirize umukwe?"

Maman ati:"Si nguyo na Gaël mwibarize kandi sha n'umuhungu mwiza namukunze Kessy azogaruka ryari?"

Nabuze neza ico mvuga biba ngombwa ko ndabareka bakaremesha ikiganiro ku inkuru nanje yega ntazi Maman wewe yabivugana ubushizi bwamanga nkuwubifitiye ivyemeza nkabandanya kwumirwa aho nagiye numva avuga ati:"Basi mwe kuva mwakabaho har'umuhungu mwari bwabone aza kutwereka?"

Naciye niyumvira kandi nsanga kukaba nkako je nta muhungu nigera nemerera ko aza kundaba muhira uretse ko atanabagenzi benshi babahungu nakunda kugira.

Natabawe n'abanganga baje kuvura Maman bica biba ngomba ko dusohoka tuja kwicara hanze na Papa Gaël wewe yaciye ataha duca dusigara turaganira nza numva Papa ambwiye ati:

"Mukobwa wanje sinzi Igihe Maman wawe asigaje kwisi ariko ukwo biri kwose sikinini ndetse nanje ubwanje ndashaje ariko vyonryohera cane ngiye mbonye umukwe nkamenya ko nsize umukobwa wanje mu biganza vyiza nkagenda amahoro rega aha bushobora guca kabiri ugasanga na Gaël abaye inshingano zawe tutakihari"

Jewe nti:" Aaah Papa reka kuvuga ukwo kubera ngaho utuma ngira ubwoba"

Yanyishuye ati:"Mwananje kugira ubwoba nibisanzwe ariko gukoreshwa nubwoba nukumenja kuko ubundi kwisi ntacoroshe buri kimwe kirakomeye arico gituma kugira ubeho ugomba nawe gukomera kubirusha ndetse n'umusi ibihe vyagukomeranye ukuva bigiye kukurusha inkomezi uzokwiyambaze umuremyi aguhe iziruta kabiri izibihe uzoba urimwo kuko niwe yavuze ko atakizotugerageza kirengeye inkomezi zacu"

Nanje nti:"Urakoze Papa nzohora ndavyibuka"

Papa ati:"Ikindi naco ntuze wizere ibihe cane kuko bihinduka ningoga ariko uzoba maso kuko buri igihe kigira ico kiguhitanije kandi umunyamugisha ni uwumenya kunyakura ningonga ivyo igihe kimuhitanije kuko usamaye ubona bikurenganye ugasigara urimyiza ibamfu aho ndakubwiye umwana w'ubwenge yumvira mu nduru"

Papa yaciye ahaguruka yinjira indani nsigara nicaye aho niyumvira kurayo majambo nti:"Ibihe wosanga biriko bimpitaniza Diego nkaba ndiko ndasamara"

Natoye terefone ngo ndamubaze ko yashitse nibuka ko namuhaye numéro ziwanje ariko we atampaye rwiwe numva ndiyanse ntangura kwiylvisha ko nshobora kuba ndiko ndasamara ibihe bigashobora kundengana nkasigara ndimyiza ibamfu nkuko Papa yabivuga ariko nakwibuka ko ndumukobwa ngomba kwihagararako Diego akaba ariwe azotera intambwe ya mbere nimba vyukuri ari we mugisha ibihe bizoba biriko birampitaniza.

Nahisemwo gutekana nkarindira ko ampamagara canke akanyandikira kuko nari numva icangombwa nagikoze kuko nari namuhaye inimeru zanje maze nca ndinjira nsanga abandi gushika amasaha yitereye Papa agataha nkasigarana na Maman mbere turateba turazimya amatara nguma ndaba kwiterefone ko hari message yoba yaje ariko ndateba ndaheba ndafata umwanzuro wo kuryama numva ku umutima mbabaye igituma Diego yoba yashitse muhira ntanamenyeshe ko yashitse ariko nakwibaza nimpamvu mpangayikira umuntu tukimenyanye naho je namumenye kera nkayibura.

Ndavyibuka ko agatiro kari gatanguye kuntwara nza numva fone irahinze mvyuka ntazambaye nihutira kuyugurura ndaba iyo message nza mbona...

Agace 24

Narayuguruye ndayisomye yagira iti:"Gura Liberté yambere izimbutse kuri *407*2*1# hama uronke amasegonda 108 yo guhamagara Econet kuri 190F gusa"

Nasanze natwenge kuburyo natanguye kubona ko nshobora kuba ndiko ndata umutwe neza mukirundi hamwe nasubiye kuryama nimaramaza nca ndasinzira nasubiye kwikangura bukeye haje abangaga gutera umuti Maman siniriwe ndasubira kuza ndakebaguzwa muri terefone kuko natinye gusubira kumaramara.

Uwo musu ndibuka ko ryanarenze atagakuru ka Diego mbere mbandanya niyakira ntangura kwibwira ko nshobora kuba narihenze ku muhungu wabandi nkikinisha amareresi atabaho atazonabaho mu mutwe.

Ndibuka ko nasubiye gutora terefone ku musu ukurikira Dorine anterefonye anyibutsa ivyigikorane kiza kuba uwo musu nca nibuka ko namwemereye kuza kumuherekeza aranyihanikiza ko ntagomba kumwihinduka nimba ntashaka ko tubipfa nanje nisanga atayandi mahitamwo mfise uretse gushitsa ivyo nasezeranye uretseko ntanatahura impamvu itumye Dorine yitaho ico gikorane kuko ibintu vyo gusenga sinari ndabimuziko cane.

Ndavyibuka ko saa munani Dorine yarashitse bambaye neza na Don du ciel yari yabaye umusore nari ndanamukumbuye nca ndagenda nditegura ndibuka ko nagarutse ntangazwa no gusanga Dorine yicaranye na Diego bafise ivyo bariko bararaba mwiterefone batwenga ndakangukwa ariko kandi nibuka ko

narindiye ko anyandikira canke anterefona ndabura numva agashavu ndamufitiye nikenshi.

Naba numva nomwigumurako ariko uwundi nkumva atashimikiro mfise kuko ntasezerano mfitanye nawe nca ndavyihoze ndamuramutsa bisanzwe ariko nari numva ata majambo menshi mfise.

Bagumye baraba muri téléphone batwenga nkumva Dorine aravuze ati:"Raba honyene abantu bayilayikinze"

Diego ati:"Mana yanje rega kuba icamamare numusegonda umwe"

Dorine yarampamagaye ati:"Kessy aho rero we ntufise amatsiko yo kuraba ingene mwamayeee?"

Naciye nibwira ko ashobora kuba ariko amwereka ya mafoto yadufotora ca gihe mwisoko ariko nirinda kubitebako nti:"Je Ahubwo urambwira niwaheza tugende?"

Diego ati:"Eh mugarukira he?"

Dorine ati:"Tugiye mugikorane"

Diego ati:"Ntawobaherekeza none?"

Dorine ati:"Hmmm ahubwo watanzwe nyaruka"

Nari nabwiye Gaël ko ngira ngende aba arashitse tuca turahaguruka Diego niwe yaciye atujana mu mododoka yiwe Dorine akaba ariwe yaguma amuvugisha anamurangira aho tugiye nanje naguma nikinishiriza Don gushika dushitse ahari hagenewe kubera ico gikorane aho twashitse tuca twururukira ku mwango Diego abandanya kuja guparika imodoka tuca turamurindira kugira ntaze kuturondera aho twicaye ngo atubure.

Hari abantu benshi ku buryo wabona ko arigikorane citabiriwe nabantu benshi aho abajejwe kwakira abantu umwe yatwakiriye akaturongorera muntebe zamaja imbere natwe turamukurikira ndibuka ko nisanze nicaye kuruhande rwiburyo hari hicaye Dorine kuntebe ikurikira Don du ciel hanyuma jewe ndetse ibubamfu bwanje hari hicaye Diego.

Ndibuka ko atanumwe yasubiye kuvugisha uwundi igikorane gitanguye jeho nari numva nkifitiye agashavu Diego naho atashimikiro nari mfise uwari kumbaza neza.

Ndibuka ko hatanguye abaririmba aho indirimbo numva ziriyoshe eka wabonako ari abahinga gushika aho umwanya wageze uwariko arako modération arafata ijambo aha ikaze umutumire witeka ngo yari yaje ava hanze akaba yaje gushinga intahe yaho Imana yamukuye.

Nabonye haza umugabo w'umuzungu akiri muto yavugaga igifaransa numva aratanguye kuvuga ati:

"Nitwa Pasteur Henry nkaba ndumwe mu bo Imana yagiriye neza ikankura mu bapfuye ikangira muzima ndibuka, mfise imyaka mirongwibiri nicenda nkaba mvuka muri Français ariko imyaka myinshi nayimaze mubihugu bitandukanye kuko kuva kumyaka cumi naciye ntangura kuzunguruka isi nkumukerarugendo nongera mfata amasanamu atandukanye yahantu hatandukanye nkayagurisha maze nkabaho murubwo buzima bw'inzererezi.

Nari mfise ihangiro ryo kuzoruhuka isi yose ndayizungurutse kandi burya ihangiro nari mu kurishikako ariko ukwo imyaka yagenda niko satani yatera anyifatira nkatangura kuja mu ngeso mbi zubusambanyi kuburyo buri gihugu cose najamwo naryamana nabakobwa twahura.

Vyatanguye kwa nka igihe batangura kuza ndabaha ibiyovyabwenge kugira ndabakoreshe ivyo nshaka ndetse nkaba mfata namasanamu ataburenganzira ndabasavye hanyuma nkayashira kumbuga zanje zigahurumbirwa na benshi.

Ndibuka igihe kimwe ndiko nsubira iwacu indege narimwo yagize isanganya ntanumwe yarokotsemwo uretse jewe mu buryo atamuntu numwe yatahuye kuko ntanahantu nahamwe nigeze mvunika ariko ndibuka ko nameze nkuwuta ubwenge maze nca numva ijwi rimbwira riti:

"Henry raba ukikujwe n'imivyimba abapapa n'abamama imisore n'inkumi ndetse nibibondo ntanumwe mpisemwo kurokora atari wewe kugira niheshe icubahiro muri wewe! Genda uzunguruke ubwire amahanga ko ndi Imana itanga ubuzima nkabwaka uwo nshatse! Ko ndi Imana igendura ibihe nkahiramwo abo imvura irwira nabo izuba ryakira! Genda ubabwire ubutumwa bwiza kandi usabe imbabazi abakobwa bose wakomerekeje!"

Inyuma yo kwumva iryo jwi narikanguye nisanga mubitaro aho na Pasteur Frank aranyatuza ndakira Yesu nk'Umwami n'Umukiza kuva uwo musu ihangiro ryanje rirahinduka.

Mboneyeho nakaryo ko gusaba imbabazi mpfukamyeye hafi umukobwa haciye imyaka ibiri igihe naza muburindi naboreje hanyuma ndamushurashuza kunguvu ndamukangishije imbugita nongera ndamufata amasanamu ndamwandagaza imbere yuko nduga kuri Podium Imana yambwiye ko ari ngaha kandi afise umwana wanjye! Rero naciye bugufi nsaba imbabazi kubikomere vyose namuteye yumve ko aho ndi atamahoro mfise igihe atarandekurira ububegito bwanjye"

Agace 25

Ku vyukuri yahejeje kuvuga amasozi yatanguye gucuncubuka Dorine we vyari vyabaye ibindi yari yahogoye aho naciye ndamufata kurutungu ndamwongorera nti:"Igihe niki ngo umurekurire ndetse na Don abone Se atarakubaza ibibazo vyinshi"

Dorine yaciye aterura Don aca aratambuka bukebuke agana kuri Podium aho abantu bose bari bacereje abandi amosozi ariyo yivugira gusa maze Dorine yashitse imbere arurire no kuri Podium asanga aho mu Pasteur yarapfukamye Ariko ararira maze amuhereza umwana.

Ntamuntu numwe yamwitambitse kuko Don yarumuzungu cari ikimenyetso simusiga ko ari umuhungu wa Henry baje aho nasigaranye na Diego nisanze twafatanye ikiganza nanamwegamiye nguma ndira amarira y'umunezero nawe ntabisobanuro vyinshi yambajije kuko inkuru nuwarayumvise iryambere yarayitahura.

Igikorane caheze mumarira y'umunezero yabari bakijemwo aho nibuka Dorine yazanye Henry aho yari aje kuturamutsa maze natangajwe nukuntu Diego yahuye na Henry akamwibuka kuko bamenyanyiye kuri ya Hôtel Diego niho yakora kandi na Henry niho yari aricogihe ninaho vyose vyahereye.

Vyabaye ngombwa ko Henry aca adutumira aho yari yashikiye twese tuca turajayo iryo joro ryabaye ryiza Dorine maze igihe kiragera turataha jewe Diego yaciye anshikana kubitaro aho inzira yose twagenda turasubiramwo ivyabaye mugikorane.

Ndibuka ko kubera amasaha yari yitereye Diego ntiyinjiye kuramutsa Maman yambwiye ati:"Undamukirize Maman nzogaruka kumuraba habona"

Nanje nti:"Isawa wakoze kandi"

Nawe ati:"Sorry kandi ntugira ngo urya musi narakwihojeje ariko nagumye ngerageza kukurondera kwirya numéro wampaye ndakubura ushobora kuba warihenze mukwandika kuko bambwira ko itabaho"

Yanyeretse inimeru ndayiravye koko nsanga narihenze igiharuro kimwe nanditse ubusa mugishinga ca cenda nca nisanga nje munyamakosa numva ndasubiye kwiyanika nti:"Yoo Pardon nukuri narihenze aha hari 0 ni 9"

Yaciye ampamagara ati:"Hmm reka mverifyee daaa igiti ntikize kunkora mujisho kabiri"

Yarampamagaye irasona nanje nca ndabika numéro rwiwe aca aransoma kwitama ambwiye buenas dias vyasigura ijoro ryiza ariko ataragenda nibutse ko Gaël atarataha nca ndamusaba amunshikanire muhira kubera bwari bwije aremera nanje nca nsigarana na Maman yaza yasinziriye.

Nicaye impande yigitanda nitegereza Maman yarasinziriye ntangura kwiyumvira ku buzima nti:

"Ubuzima n'iki koko? Ninde muhinga yohagarara kwisunzu ry'inzu akemanga ko yatahuye ibanga ry'ubuzima! Ko mbona umuntu amenya iyo yavuye atamenya iyariko araja? Umenya ukwo waramutse ariko ntushobora kumenya ukwo buza kwira umerewe! Ibihe vyovyo bite vyavyo ko bigenda bikurakuranwa umenga bihiganirwa kudutangaza ukwo bukeye ukwo bwije!

Henry yavuze ko Imana ariyo igenga ibihe? None ifatira kuki mu kubigenga?"

Nabandanije kivugira mumutima aho nasanze nasinziriye aho nyene nicaye kugatebe umutima ndawubitse kubibero vya Maman nasubiye gukangurwa na terefone isonye ndavye mbona ni Diego nca ndafyonda ok nti:"Allooo Diego washitse neza?"

Nawe ati:"Ego Kessy ndashitse neza gusa ipine ryantobokeyeko ngira nshike nca manza kurihindura nico gituma ubona natevye gato"

Nanje nti:"Yooo pole sana ariko Imana Ishimwe ko washitse impore ukwo biri kwose"

Nawe ati:"Merci sha Kessy none ndakureke uryame kuko ndazi ndagukanguye"

Nanje nti:"Oya ahubwo nari nabuze itiro"

Nawe ati:"Oh pole sana urarwaye?"

Jewe nti:"Oya ni juste kubera ndi kubitaro"

Nawe ati:"Biguye neza kuko nanje numva ntashaka kuryama duterame rero?"

Naciye mpaguruka kugira nsimbandanye kuvugira iruhande ya Maman ngo ndamukangure maze nza kwicara hanze turaganira hafi kudukerako.

Ndavyibuka ko na Diego yatevye agasohoka tugatangura guharura inyenyeri zari kwijuru dupfindana akayaga gakanye gahuha nkumva ndaryohewe bidasanzwe.

Nasubiye kwiyumvira ku kungene umuntu ashobora kuza mubuzima bwawe hanyuma agatuma wiyumva ukuntu

gutandukanye ndetse ukumva uranezererewe kuba umufise atamafaranga canke ibikwegana aguhaye ariko ugaha agaciro ukubaho kwiwe ukumva mumutima udukeranya ko ar'Imana yamukurungikiye.

Nasanze mubuzima ukwo ukura nikwo ugenda urabona abantu babaye kirumara mu buzima bwawe, bamwe ubitahura bamaze kugenda abandi ukabitaahura mukiri kumwe ufatiye kumpungenge nubwoba uba ufitiye kubatakaza.

Nasubiye kwisanga mu buryo ntosobanura Diego ariko arafata ikibanza kinini mu buzima bwanje na cane cane ko muri yo misi twariko dutegura ubugeni bwa Scott na Charlene bikanahurirana turi Parrain na Marraine ibintu vyari bitangaje.

Dorine wewe yaramaze imisi ataboneka ndibuka ko umusi umwe bazananye na Herny kundaba ntangazwa nukungene yari yarahindutse bigaragara ko kuva ahuye na Henry ubuzima bwari bwarahindutse yari yitaweho bihagije ndavye ku rutoki ntangazwe no kubona impeta nti:"Dodo ndiko ndarota canke?"

Nawe ati:"Oya nimpamo cambu c'abanyarwanda!"

Nanje nti:"Sha warikoranye nta no kumbwira?"

Nawe ati:"Oya sha sinikoranye Ahubwo vyabaye gihutihuti kubera Henry yashatse ko tuzoca tujana kubana muri France rero kugira andonkere Visa vyabaye ngombwa ko tugira état civil ariko nta célébration twagize kubera vyabaye ibintu vyihuta a-ha rero ndindiye urubanza rwa Charlene ruvemwo hanyuma tudume ikirere"

Numvise nezererewe ubuzima bw'incuti yanje Dorine kuko nakubita agatima ku marira yarize no kugasuzuguro yagize ndavuga nti:"Umwanya n'umuganga pe! Ntawukwiye gutanga

Imana kwihebura nukuri! Mugihe umuntu aba agihema ntiyarakwiye gutegwa ubwoba n'ibihe yogeramwo kuko buraca bugacana ayandi kandi ntajoro ridaca."

Ku musu w'urubanza rwa Charlene nari namupindiye ibirori birarema bararahira imbere y'a Patiri amashi arakomwa ndetse namasanamu meza arafatwa kuko umusi wagomba kuba intibagiranwa.

Ndibuka abageni bariko barasohoka abantu nabonye bariko baraganira nkangukwa binanira kwifata...

Agace 26

Nabonye Papa wanje ariko avugana na Maman Charlene kuberako bari bahageze iruhande yinzira abageni bacamwo tubashikiye narikanze nsanga nafashe Charlene nti:"Chacha ivyo ndiko ndabona nivyo wewe uriho urabona?"

Charlene ati:"Hewe nubu sindiyumvisha neza ahantu Papa wawe na Maman wanje bazinaniye"

Twarabashikiye baraturamutsa bongera bakeza Charlene na Scott hama je sinatweye kubaza Papa nti:"Papa! Maman Charlene muzinanye hehe?"

Papa atwenga ati:"Hmm ninkuru ndende bana banje ariko mubusore n'ubukumi bwacu twari incuti zidasanzwe ubuzima nibwo bwadutandukanije umwe wese acafata inzira rwiwe ariko nkuko ikidahura ar'imisozi raba turahuye"

Papa yabivuze mbona umenga aciye agenda kure muvuyumviro maze Charlene niwe yaciye avuga ati:"Mana yanje je mbandanya kwumirwa"

Twabandanije guherekeza abageni aho batashe bakihindura maze turagenda gusangira nabantu bahafi y'imiryango gushika aho urubanza rwarangiye umwe wese afata inzira yiwe aragenda nsubira kubona ko burya kwubaka nyezina atari ibirori kuko mwuwo mwanya naravye ukuntu twese twikubuye tugasiga inzira amavuta Scott asigarana na Charlene atawundi ahari ndavuga nti:

"Ubundi uretse ko ar'umuco ibi birori vyose bihindura iki kubuzima bwa babiri? Ubu bagiye gusigara barigwanako inyuma yo guterekera abarundi bakanywa bagahimbarwa! Hatabuze benshi bafata amadeni bakishira mukangaratete

kugira na gusa bakore ukwo abandi bakoze hama bwaca kabiri bakagwana no kubaho mu gihe atatumwe azosubira no kubabaza ukwo babayeho canke ngo abahangayikire. Ibintu vyo kwisi n'akayoberabahinga"

Ndibuka ko uwo musu nashitse kubitaro amasaha yitereye aho Diego yashikanye nkamusezera maze ntangazwa no gusanga Maman ari maso ariko asoma bibiliya nca ndamubaza nti:"Maman vyagenze gute kugira ube ukiri maso aya masaha?"

Maman nawe ati:"Basi wibaza ngo ububabare numva burankundira gusinzira natwatunini twububabare twaheze rero nabuze uwo ndadutuma chéri"

Jewe mbabaye nti:"Yooo Maman pardon nukuri natevye reka nje kuturondera"

Nawe ati:"Oya gomba wirekere ubu ndazi no kuri pharmacie bamaze kwugara ahubwo Ingo ube umbwire ukwo urubanza rwagenze"

Maman natanguye kumugira kumuriri nongera ndamwereka amafoto aho nacye nibuka nca ndamubwira nti:"Ahubwo Maa uzi ko Papa azinanye na Maman Charlene? "

Maman nabonye yikanze ati:"Nyereka ifoto yiwe ndabe?"

Nakomeje guhigisha muri galerie ngira amahirwe ngwa kwifoto Papa na Maman Charlene bifotozaniye nca ndayimwereka ayiravye arayitebako nza numva hacye akanya ambwiye ati:"Kessy ndagusabe ikintu kimwe"

Nanje nti:"Mbwire Maman Ntakibazo"

Nawe ati:"Ejo aho bukeraga uzokore ibishoboka uyu umuntu umunsabire aze ndamukeneye cane"

Jewe ntangaye nti:"Maman ariko si ndiko ndatahura na kimwe umushakira iki?"

Nawe ati:"We urankorera ivyo ndagusavye kandi ndakwingize uze ubishiramwo inguvu sikwo ga Kessy?"

Jewe nti:"Sawa nzogerageza"

Maman ati:"Nsezeranya ko uzobinkorera!"

Nanje nti:"Ndabigusezeranije Maman"

Yanyishuye ati:"Urakoze" acararyama nanje nari numva ndushe cane nca ndaryama nasubiye kwikangura abaganga baje muri tour bica biba ngombwa ko mvyuka nkatunganya icumba kugira muganga yinjire hameze neza.

Abaganga bamaze kugenda ngomba gukora ibishoboka vyose Maman nakamuzanira Maman Charlene nkuko yari yabinsavue nanje nkabimwemerera maze ngira amahirwe Diego aba aranterefonye ati:"Marraine waramutse uri en forme ngo tuje kuraba ukwo abageni baramutse nabo?"

Nanje nti:"Hhhh uti tuje kuraba ukwo baraye barirwanako?"

Nawe ati:"Hhh nyene tugomba kubandanya inshingano zacu nka Parrain na Marraine"

Nanje nti:"Ahaa ndumva ntagahengwe"

Nawe ati:"Ntagahengwe ariko ngaha nugucumukozi kuko ushobora gusanga vuba aritwe tuzoba turamukiwe"

Nanje nti:"Hmmm aho wosanga uvugishijwe reka mvuga amen"

Diego yaraje kuntora turagenda adusanga abageni bavyutse mbere hari hasanzwe hariho nabandi bashitsi muri salon maze je naciye mfasha Charlene kubakira gushika umwanya nisanze turi mucumba kimwe na Maman Charlene nca ndamubwira nti:"Maman Charlene rero harumuntu yakuntumye"

Nawe ati:"Inde ga kibondo canje?"

Jewe nti:"Maman wanje yambwiye ngo aragukeneye cane"

Maman Charlene yarafise isahani mu ntoki nza mbona iramwiyatse irakoroka no hasi ngo mwaa! Iba iramenetse ndakangukwa nti:"Nibiki? Habaye iki Maman Chacha?"

Na Charlene yaciye yinjira kubaza ikibaye nza numva Maman Charlene aravuze ati:"Yoo bibondo mumbabarire amaboko yanje arampemukiye"

Je naciye nunama negeranya ibipande maze Charlene amubwira ati:"Ntanakimwe Maman nibisanzwe ahubwo Imana Ishimwe ko itagukomerekeje"

Yaciye asubira muri salon hama nanje ndabwira Maman Charlene nti:"Ako karagacyemwo none wanyemereye ko tuza kujana kuraba Maman?"

Yagumye andaba mbona mumaso hiwe umenga afise ubwoba bwinshi nyoberwa ivyarivyo nanje nkomeza kumubaza ariko aguma ahoze haheze akanya nca ndamubwira nti:"Maman wanje ari mubitaro arwaye cancer kandi asigaje imisi iri ku rushi yo kubaho sinzi igituma yansavye ashimitse ko nokora vyose kugira umusange ngo aragukeneye cane kandi nukuri niryambere mbonye Maman asaba ikintu yinginga"

Maman Charlene nabonye akubita ikimenyetso c'umusaraba acasoma kwishapure haheze akanya aranyemerera ati:"Ushaka

rya Yezu ni riranguke nayo jewe ndaza iyansimbije urwambere niyo izonsivya nurwagatanu"

Igihe carageze mbona akazi karagabanutse niho naca nikebukanya Charlene nkamusaba ko ngira nitize Maman wiwe ndamubwira ukwibintu bimeze nawe aravyumva hanyuma tuca turagenda no kubitaro ngo ba!

Nibuka ko maman charlene yagenda aravuga ibisabisho munzira nkayoberwa impamvu ibimutera niho twashika kumwango nkugurura icumba bahuje amaso nagiye mbona...

Agace 27

Nuguruye umuryango Maman amubonye nabonye amosozi amukorokana atangura kurira ngira ubwoba Maman Charlene nagiye numva avuze ati:"Domitila imyaka yaraje iragenda insigira vyinshi ndabika ariko mu vyo nabitse inzika ntakibanza nari kuyironkera! Nahoze ndagusabira ngo Umuvyeyi wacu Bikira Mariya aze agutabare kuko ndabizi ntiwari worohewe rero wumve amahoro narakubabariye haheze imyaka myinshi"

Maman yaciye amwishura ati:"Narahemutse mpemuka mbizi kandi mpemuka nibigirankana, ntamahoro n'umuhemu nukuri iyi myaka yose nabayeho nicuza guhemuka kwanje! Nitwaje igikenye n'amafaranga maze ndakunigira muri yose ndakubuza kwibanira n'uwo wari waragabiye umutima wawe kubera ishari n'ubugome bwanje! Eka noneho Imana yarampaye igihano kinkwiriye Ubu mbye muburibwe bw'umutima n'umubiri ariko ndakwingize ndabizi sinkwiye nokwumvirizwa ariko reka ntere igere ryanyuma ndakwubahuke mu bimaramare vyinshi no kwicuza kudasanze Dasira mbabarira ndakwingize!"

Maman Charlene yamwishuye ati:"Humura ncuti yanje jewe nakubwiye nakubabariye kera! Erega noneho wantwaye umugabo ariko ntiwantwaye umugisha! Kuko Imana yarampezagije uwundi mugabo ankwiriye maze ndamuvyarira hungu na kobwa n'umukwe naraye ndonse! Birya vyabaye Imana yavyemeye ko biba ntiyihenze!"

Jewe aho nari ndi nari naruciye ndarumira ico nakora gusa kwari ukurira kubera amarangamutima menshi ndaba ingene Maman atakamba asaba imbabazi yahawe kera nca ndabona ko burya koko kubabarirwa ni kimwe ariko kwibabarira n'ikindi.

Nasubiye kwumva Maman avuga ati:"Nari narasavye Imana ntizondeke ngo ngende ntagusavye imbabazi none Imana nyagusengwa ntiyanyumviye ubusa yumvise amarira yanje none iranyishuye ubu ndashobora kwigira amahoro"

Nasubiye gusubiza amaso inyuma ndibuka ibintu vyinshi, nibutse igihe Papa yansanga mucumba akambwira ko yicuza ibintu vyinshi agasiga ingodo kugitanda nkabonamwo agafoto kumukobwa yasa na Charlene kumbe yari Maman Charlene akiri inkumi.

Nasubiye kwibuka umusi tugira tuduge kwa ba Charlene ko Papa yitegereje cane Charlene akamubaza iwabo à hariho nabiwabo sintahure ico yaragamije ariko vyose nagiye kubitahura uwo musu ndabifataniye numusi nshika kwa ba Charlene Maman wiwe akambwira ko burukwo anyihweje ndamwibutsa umuntu kumbe namwibutsa Umuhungu yakunze mubukumi bwiwe akamubura atamwanse ariwe Papa.

Nca nsubira kwiyumvira ku bihe biranga ubuzima ndavugaga nti:"Ewe wa bihe rimwe na rimwe urakavya, uwo kubona uno musu uruyu ntiyomenya ko ejo uzoba wabaye uwundi? Umunyabwenge ninde? Ko uwucuditse nawe umusiga acuritse uwiruka agusize akagusanga imbere ukamusanganiza amasanganya mumasanganzira?

Umuhinga ninde ko buri musu udahengeshanya kudukinyuza mu kutwereka ko uwugerageza gukenyura akenyuka agasigara akanyeye ibimaramare"

Ibintu vyari bimaze kuba vyantera guhora mfitiye ubwoba n'amatsiko yibigiye gukurikira kuko nasanze mubuzima burya kahise naho koba kabi gute ntigatinyitse kuko kaba karahise nubwo rimwe na rimwe kaba gatekeye ivyibutso vyinshi

birimwo ivyiza n'ibibi ariko ukwo biri kose kahise kaba karahise.

Ariko kazoza kaba gatekeye amabanga gusa ariho bavuga ko umuntu apanga Imana igapangura kuko umuntu we ubwiwe aba afise ukuntu ashaka ko ubuzima bugenda kandi murundi agakora ijoro n'umutaga kugira ashike kwihangiro ryiwe yamara nubwo biruko rya banga kazoza kaba katubikiye niryo rishobora kuza giturumbuka muburyo utazi nisaha utazi ukabona riragukubise kandi rigakubita ahababaza hamwe ahari ibitwenge mukanya isase haba amarira muze ijuru rikubama ugasigara uri baza iyo umuco wahora ukumurikira wagiye.

Mu buryo butangaje Papa na Gaël binjiriye rimwe bahahuriye nkaho umenga bari babivuganye kuko twisanze umuryango wose ukwiye maze Papa yikanga ahahuriye na Maman Charlene acaramenya icabaye.

Maman yaciye asubira aravuga ati:

"Papa Kessy, nawe Kessy na Gaël! Nashaka ndabashimire kubona mwarabayeho! Urugendo rw'ubuzima bwanje rwarabaye rurerure ariko ndavyumva ko ntakabuza ubu rurashitse ku musozo! Singiye mbabaye kuko mfise ico njanye ndetse nkagira nico nsize! Ubundi bwo ubuzima n'iki? Ko buba bumeze nkumwirutse yiruka asiganwa nigihe agasiganirwa kugera ku munezero aba yizera imbere ariko ntamenye kumunezero nyakuri w'ubuzima atari uwo aba yiteze ahubwo aba aruwo afise ubwo nyene! Rero jewe nimwe mwambereye umunezero mumbera ninkomezi zanje! Ndabizi aho mvuye hasigaye igihengeri kinini kuko ndabizi ko mumitima yanyu nari umudasubirizwa ariko buri kintu cose kigira intango kikagira iherezo bane banje muze mufatane mu nda kandi muze

mwumvire so wanyu kandi mwibuka ko hejuru yiwe hari Data wa twese ari Se w'impfuvyi muze muharanire iteka mwirinde guhitamwo nabi no guhemuka kuko itunga ryambere n'amahoro naho akaba atamahoro n'umuhemu! Ndabipfuriye gukomera gose nigihe muzoba mukomerewe muze mwirinde kuyamanika muze mube nkingabo ku rugamba maze muhangane nka Paulo navuze ati:"Ndiruka ariko si nkuwudafise iyaja! Nkubitana ibipfunsi ariko si nkuwuhusha!"

So wanyu akunda kubigisha akoresheje ijambo Ibihe! Mu buzima muze mumenye ko ibihe bikurakurana kurya kw'umurango n'ijoro bityo nimwagira amahirwe yo gutwenga muzotwenge mucunguza umwanya umwete kuko ntimuzoba muzi ikiringo musigaje co gutwenga! Ndetse nimwanarira muzorabe abo muririra kuko amarira yanyu ashobora kubera isoko ry'umunezero abansi banyu kandi nibanabanka muzokwibuke ko umwana yankwa ariwe akura!

Hanyuma inyuma yavyose ndasubiyemwo muze mumbabarire aho nigenjeje nabi amakosa yanje azobabere icirwa ndetse aho nananiriwe ntihabe ariho munanirirwa gutyo nzobona ko amakosa yanje harico yafashije bindinde kuzobandanya nicuza inyuma y'ubu buzima! Ndabakunda cane mwese!"

Maman yahejeje kuvuga twese twahogoye mumarira kuburyo twaciye tumuyambira twese mumarira menshi twasubiye...

Agace 28

Twaherutse tumuyambiriye tuguma tumuririrako haheze akanya twumva yahoze sinzi ukuntu navyutse ndavye mbona yasinziye numva umutima uramvuyemwo nikwo kubwira Papa nti:"Papa Maman ko adakakaza?"

Papa yaregereye ubona ko acitse intege amukora kwizosi ndetse ashira umutwe amera nk'uwumviriza ku mutima haheze akanya numva avuze ati:"Ntibishoboka!"

Jewe nti:"Papa nibiki bidashoboka?"

Papa yegamiye kuruhome mbona atanguye kumanuka mpaka hasi aca arambwira ati:"Bibondo! Mukomeze imitima iryavuzwe riratashe!"

Numvise ntashaka kuvyemera gushika aho nirutse guhamagara umuganga nawe aza aranyaruka ariko inyuma yo kuraba ibimenyetso ibitandukanye vyose vyemeza ko Maman yatuvuyemwo maze agahinda gataha mumitima yacu.

Twari tubizi ko asigaje igihe gito ndetse ko umwanya n'umwanya ashobora kugenda wanashima n'imbere yaho jewe ku giti canje nari naragerageje gutegura umutima no kuzokwakira ningoga ibizoba ariko natangajwe nukuntu nasanze bigoye kwiyumvisha ko Maman wanje agiye burundu ntazosubira kumubona na rimwe mu buzima.

Natanguye kwibaza ukwo ubuzima bugiye kumera Maman atahari nkumva ndihebuye ndetse ndabona ko ari intango y'ubuzima bushasha kandi butazoba bworoshe.

Imigenzo ukwo ikurikirana yarabaye ndetse mbona abantu benshi n'incuti ntari naramenye kuva nkiri muto ariho naje

kumenya ko burya bwose Maman yarafise umuryango tutigeze tugira amahirwe yo kumenya ariko twagiye kumenya amaze kutubamwo bintera kwibaza ikintu coba caratumye umuryango wiwabo na Maman badacana uwaka nca nibuka igihe kimwe nkiri umwana aho higeze kuza abantu ntari nzi bari baje bikoreye ibiseke nibintu vyinshi basa n'abagemuye ariko nibuka ko Maman yabankiye kwinjira aranana.

Ndibuka amajambo yabababwiye ati:"Inzu yanje siyo kuzanamwo imicafu yose barabahenze nimusubize iyo mukuye kandi n'uwundi musu ntimuzozimagirike ngo mutumbere iwanje mugende muhahweje neza"

Ico gihe nari nkiri muto sinashoboye kumenya insobanuro ya vyose ariko ukwo nakura nkagenda ndaca ubwenge nagiye kumenya ko Maman yari yarabaye wawundi akira agakira iwabo maze intarotaro zirasesa nawe ata agatarotaro aba aracye ibiraro vyamuhuza nabiwabo ndetse natwe tuburiramwo amahirwe yo kubamenya.

Ariko barabirenzako uwo musu baraza mu kigandaro ndetse no ku maziko ariho benshi natanguye kubamenyera maze nca nibuka igihe kimwe niga muri secondaire hari ikibazo twabajije umwigisha yatwigisha Philosophie.

Twamubajije turi:"Mwigisha tubwire impamvu incuti nyinshi zidaharurika zigaragaza umuntu apfuye aho ashobora gusanga umuntu yabayeho ubuzima bwose ari nyamwigendako ariko yamara kwitaba Imana abantu utazi iyo bazananye bagasidukana iyonka kumuherekeza no kumuririra no kumuvugako ibintu vyiza vyinshi?"

Ndibuka ko yatwishuye ati:"Ni ikibazo ciza cane kuko gisaba kwiyumvira no gutahura cane! Mu bisanzwe ubuzima ni

nk'ihiganwa! Muramaze kubona umwirutsi bakeza atarashika ku murongo ugaragaza ko yahejeje kwiruka?"

Twese twazungije imitwe duhakana nawe arabandanya ati:"Nukwo nyene! Igituma uzobona abantu benshi baza kuvuga ibintu vyinshi ku muntu yamaze kugenda nukwo azoba arangije ukwiruka kwiwe rero harya buri wese amuvugako ico yamumenyeyeko muyandi majambo ninko kumuha amanota.

Yamara rero nubwo birukwo si Bose baba bazanywe nivyoyutseko umuntu ari ikiremwa caremewe kubana nabandi ndetse murico hakaba harimwo ukwo guhora wipfuzakugumana n'abandi arivyo bituma umuntu apfuye benshibibakorako bikabananira gufata ibisanzwe, hariho abaza batazanywe no guherekeza uwabavuyemwo ariko Ahubwo baje kuraba ko vyukuri uwo muntu yagiye nya kugenda"

Nasubiye kwibuka ayo majambo nca ntangura kuza nditegereza abantu baba baraho mukigandaro nabaje ku maziko nkibaza nti:"Aha nta nkeka hari abaje kugira bemere neza ko yatevye akagenda? Ukwo biri kwose ntakabura imvo nabo bafise ishimikiro sinabarenganya"

Nasubiye gutahura ko ubuzima ar'urugendo uca muri vyinshi ndetse ugashaya no kuri benshi hamwe ukahasiga abakunzi ndetse ahandi ukahasiga abansi ariko muri vyose nasubiye kubona ko icangombwa mu buzima atari imyaka umuntu amarakwisi ariko amarira abandi mummyaka Imana ibayaramugeneye kubaho.

Imisi yaragiye abantu batugendera batera bagabanuka gushika hageze igihe ubuzima bukomeza tukamenyera kubaho ubuzima Maman atarimwo kuko burya habaho igihe co kurira n'igihe co kwihanagura nubwo aho Maman yavuye hahoze igihengeri

ariko twagomba kwiga kubandanya ubuzima naho bitari vyoroshe.

Diego yakomeje kumba hafi aho mbere novuga ko ari yo ncuti magara narinsigaye mfise na cane cane ko Dorine yari yajanyeye na Henry kubana muri France Charlene nawe yaragiye kwubaka urwiwe aho twabonana gakegake nti vyari bikimeze kumwe kwa kera tukiri kuri kaminuza nkuko babivuze ko ibihe biha ibindi.

Ariko nari numva gushika kuruwo mwanya ibihe ntobishwanira kuko nubwo vyari bifise ivyo vyari bimaze kuntwara kandi narashizeko umutima nshizemwo n'umuvyeyi wanje ariko kandi hari n'ibindi vyinshi ibihe vyagiye birampitaniza ntovuga ngo mare ariko Diego murico igihe yarasigaye afise ikibanza gikomeye mu buzima bwanje.

Ntakidadasanzwe twari bwapangane canke ngo tuvugane kubijanye n'umubano wacu ariko mu bihe vyose Nariko ndacamwo ntiyigeze antererana ndetse hari nigihe vyaba ngombwa agahagarika gahunda ziwe zose kugira aze kunyitaho nkigihe naba nihevye canke nakumbuye Maman.

Nubwo bitari vyoroshe kaminuza narayize ndayiheza ndetse kubera ko akazi katari koroshe kuronka naciye mpitamwo kuja kuba ndakora aho Papa yakorera akampemba kandi akampemba nkabandi bakozi atitaye ko ndi umwana wiwe ibintu vyatanza abantu benshi kuko iyo nakoze amakosa yarankarira nkuko yakarira abandi bakozi.

Ndavyibuka igihe kimwe narihenze hagira amafaranga abura turiko turakontorora ibidandazwa vyasohotse maze ambwira ashavuye cane...

Agace 29

Yambwiye ati:"Kessy? Aya mafaranga ko ntabona aho yagiye?"

Jewe nti:"Je nanje ntavyo ntahura kuko ivyasohoka vyose naravyandika namafaranga yinjiye"

Nawe ashavuye ati:"Uti rero kubwawe yaragurutse aragenda ukwo nyene atayagurutse je ko mbona ivyasohotse biruta amafaranga yinjiye? Nyarutsa unsigurire reka gufyina Kessy"

Natanguye kubura ivyo mvuga Papa nawe abandanya ankarira ku buryo nasanze narize ntangura kwumva umenga Papa nawe ariko ararenza urugero kuko sinumva ukuntu yontukagura ku mafaranga angana ukuraho ku buryo nasanze namubwiye nti:"Basi Papa uzokate muyo wompemvye uku kwezi hama amahoro ahinde kuko ndabona ko ifaranga iwawe rirusha agaciro ibiremwa vyose"

Hari hageze gutaha maze nca ntora ibikoresho ndahaguruka ndasohoka mbabaye ndibuka ko Papa yasigaye arampamagara ariko ndamwihoza mbandanya nigira aho naciye ntaha n'amaguru nca ntangura kwumva ndakumbuye Maman.

Burya nasanze iyo ubababaye wibagira ivyokuryohera vyose mu buzima ahubwo ukibanda kubikubabaza gusa aho nivyo wari waribagiye ugasanga biravyutse nca ntahura ko burya iyo umuntu ababajwe ababara bivanye n'agahinda yabitse mu mutima ari naho uzobona bamwe barizwa n'akantu wari ubona kari gasanzwe rimwe na rimwe ukibaza ko bigirisha ariko buri ryosozi ryose rizotemba ku maso y'umuntu uzorihe agaciro kuko agahinda umuntu abitse mu mutima kamenywa na nyeneko gusa.

Ndibuka ko nakomeje kugenda n'amaguru mbabaye niyumvira ko iyaba Maman yarakiriho ariwe nari kuja kuganyira, ntangura kubona umenga nta muntu nsigaranye mu buzima wo kuganyira kuko na Papa nari nsigaranye yaratanguye kunrya umutima.

Sinamenyeye n'igihe imvura yarwiriye kuko nisanze ndiko nihanagura amarira avanganye n'imvura mumaso aho natanguye kwibaza ko hari igihe nikirere cifadikanya natwe mugahinda tuba dufise kuko ni kikirirana natwe nubwo hari naho wosanga ar'uguhurirana gusanzwe.

Ndavyibuka ko nagiye numva umuntu amfashe kurutugu ndakangukwa mpindukiye nza mbona ni Jacquie naheruka kera nza numva arambwiye ati:"Kessy nibiki ko uriko urinyagiza?"

Jewe nti:"Sigaho sigaho nanje sinzi sinamenyeye nigihe yatanguye kugwa ahubwo reka mbandanye ndashitse naho imbere gatoya"

Jacquie yaciye ambwira ati:"Reka reka ndabona utameze neza ingo twugame mumodoka umbwire"

Jacquie yankweze ukuboko iruhande naciye mbona imodoka yarihaparitse aca arugurura ndinjira ndicara nawe aca hirya maze atangura kumbaza ashishikaye maze nanje nisanze naturitse ndarira aho vyabaye ngombwa ko andeka nkarira haheze akanya ntangura kumubwira ayo nari numva ngowe murako kanya.

Burya buri gihe ibikuriza biba vyihariye kandi biba bikomeye igihe cose bikikuriza ariko ikintu nabonye mu buzima nukwo iyo umaze kurengana ivyakuriza usigara ubona umenga

warizwa n'ubusa bivanye ningene munyuma wahuye n'ibindi bikomeye kubirusha ariko nubundi nivyo ivyoriza umwana sivyo vyoriza umutamakazi.

Nasanze burya bwose Jacquie duherukana kera mbere atanamakuru y'ivyabandanije kutubako yaronse yambwiye ko bamwivye terefone acaburiramwo numéro za Dorine kuko nizo yarafise zonyene maze aba aravuze ingene atubaza amakuru maze nanje nca mboneraho kumuha amakuru ya Dorine araryoherwa nanje nitegereza kumuha amakuru yanje noba ndamwiciye ibihe vy'umunezero.

Namuheye numéro nshasha Dorine yarasigaye akoresha maze ndamuha nizanje nanje mbika rwiwe nimvura yari yahise ndamusezera ndaduga ndetse muburyo butangaje nsanga nagashavu nari navanye kukazi kaheze burya kutagira uwo muganira biragatsindwa kuko nshobora gutuma wirirwana agahinda womaranye umunota umwe.

Nashitse muhira ntangazwa no gusanga Papa yicaye muri Salon ariko ntararengana numva arampamagaye ansaba kwicara maze ndicara nari niteze ko agira asubire kunkarira numva arambwiye ati:

"Kessy mwananje umbabarire kubona nagukariye ariko wumve ko ntari ngambiriye kukurya umutima ariko birya vyose nicigwa mba ndiko ndaguha! Rega ejo canke hirya yejo nshobora kuzoba ntahari! Rero ugomba kumenya ku mukazi atamarangamutima akora kandi amafaranga nubwo atavuze vyose ariko vyose bikenera amafaranga kugira bigende neza ari naco gituma utagomba kwirengangiza buri kimwe kijanye n'amafaranga ibisigaye navyo umbabarire nimba nakubise cane

nkubita ahababara ntababariye nuko ariho nashaka ko hakomera"

Umwanya umwe naravyiyumviye numva Papa avuze vyo nanje ndamubwira nti:" Papa urakoze"

Naramusezeye ngenda mucumba mbaza nja muri douche kugira nce nterama niteguye kuko haza hageze mwijoro.

Ndibuka ko navuye muri douche nca mba ndagaramye ku gitanda ntora terefone ntangura kwandikiranira na Diego nkukwo nakunda kubikora buri gihe naronka akanya niwe twaba turateramanye aho nibuka yambajije ati:"Kessy kandi ejo ndagukeneye ubona wombonera umwanya?"

Nanje nti:"Diego nawe urabizi ko ntokuburira umwanya bitagoranye gose rega urumu chr wanje hmm nako umugenzi wanje wo nkumutima"

Diego atwenga ati:"Aaah! Kuberiki umanje gukurikiza 'Nako' uzi ko nari ntanguye kuryoherwa ukaca wisubirako?"

Jewe ntwenga nti:"Hhh nubundi ururimi nirwo rwari runyereye ruvuga ivyo rudafitiye uburenganzira"

Diego ati:"Ok rero ejo mugatondo nzoguha gahunda ukwo imeze"

Ndavyibuka ko kumusi ukurikira Diego yandungikiye message y'ikibanza n'isaha atabindi ibintu arengejeko mpita menya ko isango ariyo nyene ariko ntangazwa...

Agace 30

Ariko natangajwe no kubona ikibanza hari hamwe habera ya Soirée twigera kujamwo na ba Dorine hamwe nahurira bwambere na Diego ariko kandi nkibaza ukuntu bigenze ngo bihurirane kuko Diego nari ndabizi ko atibuka ahantu twahuriye ubwambere ndetse nubwakabiri kandi gushika uwo musu sinari bwabimubwire nari narabigize ibanga numva umenga noba nisarishije ndamubwiye ko kuva kuncuro duhura ubwambere ntigeze ndamwibagira mugihe we atari anyibuka kandi sinagomba gutera intambwe ya mbere mukuntu na kimwe kuko naba numva nkumukobwa ntoba nihesheje agaciro mbere n'imico y'ikirundi ntibitwemerera umuhungu niwe agomba gutera intambwe ya mbere.

Ndibutse ko nakoze akazi numva mfise igishika nguma niyumvira kuri gahunda ya twe na Diego yo mumuhingamo w'uwo musu aho natangajwe no kwumva umukobwa twakorana ambwiye ati:"Kessy rigize indwi ndakubona uravye isaha bigaragara ko hari gahunda ufise ushuhiye bidasanzwe"

Nanje maramaye nti:"Yoo vya vrai? Hhhh"

Nawe ati:"Hhhh nagumye ndakuraba ndetse uguma ugira n'utumouvment twinshi dutandukanye nukwo wahora"

Jewe nti:"Ayayaaa ariko nawe urihweza nkivyo uba wabibonye gute?"

Nawe ati:"Hhhh ni kubera kuri kaminuza nakurikiranye Psychologie rero ibijanye n'inyifato zabantu ndabitahura ningoga"

Nanje nti:"None ukaba uri ngaha ukoriki kandi urumu psychologue?"

Nawe ati:"Nimpamvu z'ubuzima sha we ntubona ko hababa ubu umuntu akora ikibonetse kuko agashomeri karaha hanze ntawogaca"

Nanje nti:"Ntubeshe pe ubu abantu benshi baraganya"

Nawe ati:"Hanyuma a-ha nahe rero?"

Jewe nti:"Hmm kubera?"

Nawe ati:"Nyene mbwira kuriyo gahunda yagutesheje umutwe"

Jewe nti:"Hhhh sha nawe ntuheba"

Nawe ati:"Hhhh sinkunda kwinjira mubuzima bwabantu gusa uwo muntu ukwo biri kwose afise agaciro kanini"

Nagize amahirwe uwo mukobwa baca baramuhamagara agenda kwitaho abakiriya mukindi cumba nanje nsigara ndiyumvirako neza nsanga vyukuri uwo mukobwa ntiyarira gusema sinari ntekanye na bukebuke vyabaye ngombwa ko nsaba uruhusha Papa nkataha kwitegura nawe ntiyangora nca ndataha.

Vyukuri hari hakiri kare kuburyo nisanze ndi muhira saa tanu zigitondo Diego yampaye gahunda ya saa kumi maze ntangura guharura amasaha nsubira kubona ingene yikwega iyo urindiriye akanyaruka iyo ucerewe.

Nasubiye kwibuka inkuru Charlene yakunda kudutera tugatwenga tugakumbagara aho yatubwiye ukuntu umusi bwaca aza ibujumbura yaraye ntibuca akesha ijoro ryose yicaye ati:

"Neza naba numva nshuhiye gushika i Bujumbura kuko numva ko ivyiza vyose iyo vyakabaye ariyo bibarizwa! Ibaze ko

nikangura nzi ngo burakeye nkasanga haracari saa munani zijoro nasubira ninanata nkasinzira nkanarota ariko nikangura kandi nkasanga haracari saa cenda bica birangira ndabivuyemwo ivyo kuryama bunkerako nkanuye sije nabonye nduriye imodoka ndahashitse kandi vyukuri ndetse no kwirarira nararyohewe ndetse nubu mba numva nubwo iwabo w'umuntu haguma ariwabo ariko i Bujumbura hararyoshe pe!"

Nanje mwuwo mwanya nasanze ndiko nditwenga ukuntu naguma mparura Buri munota wavako ndawuraba kuburyo nagerageje kugorora ikanzu nza kwambara ndahanagura ibirato nza kwambara vyose ndabishira ku murongo kuburyo nisanze sasita nsigaje kuja muri douche nca ndicara ntangura kwiyumvira ikigiye gakurikira muruwo mwanya wose.

Nagize amahirwe mbona appel vidéo ya Dorine nca nditaba gutangura gutera inkuri kandi burya bwose nari ndamukumbuye nti:" Yaaambiiiiii"

Dorine ati:"Oya ndekaaa we waranyanseee"

Jewe nti:"Sha iyaba waruzi ingene ndagukumbuye ntiwarukwiye kuvuga ukwo"

Dorine ati:"Hmmm izo nkumbu zawe nziza bihehe ariko Kessy wokumbura umuntu ntunamubaze amakuru yiwe?"

Natanguye kubona ko koko Dorine yavuga ukuri kuko nari Naragiye ndatwarwa n'ubuzima ndibagira abo twasangiye akabisi n'agahiye nca ndamubwira nti:"Sha Dodo nukuri mbabarira iyi si niyo iduhenga ikadutwara tukibagira ariko nukuri sinakwibagiye ndagufise ku mutima uri mubantu bingirakamaro nahuye nabo mu buzima"

Dorine ati:"Basi ntunakumbuye Don?"

Yamurabishijeko caméra ntangazwa no kubona ukuntu yakuze numva Dorine amubwiye ati:"Ramutsa Tantine Kessy"

Yarampepeye nanje ndamupepera tuca tubandanya dutera inkuru ngira amahirwe y'a masaha aba aragiye bica biba ngombwa ko nsezera Dorine ndanamusezeranya ndabikuye ku mutima ko ngiye kwisubirako maze ifure ya mbere nayifataye muri douche maze mu mwanya muta nari mpagaze imbere y'icirori cari mucumba nguma niraba ngerageza gukosora buri kamwe naraba nkibwira ko katameze neza.

Aho nagiye numva umuntu adodoye nca ndungurura nsanga ni Gaël numva ambwiye ati:"Eeeh Sista ko wapendeje aha turagutorera hafi wewd?"

Nanje ntwenga ntu:"Hhhh merci nyene ngaha nanje sinzi iyo ngarukiea"

Nawe ati:"Ayaya ntamahirwe mfise! Aha nagira mfungure none Jérôme ambwiye ko utarafungura n'agira ndakubwire uze dusangire"

Niho nibutse ko ntigeze nibuka nuko ntafunguye uretse ko ataninzara nari numva mwuwo mwanya hari icari kimpangayikishije kurusha inrya nca ndamubwira Gaël nti:"Bro sorry nawe urabibona ko ukuntu namabaye ndi kuri à vos marques"

Nawe ati:"Ewana atarikindi uraza kwemeza ababono!"

Naratwenze ndasohoka numva arambwiye ati:"Kandi aha wosohoka urupangu utifotoje? Mbe we wabaye gute? Sinumva igituma Imana yakugize umukobwa kubera wibagira ivyabandi bakobwa bose bitwararika"

Gaël namuhaye terefone aba aramfotora gushika aho terefone yasonye mbona ni Diego ndayitaba ntatevye anyibutsa gahunda maze nanjeq ndasohoka maze ntangazwa no gusanga Papa aparitse kwirembo ndamubonye ndikanga nza numva nti:"Papa? Wanje ryari?"

Nawe ati:"Urira gusa ndagushikaneyo"

Nakomeje kwibaza vyinshi ariko ndurira nca ndamubaza nti:"Wamenye gahunda yanje gute ?"

Nawe ati:"Ntasyonzi nubundi"

Nanje nti:"None bigeze gute?"

Nawe ati:"Sinoyoberwa umwana wanje afise gahunda yagaciro kandi ndakwizeye ico wahaye agaciro Nico ca agaciro"

Nabwiye Papa aho ngiye anshikanayo nshitse numva arambwiye ati:"Nuko rero ndakwipfuriye amahirwe masa mukobwa wanje"

Jewe nti:"Merci Papa"

Nururukanye icizere maze Papa arakata aragenda nanje ninjira aho twategezwa guhurira na Diego ariko nakangutswe mbonye...

Agace 31

Ku vyukuri naratambutse ntambukana icizere kidasanzwe ahe nashitse kumwango ntangazwa no kubona Diego ahagaze ku mwango yambaye impuzu z'abakozi bo kuriyo hôtel aca aranyitanga ati:"Buenos dias señorita"

Nanje namwishuye ntwenga nti:"Buenos dias señor"
(Mwaramutse)

Nawe ati:"Como estas?"(Mumeze gute?)

Nanje nti:"Estoy bien gracias pero necesito sentarme porque me siento cansada!"(Tumeze neza murakoze ariko dushaka kwicara kuko twumva turushe)

Nawe ati:"Bienvenidas por favor"(Turabinginze murisanga)

Diego yari yaranyigishije iki espagnol kuburyo rimwe na rimwe vyashika tukakivuga rero uwo musu yanyakiriye muni espagnol bica binyibutse umusi wambere duhura akakivuga Dorine agatangura kumwita umuhindi nsanga natwenze nza numva arambwiye ati:

"Wow! Kessy uraberewe ntushobora kwibaza"

Nanje naramwenyuye nti:"Urakoze Diego"

Diego yateze inkokora nanje nshiramwo vyanje maze aratambuka nanje ninjira ndamwisunze numva nryohewe bidasanzwe niho yanyoborera mu nzira aho twaganye ahantu nkahibuka neza.

Hari muri kakarima kutwatsi duteyemwo udushurwe hamwe nagera muri rya joro nkasamazwe n'ubwiza bwaho nudutara twamabara twakamwo igihe yaca ahansanga ariko arondera uwo bita musuma nawe ari musanzaje Gaël nakwibuka vyose

nkibaza impamvu Diego atazirikanye umusi amateka yatwe nawe yatangura kwandikwa nkumva ndababaye bukebuke ariko nirinda kubitebako.

Hari hariho akameza nudutebe tubiri bigaragara ko tweteguwe kuko hariko nishurwe maze tuhashitse Diego arankwegera agatebe ndicara kuburyo mwuwo mwanya ntaneka nari numva ndumwamikazi w'umwami umwe Diego naho ntari bwabironkere uburenganzira kuko sinari bwimikwe murubwo bwami.

Diego yari yateguye buri kimwe mbere na jus nkunda arayinsukira maze anyicara imbere tuvugana turabana mumaso aho haheze akanya mbona ikiganza ciwe gifashe icanje maze aravuga ati:

"Kessy ndavyibuka rega! Wari umusi nk'iyindi kuko nari navyukiye ku murimo wa misi yose ndetse ihangiro ryari rimwe guhigisha ico rikeshu!"

Ndavyibuka ko wari umusi nari naje niteguriye kubona amasura y'abantu batandukanye ndabaha ikaze mu bwami bw'iyi hoteri ya murundi ariko sinari nziko hariho isura nza kwakira mu bwami bw'umutima wanjye!"

Jewe ntanguye nti:"Diego ushatse kumbwira ko urya musi uwibuka?"

Nawe ati:"Notuma nibagira itariki navukiyeko hako nibagira umusi nahuriyeko n'uwatumye umutima wanjye wongereza umuvuduko utererako"

Jewe nti:"Aaaah urambeshe kuberiki none incuro zose twahuye wigirisha nkaho utanzi"

Nawe ati:"Nari ndindiriye igihe ciza kandi noneho nivyo utazi burya ntitwigeze duhagarika kuvugana kuva rirya joro"

Jewe nti:"Hhhh sha Diego sinarinzi kubeshakubesha bigezaho we uretse wamusi mwisoko ntitwasubiye kuvugana duhuriye muri komite yurubanza rwa Charlene na Scott"

Nawe ati:"Hhhh reka ndakwibutse basi ndabona waravyibagiye"

Diego yanyeretse discussion y'umuntu naciye nibuka ko twigeze kuganira kuri facebook anyandikiye yari yitwa Dieudonné maze ndatangara nti:"Saaa? Ushatse kumbwira ko uyu yari wewe?"

Nawe atwenga ati:"Hhh yari jewe ntiwibuka ko nagusavye ko tubonana ukavyanka?"

Jewe nti:"Yooo sha sorry ariko nawe nta foto yariko kandi nizina urabona ko atari rwawe"

Nawe ati:"Birumvikana uretseko izina ryanje ryukuri nubundi ni Dieudonné ariko abagenzi nibo banyise Diego ariko ivyo ntitunabitebako"

Nasomye kuka jus maze numva arasubiye aravuga ati:

"Kessy sinatanguranye ubuzima nawe ariko aho bigeze numva nshaka gufata icemezo co kuzoburangiranya nawe ubinkundiye! Numva nipfuza guterana intambwe zose nsigaje mu buzima bwanje nawe! Numva nipfuza kwubakana kazoza nawe! Numva nshaka kurota ubuzima bwiza bwose nsigaje kubaho ndi kumwe nawe!"

Nabonye akora mu mufuko akurayo akantu yapfunduruye mbona akuyeyo impeta aca arapfukama imbere yanje kwivi rimwe numva aravuze ati:"Kessy mukobwa namenye nkagira

indoto yo kuba umugabo wontera Iteka ukanyemerera kumbera umufasha maze maze nkasezerana Nawe kuzogukunda ibihe vyose ugwaye canke ukomeye mumahirwe no mumarushwa?"

Nafashwe nibigumbagumba nsanga amosozi antanze kuvuga kubera vyukuri nari numva nezerewe bimwe bitovugwa kuburyo vyamanje birananira gusohora ijambo nagiye numva umuntu avugiye iruhande ati:"Vuga ego sha reka kuzempera"

Narahindukiye nca mbona Charlene hirya gatoyi ariko aradukamera maze nanje ngira ngire icomvuze terefone yanje yarasonye ndayikupa kuko nari numva iriko irambihiriza ibihe maze ngira ndamwishure nti:"Ndavyemeye" numva terefone irasubiye irasona nza numva Diego aravuze ati:"Urashobora kwitaba ntangorane"

Narafyonze ok nshira kugutwi ariko ndibuka ko nasubiye gutora ubwenge nryamyeye ahantu ntibuka na kimwe niho nagiye numva ijwi rimpamagara nkanuye mbona Diego anyicaye iruhande nca ndamubaza nti:"Aha ndi nihe?"

Nawe ati:"Ni kwamuganga Kessy"

Nanje nti:"Vyagenze gute ko mperuka twicaranye hamwe..."

Ntaravuga vyinshi nasubije ubwenge inyuma nca nibuka ko hari terefone nakiriye nibuka ivyo numvise ubwo nyene nca mpaguruka nkoma induru ndira cane nti:"Noooo ntibishobokaaa!"....

Agace 32

Nikanguye mbona Diego ari iruhande yanje maze nkiriko ndagerageza kumubaza nasubije ubwenge inyuma nibuka terefone nakiye nibuka ninkuru nabariwe aho vyananiye kwifata ahubwo nahagurutse nkoma induru ntabaza kuko sinashobora kwiyumvisha ko vyoshoboka Papa akaba yahitanywe n'impanuka y'umuriro wateye ku kazi aho twakorera.

Diego yarankurikiye arampamvya aramfata maze ntangura kumubaza nti:"Diego ndakwinginze mbwira ko ndiko ndibeshya ivyo nibaza ko bwoba ar'ubwonko bwanje buriko burankina nkaba ndiko ndarota?"

Diego yandavye kwakundi isura yiwe nabona ambwira ko ivyabaye vyukuri ari ukuri maze agahinda gataha mu umutima wanje ndarira ndasubira gushika aho nasavye Diego kunjana kuraba Papa akambwira ko bamaze kumushikana muburuhukiro bw'abapfuye maze ambwira ko nkwiye gutaha kuko muhira ikindi kigandaro cari natanguye.

Diego yantahanye muhira ndahasanga abantu bari baje kugandara, uwo musu nti vyari bishasha kuko ntanigihe cari giheze Mawe nawe ashengeye, ndavyibuka ko nasanze Gaël ahantu yicaye ndamwicara iruhande numva arambajije ati:

"Kessy Papa nawe aradusize nukuri! Ubu tugiye kuba abandi? Kuberiki Imana yavyemeye?"

Nabuze ico ndamwishura nkomeza kurira niyumvira nyene uburyo ki Imana ibandanya kwemera ivyago bikadukubita vyikurakunya ku buryo natanguye kuyibariza mu mutima nti:"Ubu naho uracasigaje iki ga Mana? Ko Maman na Papa

ubatwaye? Ese ubundi tweho wadusigiye iki? Ntiwoza ukatujana?"

Vyukuri nari mbabaye bimwe naba numva ico kigeragezo ntazokirengana, kwakundi wiyumvira ukumva neza ko kabaye atakigisigaye mbere n'ubuzima numvise atakanovera bugifise numva atanimpamvu nkibereyeho.

Nasubije amaso inyuma nibuka ibihe vyose twagiranye na Papa ndetse no gushika kuwo musu wanyuma wiwe nibuka anjanye mu modoka aho nari ngiye kuraba Diego nti:

"Kuberiki koko ntamenye ko ryari iryanyuma unganirije Papa? Kuberiki atanigicuro nigeze numva basi kimburira ko ndagukubise ijisho iryanyuma! Papa uragiye koko ntakweretse wa mukwe wahora umbaza iteka? Papa urigiriye urasanze Maman natwe uraturetse ubona udusigiye nde?"

Papa na Maman mwaratuzanye kwisi y'ibihye ariko muciyeye muhitamwo kwigira kare muduta twe nyene mubona tuzobaho gute? Nimuze murabe inzu iruzuye abantu atanumwe mwari mwaremereye guhonyozamwo ikirenge mugihari ariko ubundi mwabikoreye iki?

Ehe raba ubu tugiye gusaba abo mwimye ndetse tugiye no gusegerereza ku bo mwasesereje tugiye kubera abashumba za ncuti mutigeze mutwereka mukubaho kwanyu zimwe mwari mwarajugunye nkakanuka ariko koko murumva iyi si mudutayeko?

Ubu rero mwibereye hakurya muranezererewe kwongera guhura no kubana ibihe vyose natwe mudusize mugahinda katagira ukwo kangana?

Ariko kuberiki inda yanje itavuyemwo kuberiki mwandetse nkavuka kandi mubizi neza ko mvukiye amagorwa adasiga ayandi?"

Vyukuri agahinda kari kenshi ku buryo nidodombeye mumutima gushika naho numva binaniye kwihangana sinzi ukuntu hanjemwo icyumviro nca ndahaguruka ngenda bukebuke atamuntu mbwiye ndinjira no mucumba canje bukebuke ariko ngiye kwugara nabonye ukuguru kwitambitse mumwango binanira kwugara niho naciye mbona Diego yankurikiye nza numva ambwiye ati:"Kessy ntivyokunda ko ndakureka wenyene wohava ukora ikosa"

Jewe nti:"Diego ndakwinginze ndeka numva nshaka kuba jenyene"

Diego ati:"Fata nubundi ko ntahari ariko je sinshobora kukureka ahanu ha wenyene mubihe nkibi?"

Diego yaranyankiye kandi novuga ko yahabereye maso kuko nari mpagurutse mfise umugambi wo gushika mu cumba maze nkanywa ibinini vyose ndahasanga.

Burya harigihe ububabara ukumva ikintu co nyene gisigaye co kuruhura n'ugusinzira rya tiro ry'ibihe vyose kuko uba wumva ko hoho imiraho n'imibabaro woba uyisezeye nubwo atakivyemeza neza ko hakurya y'ubu buzima bitoshika umuntu agasangayo iyirengeye iyiri hakuno.

Nanje nari numva icipfuzo candudubizamwo muruwo mwanya carico gushira akaburungu kubuzima nisanzemwo ntahitishijwemwo kuko nibaza ko Imana iyi iza kungisha inama imbere yo kundema nari kuyibwira shaka wirekere kuko mwuwo mwanya nari numva ataciza na kimwe ubuzima bumfitiye.

Burya agahinda ni kabi nimwabona umuntu yiyahuye ntimuzokwihute kumucira urubanza kuko agahinda kamenywa na nyeneko ndetse nanje akari karitse mu mutima wanje muri co gihe kari kamwe ntigeze niyumvira ko bizoshika kakambako.

Kari kakandi wumva gakora hahandi hanyuma umuntu yoshobora kubabara akagarukiriza natanguye kwibuka Papa ambwira ko ibigeragezo duhura navyo mu buzima biba bihwanye ninkomezi zacu ariko kubera ko biba bigambiriye kudukomeza kurusha rimwe na rimwe birakubita cane tukumva turananiwe ariko ko ah umuntu yumva ananiririwe aba ariho hegereje nintsinzi yiwe.

Yamara je muruwo mwanya intsinzi yanje nareraguza impande zose nkumva ntanimirindi yayo ahubwo nkumva ndiko ndahera numva.

Diego murundi nta majambo menshi yambwira yakomeza kunyumviriza nidodomba n'amarira menshi agakomeza ku mfata no kunsegura igihe naba numva ndushe ndibuka mbere ko no mwuwo mwanya twari kumwe mû cumba canje yiwaye kugitanda nanje ndamuryamye ku bibero ndamuririrako.

Ndavyibuka ko nasubiye kubona turi mu bwato jewe na Gaël na Papa na Maman mbere tunezerewe ahantu mu kiyaganda tunezerewe ahantu atakintu nakimwe nicura uretse ko numva umutima wanje utekanye ndetse akamwemwe niko kangaragara ku maso gushika aho habaye ikintu tutazi iyo caturutse gikubita ku bwato twarimwo maze je na Gaël tugwamwo maze dutangura gusoma nturi.

Ndavyibuka ko nagerageza gufata Gaël twariko turibirana nkagerageza kumuduza hejuru kugira tubashe guhema ariko

bikanka icantangaza nuko nabona Maman na Papa basigaye mu bwato bagera kuzana amaboko ngo adukwege ariko ntibikunde ko badushikira...

Agace 33

Twabandanije tumanuka gushika dushitse hepfo kurere ariko ntangazwa no kubona harahantu hasa neza hari ibiti vyiza n'amashurwe uretse ko vyari bitaye mukiyaga epfo aho nasubiye kwikanga numvise ijwi rimpamagara nca ndasahuka nikanguye nca menya ko nariko ndarota ariko niyumviye ku ndoto nari mpejeje kurota nca nibuka indoto Papa yahora akunda kumbwira ko amaze igihe arota zasa nizo nari mpejeje kurota.

Nabandanije kwiyumvira kukintu zoba zisobanuye kuko numva ko ntankeka atari ndoto bisanzwe ariko zifise ico zivuze kubuzima bwacu.

Ijwi ryampamagara yari Gaël yariko ambwira ko bwakeye mvyuke nitegure tugende gupfuba data.

Imigenzo yose yarakozwe mugahinda ntangere gushika igihe kigeze tugataha, nka kumwe kwa cagihe nyene abantu ku musu ku musu batanguye kugenda bagabanuka abaza kuturaba no kutubaza ukwo tumerewe gushika igihe twisanze dusigaye mu nzu jewe na Gaël.

Ndavyibuka twari twicaye muri salon maze Gaël arambaza ati: "Kessy none ubu naho hagiye gakurikira iki?"

Ikibazo Gaël yambajije carankanze kuburyo nanje nacibajije nkumva inyishu yaco si ndiko ndayibona hafi, sinari butonde kukazi kuko hari harahiye natanguye kwibuka Papa ambwira ko kwisi buri kimwe gikomeye kandi ko umuntu ategazwa kuvyukira buri musu gutera intambwe nshasha kugira ubuzima bukomeze kandi ko bisaba gukomera kurusha Buri kimwe.

Mwuwo mwanya nutegereje Gaël musazanje maze nibuka ko ndimfura mbere nibuka ko arije umuryango afise gushika kuruwo mwanya nibuka ko arije ahanze amaso nca mbona ko igihe cageze zahinduye imirisho ngomba gukura vyanka vyakunda nkateka imitwe y'ukungene ubuzima bugomba kubandanya ukwo vyomera kwose.

Iciyumviro canjemwo carico kuja kuri bank nkaraba kuri konte y'a Papa amafaranga ariko kugira ndabe imisi dufise yo kuba turamaze kabiri.

Ndibuka ko twiteguye na Gael turagenda Banque papa yakunda kujamwo nari ndayizi ndetse nanje kuva aho ntanguye gukorera nari nugurujye agakonte ko kuza ndabikamwo udufaranga naca kuko nubwo imisi mibi yari I ndindiriye ntari ndayizi ariko mpwemu w'Imana yari yaramvugiyemwo mba nyamutegerakazozza nza ndakora mbika.

Ndavyibuka ko twashikiye kuri accueil umugore yarahicaye aratubaza ico turondera nanje ndamubwira ukuntu ibintu bimeze atubaza amazina y'umuvyeyi wacu ndamubwira ariko mbona mwisura yiwe harahindutse numva umutima utanguye gusimba acatubwira ati:"Yoo mwihangane bibondo kwisi nikwo bimeze vyinshi tubona bitubako tukababara ariko bikaba ngombwa ko twakira ivyo tutari buhindure"

Namwishuye nti:"Urakoze"

Aca atubwira ati:"Rero amakuru murondera hari uburyo bicamwo kugira mushobore kuyahabwa kuko nubwo muri abana biwe tuba dukenye ikivye meza imbere y'amategeko ngira ndabandikire ibisabwa muce mugenda kubirondera muzoheza mugaruke hama tubahe amakuru mwipfuza"

Uwo mugore yatwandikiye kurupapuro impapuro tugomba kuzoja kurondera aho harimwo izo tuzokura muri komine kubitaro n'ahandi hatandukanye maze turasubira inyuma niyemeza ko nzobirondera ku musi ukurikira.

Nari kuri volant ndiko ntwaza ya imodoka yari iya Papa maze niho nashika ahantu numva nohagarika kuruhande maze Mbwira Gaël nti:

"Bro, urabona rero ko ibintu vyahindutse vyadukomeranye enda nyemerera unsezeranye ko tuzobandanya dusenyera ku mugozi umwe nzokubere mushiki wawe n'imfura yawe nawe uze umbere musazanje na mutoyi wanje mwiza"

Gaël yanyishuye ati:"Sister nukuri nzogerageza ukwo nshoboye yamara imbere si ndiko ndahabona neza"

Namwishuye nti:"Nanje ntaho ndiko ndabona ariko iconzi ntituri aba mbere babaye impfuvyi kandi nti turi n'abanyuma ndetse twe duhuriwe tunahishije harico abavyeyi badusigaranye rero numva nizera ko nitwafatana mu nda ko tuzorutsinda uru rugamba rw'ubuzima"

Mvugishije ukuri sinari mfitiye icizere ivyo ndiko ndavuga kuko aho vyari bigeze nari natanguye kubona ko mu buzima vyose bishoboka mbere vya bihe Papa yahoze akunda kumbwira ko bikura umuntu hamwe bikamushira ahandi vyishakiye nari nsigaye mpora ndabifitiye ubwoba.

Nubwo nashishikara kwumvisha Gaël buryo ki tugomba gukomera nubwo twari dukomerewe harikuntu naguma nikanga ikindi kintu gishobora kutubako ntazi ndetse codukura hamwe kikadushira abandi tutaziga muruwo mwanya maze ibintu bikabandanya kuyangara.

Niho naboneye ko natanguye kubaho mu ubwoba bw'urutavanako nsubira kwiyumvira igituma Imana yaremye ubwoba kuko ubwoba bwinshi tugira mubuzima s'ubwibihari ariko n'ubwibitahari tuba dutinya ko vyohaba canke ibihari tuba dutinya ko vyohava ariko vyose ubiravye neza ubwoba bunini nubwibihe bitabaho uretse ko biba biri mu bwenge bwacu.

Sinzi igituma arikwo Imana yaturemye ariko nizera ko itihenze ukwo biri kwose nubwo igihe kinini nabayeho numva ko icompa tugahura noyibaza ibibazo vyinshi nahoze nibaza nubu nkiriko na cane cane impamvu y'ubuzima n'impamvu y'ibihe bihindagurika bikaduhindagura nkudukinisho ukwo vyishakiye.

Kuruwo mwanya sinari nkiri wa mukobwa atakibazo yarafise navyuka nsanga vyose bihari nkagenda iyo nshatse ndetse nkakora ivyo nshatse vyose umwidegemvyo nari nsigaranye waruwo ngerewe ku munzane n'ibihe nari ngezemwo.

Ndavyibuka ko nkiganira nda Gaël nakiriye terefone ntangazwa no kubona Jérôme ampamagaye nca nditaba numva avugana igihunga ati:"Kessy nyaruka rega twatewe!"

Jewe nkangutswe nti:"Twatewe? Jérô twatewe niki?"

Jérôme yabandaniye avuga ati:"Nyabuna nyabuna bangukira ngaha muhira twatewe n'abantu ehe barinjiye...."

Agace 34

Ubwo nyene nandurukije umudoka ndayitwariza hejuru mu kanya gatoyi nari nshitse muhira kandi koko nsanga hariho imodoka zibiri ziparitse imbere y'umuryango w'urumangu rwacu nca mparika kuruhande twinjira tunyaruka maze tugeze indani nabonye abagabo bane ntangazwa no kubonamwo babiri bambaye udupira twa ya banque twari tuvuyemwo ndabegereye ndababaza ati:"N'amahoro?"

Umwe muri bo yarandavye arambaza ati:"Niwewe witwa Kessy?"

Jewe nti:"Ego mugenzwa n'amahoro?"

Nawe yarandabanye impuhwe ati:"Ntivyoroshe ariko turi mukazi kacu kandi ndazi ko ibihe muirimwo bitoroshe ariko kandi mubandanye gukomeza umutima kubera aha uku mutubona turiko turatembereza umukiriya agomba kugurira ino nzu banque papa wanyu yasavyemwo ingurane arwatirije none igihe cararenze amasezerano bari bahanye"

Jewe nkangutswe nti:"Saaa? Oya ivyo ntivyoshoboka?"

Umugabo ati:"Ufise amakenga nibaza ko wize urashobora gusoma kurizi mpapuro ukibonera amasezerano Papa wawe yari yagize na banki"

Nakiriye impapuro ndasoma kandi koko nsanga ivyo umugabo yavuga nivyo numva ubwenge buragiye hafi gutemba nca nicara kuntebe yari iruhande nza numva wa mugabo arambwiye ati:"Twahejeje gupatana n'umukiriya tugiye kurangiza amasezerano namwe murafise imisi ibiri kugira mube mwimutse kandi mukomeze ukwihangana"

Baragiye dusigara twicaye ngaho twumiwe ntangura kubona ko burya bwose bwa bwoba mporana bwo kwitega ibikurikira buba bufise ishimikiro.

Natanguye kubona ko burya bwose dushobora kuba turi muri ryajoro ridaca kuko nabona butera bwijima cane aho ni vyari bikigendeka vyatera bidegera.

Amarira yo nari nararize arateba arakama kuko muruwo mwanya ayanje yari yabaye amwe y'abagabo yarasigaye atemba aja munda.

Jérôme yansanze aho nicaye ati:"Kessy abo bantu bagezwa n'impore?"

Ndamubwira nti:"Jérôme tugiye kwimuka nubwo tutaramenya aho tugiye kwimukira ariko wumve ko gushike ejo tugomba kuba twavuye muriyi nzu"

Jérôme ati:"Oya ntibishoboka bigenze gute kandi?"

Jewe nti:"Jérôme vyama ari ntibishoboka gushika bibaye ahubwo wokumbura ukaba urarondera akazi ahandi hakibona nimba udashaka kwisangana mwibarabara natwe"

Nabwiye Gaël nti:"Musazanje rero ubu ibintu bibandanya bidukomerana aha ikigiye gukurikira nukurondera aho twimukira vyihuse kanagara muri yamarigala yawe urondere aba commissionnaire badufashe kurondera chambrette yo gupanga urondere n'abadufasha kurondera umukiriya w'izi imodoka ndetse n'ibikoresho vyo munzu tutazokwimukana"

Gaël yanyumvise ningoga aragenda nanje nsigara ndazunguruka mu nzu ndayihweza nibuka ibihe bitandukanye nayigiriyemwo ndetse aba commissionnaire ntibatevye gushika gutangura guhombesha ibikoresho vyo munzu ndetse nimiduga

twayigurishije kugiciro kiri musu yayo yari iciye ariko kubera twari mubibazo ntakundi twari bugira.

Ndavyibuka ko iryo joro nashoboye guharura amafaranga twari dufise ari nayo tugiye gutanguramwo urugendo rushasha rwo kwigwanako murubu buzima, yar' amafaranga ashika imiriyoni mirongo ine ntiyari make nari numva ntakekeranya ko azodutunga mukurindira ko ubuzima bufata amerekezo.

Naterefonye Diego ndamwiganira ukwo ibintu bimeze arababara ariko arampumuriza ndetse ndamuvwira nti: "Ejo rero nzoguha adresse nshasha yaho tugiye kwimukira"

Nawe ati: "Oya ntibikenewe kubera nzoza kubafasha kwimuka"

Jewe nti: "Diego nukuri merci kuri vyose"

Nawe ati: "Kessy nukuri n'ibisanzwe ariko wumve ko ndikumwe namwe muri vyose"

Navuye kuri terefone nsubira kwiyumvira nsanga mubagenzi banje umuntu nari nsigaranye yari Diego, niho natanguye kubona ko kwisi ibintu vyose biza bikagenda pe nasubiye kwibuka amajambo Maman yatubwiye ariko aradusezera aho yatubwira ko nitwaronka amahirwe yogutwenga tuzotwenge ducunguza umwanya umwete kuko tutazoba tuzi igihe dusigaye co gutwenga.

Mwuwo mwanya nibutse abagenzi banje Charlene na Dorine ariko ubuzima bwadutandukanije umwe wese agafata inzira yiwe tutankanye ariko igihe cacu cari cararenganye.

Nasubiye kwibuka umusi Charlene ambaza ati: "Muba mwiyumva gute iyo muba mu buzima nkubu?"

Nari numva mwuwo mwanya nogenda nkamubaza kwiyo ncuro nti: "Wiyumva gute ubayeho neza mu rugo rwiza?"

Mu buzima koko habaho kuduga no kumanuka uwukubonye hejuru uno musu yipfuzaga kuba aho uri ariko ntaba aza igihe usigaye kugira umanuka.

Mwuwu mwanyu nabonye neza ko igihe cokumanuka twa twari twagitanguye umusi Maman adutangariza ko arwaye Cancer yo mwibere kuko niho ubuzima bwacu bwatanguye guhindura amerekezo kera bwagenda buduga ariko kuva uwo musu butangura kugenda bumanuka.

Hari gihe rero umanuka ukumva ko wanarenganye hasi hamwe abandi wababona kera ubarabiyeye hejuru bakwipfuzaga ariko ukabacako urengana ukabandanya umanuka kuburyo nabo bakurabira hejuru ataruko baduze ariko ari kubera wamanutse cane ukajaga musu yabo.

Aho niho utangura kubaza Imana icyo wacumuye kugira iguhane bigeze aho ariko igitangaye nukwari igihe uba uri hejuru utabaza Imana icyo wayikoreye kugira igushyire hejuru y'abandi.

Ndavyibuka uwo musu Jérôme yaraye yimutse turara murupangu turi babiri jewe na Gaël uretseko jewe atatiro nari numva kubera kwiyumvira ibintu vyinshi ndetse no kwibaza ibibazo uruhuri ntashobora kuronkera inyishu mwuwu mwanyu.

Ariko sinzi ukuntu nagize uku mbona...

Agace 35

Nari numva nipfuza ko zonrya kugira bihere biheze ndetse niteguye kurangiriza ubuzima bwanje ngaho ariko sinzi ukuntu nuguruye amaso bukebuke mbona umuco witoroshi nca numva imirindi y'umuntu aho anshikiriye imbwa zaciye ziruka nza numva ijwi ndarimenya yari Diego yaje ariruka anshika amvyura aramfata ampamagara ubona ko yagize ubwoba bwinshi nca nditaba nti:"Diego ndeka nipfire nukuri"

Diego ati:"Kessy ushobora kuba uriko uca mu bikomeye kurusha nukwo novyibaza ariko nukuri ndakwinginze reka kwiheba bigeze aho umuntu agihema haba hakiriho ivyizigiro"

Nanje nti:"Ariko Diego uribaza ko hamwe wokwisanga mu kibanza canje wobishobora kwizera ko hakiriho ivyizigiro?"

Diego nawe ati:"Si ndabizi ariko ikibanza ndimwo uno musi kingobera kukubwira ko hakiriho ivyizigiro ntumbaze ico mfatiyeko mukubivuga ariko ndazi ko igihe umuntu aba agihema vyose birashoboka Imana ishobora kugukura kucavu ikakwicarikana n'abakomeye"

Nanje nti:" Kutavuga naho ko ishobora kugukura mubakomeye ikakujana ku cavu?"

Diego ati:"Kessy ushobora kuba wihevye kandi ndagutahura ariko je sinoguheba nubwo we wokwiheba ubwawe kuko uri insiguro y'ubuzima bwanje, kuva ndakumenye mpora numva ntokwiyumvira ubuzima na bumwe utarimwo rero ndakwinginze nimba utanashaka kwiberaho mberaho basi jewe nubwo ntazi ico mvuze ku buzima bwawe ariko ndazi ko ukwo biri kwose hariho agaciro mfise ku buzima bwawe"

Nasubiye kwiyumvira neza impa Diego ankundira nsanga namubajije nti:"Ariko Diego unkundiye iki mu igihe nanje ubwanje niyanse? "

Burya mu buzima hariho abantu Imana iturungikira nobagereranya nkabamalayika, babandi bama bagerageza kutudugiriza icizere mugihe tuba twumva icacu camanutse kikagera ku busa, babandi bataduheba n'igihe tuba tubona ibidukikuje vyose bitugobera bitwemeza kwiheba, baba ndi badahengeshanya kudukunda mu gihe natwe ubwacu tuba twiyanse, babandi batugobera kubaho mugihe twe tuba twarambiwe n'ubuzima babandi bahora bipfuzwa kutubona dutwenga bakanahigira impamvu hasi hejuru kugira ngo isura zacu zibonekeko ibitwenge mugihe twe tuba twumva icipfuzo kidudubiza mu mitima yacu aba ari kimwe kikaba kurira gusa.

Nukuri nibaza ko mu buzima woshobora gukubitwa n'ibihe ukisanga usigaye wera hamwe uba ubona ataco ucera ariko nivyagukubita bikibagira bikagusigira abo bamalayika ntuzovyanke rwose kuko bizoba bigusigiye akanovera ku buzima kuko ubundi nkuko abarundi bavuga ngo umuntu agira ubuntu ubuntu bukamuzanira abantu abantu nabo bakamuzanira ibintu igikuru mu buzima n'abantu.

Hako wogira ibintu atabantu ufise mubisangira bamwe wumva wishimiye kuba kumwe nabo wizeye ndetse batakuryarya bamwe bincuti babonekera mumagorwa, wotuma ubura ibintu ukabagira kuko ibintu vyoshobora kukumara inzara yo mu nda ariko iyo mumutima ukayihorana ibintu vyogutuma uba aho wipfuzwa ariko abantu b'umutima uhuye n'uwawe nibo bashobora kwumva unezererewe aho woba hose uri kumwe nabo.

Nasubiye kwiyumvira neza nsanga burya bwose Imana ntinyanka cane kuko vyibura narugurura amaso nubwo ntabona Papa canke Maman canke hamwe muhira hari buri kimwe nipfuzza ariko nkabona Diego arambuye ibiganza anyingingira kurambura ivyanje ngo ndabishire muvyiwe maze dukomezanye ubuzima nubwo ntabubona neza ariko mu buryo ntazi numvise akizere kariko karaza ku mutima mvugana nti:"Bihe wakoze nimiburiburi kunsigira Diego nizere ko nawe budaca kabiri ngo umujane"

Diego naramukundiye ndahaguruka maze ngenda ndamwishimikije nongera nihanagura amosozi nca ndamubaza nti:"Wamenye gute ko ndi ngaha?"

Diego yamanje ariruhutsa ati:"Sha basi wibaza ngo sinkuru ndende yoyo? Burya naguhamagaye kuri phone incuro nyinshi mugitondo numva ntiwitavye kuko nari naronse imodoka yo kwimuka mu nyuma maze kukubura kuri phone naciye mpitishamwo ndayizana ariko nashitse nakirwa nigufuri ku mwango mbajije ababanyi bambwira ko bakubonye ufata ibarabara.

Burya nazungurutse umuji wose ndondeza mbajije na Charlene wewe ntangazwa no kuba atanamakuru yawe afise kuko yambwiye ko muherukana ku musu wa enterrement rero niyumviye ibibanza vyose woba ukunda ndaheba sinzi ukuntu bumaze kwira hanjemwo icyumviro co kuza ngaha none ngize amahirwe ndahagusanga ukiri muzima uzi ko naguma mfise ubwoba ko woba wagiye kwiyaka ubuzima?"

Jewe nti:"Shahu wibaza ko incuro icyumviro kimaze kunza mumutwe noziharura? Ahubwo sinzi igituma ntari bwagishire mu ngiro uretse nubundi ko hatararengerana"

Nagiye mbona Diego ahagarika imodoka ahantu twari tugeze nza mbona arandavye aca atangura kuvugana ijwi ririmwo ikiniga ku buryo nimodoka zatsa amatara zikamumurika nkabona amosozi mu maso yiwe numva aravuze ati:

"Kessy mbabarira nukuri ndakwinginze nshobora kuba ntavuze vyinshi kuri wewe ngo nsubirire abavyeyi bawe canke musazawe ariko mbabarira ntibikworohere kwumva ko kugenda unsize vyo kubera inyishu.

Kessy nukuri ndagukunda nimba utanankunda basi reka je ndakwikundire nukuri please Kessy ndabikwinginze"

Nitegereje Diego numva ibigumbagumba biramfashe ku buryo nasanze naturitse nkarira gose kuburyo Diego yaciye atangura kumpoza ansaba imbabazi nkaho yibaza ko harikintu kibi yoba ahejeje kumbwira ariko nca ndamuhobera numva ata majambo menshi mfise yo kumubwira uretse merci.

Nongeye kwihanagura amosozi nca ndamubwira nti:"Diego mwiye misi ndira amarira menshi kuburyo yose asa ariko kuriyincuro yarayumunezero, nukuri merci Diego merci kuhaba mu gihe nkuki, uretse ko naho noba ntagukunda numva umenga ndagufisemwo umwenda kubw'ivy'umaze kunkorera noneho humura nagukunze kera Diego."

Namanje ndahora hacye akanya nca ndatwenga bukebuke nti:"Umusi umwe nari ndiko ndataha ndagucako uri kumwe n'umukobwa ahantu mutwenga, ndakubwiye ko nagupfuiye tutanazinanye wotwenga"

Diego atwenga ati:"Uwo musi rega ndawibuka ko wanakatiye kwibutike yariruhande nkaza ndakuraba nisamaza kugira ntubibone ko nakubonye"

Naciye ndamukubita udukofi nti:"Arrhéee uranshisha mbere ndisubiyeko sindagukunda"

Diego yaciye ansoma kwitama acanyongorera ku gutwi ati:"Kazima je ndagukunda"

Naciye mwenyura numva nryohewe nukuri ariko uwo Munezero ntiwaragamyeye kuko nagiye numva umutima usimvye cane...

Agace 36

Nibutse musazanje Gaël gushika kwuwo mwanya ntarinzi iyageze ndetse nibuka ko arije nari nsigaye ndamubazwa kuko nije yarasigaranye numva umutima uramvuyemwo ntangura gupanika niho naca ntora terefone ya Diego nandikamwo numéro za Gaël ndamuhamagara ariko numva ntirengana nsubira kwiheba nca mbwira Diego nti:

"Diego sinzi musazanje iyageze sinzi ivyariko aracamwo ndibuka ndamuraba ko tuzobandanya dusenyera ku mugozi umwe tugafatana mu nda nka gishiki na gisaza none ubu sinzi amerekezo yafashe! Ariko kuberiki je ndi ntakigenda?"

Diego ati:"Kessy reka kwitako umwikomo nawe ur'umuntu kuba watwawe n'agahinda ukibagira inshingano zawe n'ibisanzwe kuko nawe ubwawe wari wiyibagiye rero tekana kandi agati gateretswe n'Imana ntigahenurwa n'umuyaga rero Gaël reka dutangure kumurondera turi kumwe iyakuzigamiye muri kariya kaburi ikakurinda zirya ntozo n'abambuzi n'ijoro niyo iza no kutuzigamira Gaël"

Numvise Diego amajambo ambwiye numva aratahuritse mwuwo mwanya mpitamwo Kwizera Imana maze nsengera mu mutima ndayigize musazanje ntari nzi iyageze hanyuma ndarindira ingene Imana izokwikorera.

Twashitse kurupangu rumwe numva Diego arambwiye ati:"Karibu rero aha turashitse"

Twarinjiye murupangu nabona ko rurimwo inzu nyinshi hakabamwo n'abantu benshi aho hari nabahungu twasanze bakina rudo kwirembo turabaramutsa Diego arabanyidondorako maze turinjira ntangazwa no kubona

utwana twose two murupangu tuza kumuyambira mbona akora mwisakoshi aduha ibisuguti yari yatuzaniye anatubwira turamutse tantine tukaza kundamutsa kuburyo natangajwe n'uburyo Diego yaganiriza abantu bose mu rupango maze mbona ukuntu afise igikundiro ndumirwa.

Twashitse kumuryango umwe nza mbona umuhungu araje ashika avuga ati:"Boss za mpuzu uracuziraba naziteretse harya hejuru kandi nivyangombwa wari wibagiriye mu mifuko vyose biri harya iruhande gusa akanyota kamereye fo ngaha niwe ndindiriye umpembure"

Diego ati:"Mpereza izo mfunguruzo gusa nayo inyota yawe akira ugende ntuhave ugaduka ngo amaraso yawe Imana izoyamparureko"

Diego yamuhereje amahera umuhungu agenda aratamba kuburyo nasigaye ndatwenga tuca turinjira maze mbona dushikiye mu nzu yicumba na Salon nihweza ukuntu muri salon hari hapanze neza hari itapi intebe nziza iradio na télévision kuburyo nahashitse nkabona ko ukwo biri kwise Diego ashobora kuba ar'umuntu akunda utuntu twiza dusukuye kandi dupanze neza kuko ico nzi co nti yari anyiteguriye ngo tuvuge ko yabikoze kubera yarandindiriye kuko nahaje giturumbuka mu buryo tutaziga.

Nashitse nicara muri salon nza numva arambwiye ati:"Nibaza ko ukeneye kwoga kubera umusi wabaye muremure Kessy ingo ndakwereke aho wogera"

Narahagurutse ndamukurikira twinjira mu cumba ciwe numva umutima urasimvye kuko mvugishije ukuri ryari iryambere ninjiye mu nzu y'umuhungu rero kwinjira mu cumba hoho naba

numva neza nishoye mubintu ntazi ariko kubera nizera Diego narihumuriye numva ko nawe ntu atakidasanzwe yongira.

Ninjiye mu cumba ntangazwa no kubona akandi kango hirya ambwira ko ariho hari douche aca anyereka isume ampa nimpuzu ziwe za sport ati:"Je rero ngiye muri salon ahasigaye urirwanako ngaha ntaco ndagufasha"

Jewe ntwenga nti:"Hhhh wagira ndagusabe uze kuntsirita rero?"

Nawe ati:"Hhhh nyene twobanza gupatana nyene ucuvyumva nawe ko ako atarakazi nobera umukorera bushake"

Nanje nti:"Hmmmmm uri sùr ga Diego?"

Nawe ati:"Hhhh oya sindi sùr da!"

Nanje nti:"Reka nigire kwigwanako da"

Diego yarasohotse ndakingirako umwango maze ndambura ikanzu nari nambaye aho nayitegereje nkumva ndamaramaye kuko yari icafuye bimwe bitovugwa uretse ko nubundi yarikanzu nakunda kwambara ngomba nkore udukorwa two muhira nasubiye kwibuka ko niriwe ndagenda mumuji ndayambaye ntangura kuvuga nti:"Gusara n'akanya gato nukuri"

Nabuze naho ndayishira mpejeje kuyambura kubera ukuntu yari yuzuye ibivu ningene mucumba ca Diego cari gisukuye Buri kimwe kiri ku murongo ariko ngira amahirwe nca ndabona agasashe mumfuruka imwe nca ndagatora ndayizingiramwo maze mpitana isume ngenda muri douche.

Vyukuri naruguruye amazi atangura kumanukako ndayumva kuburyo numva atari umubiri wo nyene uriko uroga ariko n'umushaha uriko uroga, namazeyo umwanya utari muto ku

buryo navuyeyo ndihanagura nca nisiga amavuta ya Diego nabona maze nambara nazampuzu za sport ziwe maze nsubira muri salon ariko namusanze atahari.

Nca natsa télévision mba ndaraba mu kumurindira.

Ku vyukuri nari numva nduhutse ariko nibuka Gaël nkumva umutima urasimvye nkatora terefone ya Diego nkamuhamagara nkumva kandi ntirengana nca ngumaho nicaye gushika aho nasubiye kubona Diego yinjiye mbona azanye isahani iriko imfungurwa sinzi iyo yazikuye ariko numvise ambwira karibu nanje numva inzoka yo munda inyibukije ko burya bwose kuva bwagaca ataco nari bwaterere mu nda maze nifadikanya na Diego maze ntangura gutunganiriza umubiri.

Twahejeje amasaha yitereye kuburyo tukiriko turaganira nisanze ndiko ndarira ingiga Diego yaciye ansaba ngende kuryama mu cumba numva ndikanze ntangura kwibaza ingene tuza kurarana kugitanda kimwe ariko nkiciyumvira numvise ambwira ati:"Humura je ndazana ishuka nirarire mwiyi ntebe ndende"

Nanje nti:"Yoo nukuri umbabarire kubona ndagushize muri situation wisanga uraye muri salon murwawe"

Nawe ati:"Oya nibisanzwe Chr nabaraye mmwibarabara barasinziye nketswe jewe ndaye mwidiva"

Yavuze Chr numva ndikanze Nkiriko ndiyakira niyumvira Diego anyise Chr mu buryo ntari niteze yamfashe mu biganza andaba mu maso maze arambaza ati:"Ko wikanze none? Ntidukundana?"

Nanje nti:"Hhh canee nyene nikubera ariryambere umpagaye ukwo"

Nawe ati:"Hhhh ibintu vyose bigira incuro ya mbere ariko kandi witege kubandanya ahubwo uzinikindi kigira kigire incuro yaco yambere?"

Jewe numvise umutima usimvye nti:"Iki kandi?"

Nza mbona...

Agace 37

Diego yansomye ku munwa kwakundi kubandanya ku buryo nanje nari numva ntanguye gutwagwa nca ndamwiyaka bukebuke acambwira amwenyura ati:"Ijoro ryiza mukunzi"

Nanje ndamwishura nti:"Ryatwese mukunzi"

Nawe ati:"Turaye hamwe rero"

Narahindukiye ninjira mu cumba ca Diego no mugitanda ndaryama maze kwakundi uba urindiye ko itiro rigutwara ukaba urasubiza ubwenge inyuma ukibuka ibintu bitandukanye nacanecane ivyo wamyemwo nasanze ndiko ndavugira ku mutima nti:

"Ibihe nukuri biha ibindi aho buca umuntu ari siho bwira ageze"

Nakomeje kwiyumvira ku bihe bitandukanye vyagiye biraranga ubuzima bwanje gushika aho agatiro kantwaye aho nasubiye kwikangura mbona bwakeye nca ndavyuka nja muri Salon ndahashitse numva akamoto kumuntu atetse nca ndasohoka ntangazwa no gusanga Diego ariko ateka umulete ambonye ati:" Hey mwaramutse neza?"

Nanje nti:"Kumbe urazi guteka?"

Yaciye andaba ati:"Ahubwo wewe nosanga utazi guteka ntiwonkira"

Nasubiye kwibuka ko nakuze nkaba inkumi nkarinda mpeza université ntazi guteka numva ndamaramaye burya hari igihe ubuzima budufyinisha natwe tukagirako tugafyinata ntitumenye ko umwanya numwanya bwoduhindurira Nanje nca mbwira Diego nti:"Erega ntihigera harengerana kwiga igihe

cose umuntu yigiye ikintu ashizemwo umwete n'ishaka birakunda"

Diego yaritwengeye ati:"Hhh nanje uzompemba buri cirwa cose nzoguha kuko ntavyagusa iwanje nakare ngo bitera ubwenge buke"

Nanje nti:"Mbwira igisabwa ntangure ntange avance ndakwereke ko ndi sérieuse"

Diego nawe ati:"Je nsigorana nyisomere gusa urabe ko ntakwigisha nivyutansavye"

Numvise ngize isoni zo kumusomera mû rugo uretse ko no munzu ntari kwisanzura kubera vyaribintu ntamenyereye ariko naravye hirya no hino mbona ntamuntu numwe ahari nca ndamwegera bukebuke ndamusoma nti:"Satisfait?"

Diego ati:"Pas encore ako nako kukwigisha ingene bakata igitunguru gusa"

Diego yatanguye gukora buri kimwe anyereka akanampereza nkabandanyiriza aho agejeje maze inyuma yakanya aba arahejeje tuca tugenda muri salon azana imikate numulete n'icayi c'amata maze gutangura gufungura twogera tunganira ati:"None ubu harakurikira iki?"

Yambajije ico kibazo numva umutima urasimvye kuko car ikibazo cankomeretsa kuko nibuka ko Gaël yakunda kukimbaza nkabura ico ndamwishura rero nagiye kure nsubira muri kahise kuburyo nasubiye kugaruka Diego ankozeko ati:"Hey garuka kwisi ndasavye ubona ugiye wijanye ubunsigiye nde?"

Diego yaciye atangura kundigadiga nsanga natwenze mbere dutangura gukina niruka akamfata nkamukubita udusego

twintebe gushika aho yamfashe ndamwinginga ntandigadige ati:"Urahitamwo kimwe mubintu bibiri"

Nanje nti:"Ndakudigadiga canke ndagusome"

Yara yamenye ko kudigadigwa ndabitinya kubi nukuvuga ntayandi mahitamwo nari nsigaranye nce ndiyorosha aransoma ndetse nari natanguye kubimenyera no kubikunda mugani wa Diego buri kintu kigira incuro ya mbere kandi ninayo igorana kenshi ari naho nibuka na Maman yakunda kumbwira ati:"Mu bintu vyose uzohore wizera Imana kuko yoyo idusaba gutera intambwe yambere gusa tukayizera hanyuma nayo ikikorera ibitangaza"

Uwo musu hanjemwo icyumviro co kugenda hamwe twahora tuba nkaraba ko vyokunda nkinjira ngatora bike vyacu vyari bisigaye maze ngira amahirwe nsanga haruguruye aho nasanze ibintu vyacu vyose birunze hanze aho natoye ivalize yanje ntekeramwo impuzu zanje nivyangombwa vyanje maze ibishoboka ndabishira mumodoka ya Diego maze ndasohoka ngeze kwirembo ndahindukira ndaharaba iryanyuma ndavugaga nti:"Koko ivyisi n'umuyaga nkihataha nkomuhira sinicura kumusi umwe nzohasohorwa nkanahasezerwa"

Nasubiye kubona imbaraga z'ibihe ko umuntu yarakwiye kubaho aciye bugufi kuko burya musu yijuru ntakidashoboka ushobora kuva hasi cane ukaduga hejuru cane canke igihushane.

Ukwo nikwo twatanguye kubana na Diego aho kenshi najana nawe nkaba ndamudandariza mwisoko aho yarafise iduka nawe akagenda kuba arakora ibindi kuko Diego niwe muntu nabonye yarazi kurondera ubuzima kuko ntamwanya yapfusha ubusa ndibuka umusi umwe yambwiye ati:"Rega Imana ntizotubaza

ivyo twakoze ahubwo izotubaza ivyo tutakoze igihe twari tubishoboye basi ntamugani wo muri bibiliya umaze kwumva witalanto?"

Jewe nti:"Eeeh ndibuka ko hari umugabo yayihamvye Hama sebuja agarutse akayimwaka akayihereza uwo yari yasigiye cumi"

Nawe ati:"None basi wibaza ko italanto ariko nico kintu cose Imana yaduhaye aho harimwo Ubwenge bwacu, umwanya wacu, inguvu zacu, amgara yacu, imigenderanire yacu, nukuvuga ivyo vyose tuba dufise guhitamwo kubihamba tukarindira canke kubicuruza bikunguka rero Imana izotubaza ico twabikoreshejee"

Ku vyukuri Diego namwigiyeko gukora no kudafyina ndetse aho mu misi mike nanje naza natanguye urudandaza rwiwanje nduguruza mwibanga imangazini y'ibitenge nkoresheje amafaranga nari naraziganije igihe nakorana na Papa akiriho.

Umusi umwe ndibuka ko twari duteramye turiko turorerana films muri salon aho nasanze agatiro kantwaye maze Diego aho kunkangura yaciye anterura ariko naramwumva kuko sinari nsinziriye gose gusa nca nguma nihumirishije aca anjana mucumba anryamika kugitanda aho vyananiye kwifata nsanga natwenze Diego acarabibona ko nari nisinzirije maze acasubira kundigadiga ndamutakambira ndamusaba ikigonge acatangura kunsoma nanje ndamusoma kuburyo numvise bitankundira ko ndamuhagarika canke nanje ubwanje nihagarika.

Yatanguye kunyambura impuzu abandanya ankorakora numva vyukuri ntazi ibiriko biraba kuburyo nasubiye gutora ubwenge...

Agace 38

Ku vyukuri harigihe ugeramwo ukaba muntegenke nanje nari narifashe ubuzima bwanje bwose narabishoboye ndetse intego nari narihayeho yariyo kuzozigama umubiri wanjye kuko numva ariryo teka n'itunga ryanjye, numva ko uwo nzoha umubiri wanjye atazoba ar'uwarirwe wese ndetse mbere ko nzomanza kwitirirwa izina ryiwe.

Ariko mwuho mwanya vyasa naho haje uwundusha inkomezi maze asenyura ibihome nari narubatse niyugaraniramo kugira nirinde ibintu nari ntanguye kwisangamo muruho mwanya kuko ntanekaga nari nayamanitse ndetse nari nemeye ibizokurikira nimba kizoba ikiguzi c'ikosa ukwicuza kuko nari numva ngiyeho gutahana ikinesho kuriyi incuro igira nyinshi nari maze gutsinda.

Yaba jewe yaba Diego vyagaragara ko atamuntu numwe yarafise gahunda yo guhagarika ivyaho umubiri wari watugoberereye gutangura mbere uturusha inguvu kuburyo mwuho mwanya ariwo wari warudufiseko ububasha utegeka tukumvira.

Nibwo haheze umwanya turiko turasomana twongera dukorakorana nimpuzu hafi nka zose twajugunye je numvise umutima usimvye ariko kandi nkiciyumvira nabonye Diego andekura acarava kugitanda ampa umugongo ati:

"Kessy mbabarira nukuri nari ngiyeho kukugirira nabi ariko wumve ko nanje ntazi ivyari bimfashe..."

Nacye ndamuhaza nti:"Siiii...nta kosa narimwe ryo gusabira imbabazi wankoreye Diego kuko yaba wewe yaba jewe twari dukoze ikosa ariko twipfuza"

Diego ati:"Kessy ur'umukobwa mwiza nkunda kandi nubaha kandi mpora nshaka kwubahisha rero ndumva nari ngiye kwiha uburenganzira ntarahabwa n'amategeko umbabarire kuko numva nshaka gukora ibintu neza kuko urabikwiriye"

Harukuntu umuntu ashobora kuguha agaciro agatuma vyukuri wumva ko ur'umuntu ukumva wubashwe, wa muntu yitwararika ivyuha agaciro nigihe uba wavyibagiye akakwibutsa nigihe uba wacitse intege agaharanira kuzigusubizamwo kugira ngo utava kuko waharaniye kuva kera.

Diego numvise ndamukunze gushasha numva ar'umuntu nkwiye kwizera ndetse nkamuha ubuzima bwanje nubwo novuga ko nari naramaze kubumuha ariko ni kwakundi nyene wumva na kamwe wari warisigariye wokagaba ndetse amakenga yose nari nsigaranye ndayajugunya burya ntibabeshe icizere kiraharanirwa kuko Diego yaramaze gutsindira icanje cose.

Nibutse igitabo kimwe nasomye cavuga ko uwushoboye gucungera irari ry'umubiri wiwe ntakintu na kimwe mu buzima bwiwe atoshobora gucungera kuko abahinga barerekana neza ko ukwipfuzwa kw'umubiri ariko kintu cambere kigira abantu abanyantegenke ibikomangoma bikayamanika ndetse nintwari zigahemuka nka samusoni wo muri bibiliya.

Rero Diego yaramaze kunyereka ko arenze intwari nyishi kuko yashoboye kwifata akigarura akarwanya umubiri wiwe akawunesha nubwo vyagaragara ko wazanye ikirwanisho ruhonyanganda ariko arawutekanisha maze aranesha ntiyatsinda umubiri gusa ariko atsindira n'icizere canje nikwo kuca ndamubwira nti:

"None ubundi habura iki kugira ndakwitirirwe Diego"

Diego yabaye nkuwukangutswe ati:"Erega Kessy ndindiriye umusi uzonyishura"

Jewe nti:"Ndamwishura... Aaaah kandi shahu ndavyibutse ko ivyago vyateye ngira ndaguhe inyishu"

Diego ati:"Ndabizi Kessy nanje nzokurindira umwanya wose uzokwumva uri tayali uzompe inyishu"

Nanje nti:"Oya Chr sinokurindiriza kukintu nshobora gukora ubunyene ubundi Nukwo ibihe vyaciye vyivangamwo nayahandi inyishu nari ndayifise kandi nti yari iyindi uretse kukubwira Ego imvuye ku mutima ndetse kubana nawe atarivyo ukwiye kunsaba kuko nanje arico cipfuzo canje kiruta ibindi"

Diego yarahindukiye arandaba ubona ko aryohewe abuze Nukwo yifata ati:"Yooo Kessy merci nukuri ninyishu namaze amajoro menshi ndota kubona amatwi yanje yumva ntushobora kwibaza akamwemwe gatashe mumutima wanje muriri joro"

Nitegereje Diego ndaba ukungene vyukuri yaranezerewe nca ndabona incuro mu buzima tugenda tutazi ko dutekeye muri twebwewe indoto zabandi, gushika ico igihe sinari kwibaza ko arije ndoto ya Diego kuko harigihe nibaza ko ivyankorera vyose abinkorera kubwumutima mwiza afise yobikorera n'uwariwe wese ariko mwuwo mwanya nabonye neza ico mvuze ku buzima bwiwe.

Namubwiye nti:"Je rega naho woshaka ejo twogenda tukandikwa muri komine hama nkataha nabaye uwawe ibisigaye vyose kuri je ntagaciro bigifise"

Nari numva atampamvu igihari yo kugira ibirori bikabije kuko abantu bagaciro mu buzima nari guhimbaza umusi nezereza nari naramaze kubabura kuko nabona umenga ibirori vy'ubukwe vyobaye ivyo gutera Iteka abavyeyi iyaba bakihari ariko muruwo umwanya nabona umuntu nsigaranye mu buzima wo kubaho kugira nezereze ari Diego ntawundi uwo nawe nkaba nari numva niteguye kumuha ubuzima bwanje bwose ataco nisigarije.

Nagiye numva Diego ambwira ati:

"Kessy ndavyumva ko ushaka kworosha no kubangukisha ibintu ariko nanje numva ntashaka ku kwicira indoto yawe, erega ndazi ko buri mukobwa arota kuzibona umusi umwe yambaye ya kanzu yera imbere ya Patiri nishengero aragana n'uwo yihebeye ndetse amashi agakomwa, nukuri nanje sinaje ngo ndakwime ayo amahirwe aza rimwe mu buzima, ndabizi ko vyobaye vyiza Papa na Maman na Gaël bakaba bahari ariko ndazi aho bari hose nzotuma bishimira ko nakunze umukobwa wabo bizira uburyarya"

Nukuri neza neza nabuze ico mvuga ntangura kwumva ko kwisi yose atamuntu akunzwe nka jewe, hahandi naba numva nosohoka nkagenda ndatakira abagenzi n'abahita ko abandi bibesha ari jewe naronse uwunkunda rwa rukundo rurenze urwo mu bitabo no mu mareresi.

Ndibuka ko iryo joro naryamye mvuga nti nubwo abantu benshi babipinga ndetse bavuga ko arukundo ari umwe wese kurondera inyungu ziwe ariko je mwuwo mwanya nari numva nobabeshuza mbere nkababwira ko urukundo rubaho nimba bo bataronse urwabo arabanyamahirwe make atakindi.

Agace 39

Ntivyatevye imyiteguro yaratanguye nanje kuri yincuru abantu barateranya imitwe bategura urubanza rwacu twe na Diego Parrain na Marraine ntitwiriwe ruraronderera kure yabaye Scott na Charlene badusubiriza mu nkoko.

Ndavyibuka umusi wanyuma buca dukora ubugeni twatashe twarushe kubera twari twiriwe turiruka mumitigito y'urubanza aho twashitse muhira satanu z'ijoro dushika twicara mu ntebe ndende aho Diego yari yicaye yagemiye nanje nryamye amaguru agoroye muntebe umutwe uri ku bibero vya Diego tunganira bukebuke ati:

"Kessy merci ubu nanje aho bukeraga ngiye kuba umugabo ngiye kuzohora nseruka n'agira ijamba mu bandi nkagira Iteka nitekane!"

Nanje nti:"Hhhh shahu warusanzwe n'ubundi ur'umugabo kandi merci nawe sha ubu ngiye kugira nanje uwo nitirirwa, aho imisore itazondaba ikambona nka yampuzu ikiri kwisoko irindiriye uwuzoza itazi iyazozanana ngo ayishime hama ayambare bihwane ubu ngiye kuba muka Cubahiro Dieudonné wow ndabishashaye ntiworaba a.k.a muka Diego"

Diego yaciye atwenga ati:"Sha nyene iyindi misora nitahe kuko nije ndagutahiye nije munyamahirwe warakoze ku mpitamwo muri benshi Chr"

Jewe nti:" Hashimwe Imana yaduhuje wa musu wa mbere ndakubona urazi ko ndavyiyumviye neza kuva nkikubonye boshoboka ko ariho natanguye kugukundira?"

Diego ati:"Ah bon? None ko nanje numvise nipfuye kukumenya mu buryo bwimbitse ariho nkikubonye? Uzi ko naciye

ndondera izina ryawe ndaribonye kuri carte yawe ndakurondera kuri facebook?"

Jewe nti:"Birasize ubwenge"

Diego ati:"Urukundo ni rwubahwe!"

Igihe carageze nsezera Diego ngenda mucumba ndirambika maze ntangura kwiyumvira ukuntu ngiye kuryama ijoro ryanyuma ry'ubukumi no kwirarana numva ndaryohewe ariko kandi nibuka musazanje Gaël gushika kwuwo musu ntari bwaronke agakuru kiwe nkama nsenga nsaba Imana imunzigamire aho ari hose nkanayisaba kuzosubira kumpuza nawe kuko niwe muryango w'amaraso nari nsigaranye.

Ijoro rindi naraye ntibuca kuko nari mfitiye igishika co kubona umusi umwe mumisi mikuru iranga ubuzima bw'umuntu kandi bwaratevye buraca mbere buri kimwe kigenda neza nkuko twari twabiteguye mwisengero turaganira amashi arakomwa ibintu wamenga nindoto kuri je.

Mu nyuma turagenda kwifotoza amafoto karahava ndetse turagenda na hahandi haba hateguwe agatutu hamwe abakurambere bavuga amajambo yikirundi kitavanze bishurana basabana inka muntu ya nka ifise amabere itagira amahembe.

Vyari vyabaye ngombwa ko nitura incuti zazindi ntigeze mbona mu buto bwanje ariko nkaza kuzibona abavyeyi baje batanguye kugenda bakurikirana maze niba baje kunkosha kandi ndanabishima kuko yabaye imbarutso yo kubandanya menyana n'incuti z'umuryango ntari naragize amahirwe yo kumenya.

Ibirori vyagenze neza ndetse burumwe ubona ko atunezererewe bituma nsubira kubona ko ubuzima nubwo bugizwe n'ibihe

bitandukanye habamwo ukuduga no kumanuka ariko ntakirusha agaciro kubaho ukwo vyogenda kwose kuko nasubiza amaso inyuma nkibuka agahinda katumye mpakwa kwiya ubuzima nca ndabona ko icyo nkora icyo kosa nari kuba niyatse ayo mahirwe.

Amahirwe yo gusubira gutwenga, amahirwe yo gukunda no gukundwa, amahirwe yo gusubira kwumva akanovera ku buzima.

Burya uwavuze ngo ntuzotange Imana kwihebura ntiyabeshe pe kubera ibihe vyogucisha bugufi bitaguteguje ariko nivyaho bizonakuduza atawubiziga.

Ndavyibuka ko Diego yari yambwiye ko hari surprise yanteguriye naguma ndamubaza nti:"Chr none surprise yanje ko ntayibona?"

Nawe ati:"Eshe! Kuva ryari ufise ukwihangana kuri kurushi chr?"

Jewe nti:"Kuva umbwiye ko wanteguriye surprise kuko watumye ngira amatsiko menshi rero nubu nguma mparura iminota"

Nawe ati:"Hhhh none we ntunyizera rindira rega urubanza ruracabandanya ntituranatwikurura?"

Naratekanye mbandanya nkurikiranira hafi urubanza ukwo rwariho ruragenda ikintu canyoye ngingene kwuwo musu nari umwamikazi w'umwami umwe ndetse abantu Bose nabona biruka bavuye muvuye bakaza kubwacu nararaba mu bantu nkabona amasura y'abantu nzi nabo ntazi abo twiganye naheruka kera naba numva umenga nohaguruka nkagenda nkabayambira nkababaza amakuru yabo mwijambo rimwe

mwuwo mwanya Ntakibazo nakimwe nari mfise nibaza ko atanico nari kwiteza.

Ndavyibuka ko umwanya wageze wawundi baha ijambo abantu batandukanye baba bafise ico bateguye aho baje baravuga abo twiganye abo twakoranye incuti z'umuryango n'abandi ibintu vyasa neza cane.

Uwujewe gutanga amajambo yaravuze ati:"Ubu naho tugira twakire umuntu akomeye cane ku buzima bw'umugeni wacu uwo muntu akaba atashimye ko ndamuvuga izina ariko reka ndamusaba mu bukerebutsi bwiwe ashike imbere nawe agire ico ashikirije"

Numvise nikanze ndetse numva Diego arafashe ikiganza canje aragikomeza nanje nkanura maremare nza mbona...

Agace 40

Nabonye agenda abantu bose naguma beraguza twitega umuntu aza turabura abantu batangura kurabana mu maso bose bavuga bongererana babazanya nanje ntangura kubaza Diego nti: "None ko ataza?"

Diego bamuzaniye terefone acambwira ati: "Igituma ataza Nukwo ari ngaha"

Diego yanyeretse Vidéo muri phone acafyondako mbona iratanguye kugenda nza numva ijwi risamiraniye muma bafle yari muriyo salle twari turimwo kumbe terefone yari icometse kuvyuma vyasohora amajwi.

Nitegereje natangajwe no kubona Gaël avuga ati:

"Mushikanje nkunda cane ukongera ukambara imfura Kessy, uwo twonse rimwe, uwo twakuranye ndetse uwo twariranye.

Uwo twasangiye akabisi n'agahiye reka kandi dusubire duhoberane naho dutandukanijwe n'impinga ndende ariko imitima iramatanye kuko Kure y'amaso si kuri y'umutima.

Kessy ndagutahije cane kandi ndakugumbiriye mwizina ryurukundo ndagukunda ndetse n'amaraso aduhuza mwene data ndagukumbuye twatandukanijwe n'ubuzima ariko uno musi nezerejwe nintambwe nziza uteye urabizi ko wahoze urintwarikazi yanje kandi nubu uraduteye Iteka kandi ndagukeje cane.

Jewe ndi mumahanga nashatse kugutangaza ariko vyinshi tuzobivugana hanyuma ubu ndakwipfuriye urugo ruhire muze mube amakara ntimube urubeya muze mushire Imana imbere nayo ntizobasiga inyuma mu migambi yayo.

Kessy uribuka Maman adusezera ko yatubwiye ati "Nimwagira amahirwe yo gutwenga muze mutwenge mucunguza umwanya umwete kuko mutazokwigera kumenya igihe musigaje co gutwenga"

Nanje ndakubwiye nti:" Ryoharerwa kubu kawe kuko urazi ko kahise kawe wakaririye kenshi, twenge mwenyura mwiza wa mama iki Nico igihe"

Bye ndagukunda Cane"

Vyukuri nahejeje kwumviriza iyo Vidéo narize nahogoye nari numva Gaël ambwiye amajambo ankora kumutima kuburyo vyanse ko nifata eka noneho nti yari Jewe gusa abaraho bose benshi uretse abifashe canke bahandi atemba aja munda bararize kuburyo agatutu karangiriye aho tuca taragenda kwihindura kugira tugaruke tuje gutwikurura.

Naje kumenya ko Gaël yahavuye agira amahirwe aronka ukuntu agenda muri Amerika ndetse kuvuwo musu twatanguye kuza turavugana ampa amakuru yiwe.

Uwo musu wagenze neza cane kuko nicari gisigaye nahora nibuka nkumva ndacitse ivutu yari musazanje ariko kuvubwo namenyeye ahari menya Nukwo aguwe neza maze ngira umunezero utagabanije.

Je na Diego inyuma yibirori vyose twaratashe mû rwa babiri ijoro ry'abakundana riratangura urukundo ruraryoha ndetse nibera muri ryajuru rito rimwe atashetani nimwe yegera.

Inyuma y'imisi mike twajanye na Diego gushira amashurwe ku mva za Papa na Maman nsubira kwihweza kuri ya mataliki aba yanditse ku musaraba asubira kunyibutsa ibihe.

Ubuzima n'urugendo rugizwe n'ibihe ndetse nanje nagenze urwanje nca mu bihe bitandukanye ari navyo nari maze iki gihe ndabasangiza.

Ni vyinshi cane sinobivuga ngo ndabimare kanatsinda nsindimvugira kuyamara uretse ko nivyo nababwiye atari bike ariko ico nosozera ndababwira ni:

"Sinzi aho uri n'ivyo urimwo ariko uze wame wibuka ko ibihe bitaba umugenzi ntuzocudike navyo ngo ujane narwo! Mawe yateye akagere abiwabo yishimirije ibihe yararimwo munyuma biramwihinduka apfa yicuza nawe niwaba uri hejuru uno musi uzohabera abari hasi niwaba uri hasi naho uzorabe hejuru maze uhagira ihangiro ugomba gushikako vya nka vyakunda.

Uze ukore wibuka igihe ko gihora giharuye, uze ucunguze umwanya umwete muvyo uzokora vyose, aruwo ukunda ntuzorindire ejo kuko ikosa abenshi bakora niryo kwibaza ko bazokwamana ejo.

Iciza cose uzogikore ukiciyumviye ukigishobiye kuko ibihe si so si nyoko si na mwene wanyu ariko nintizanyo utazokwigera umenga igihe usigaranye...

THEREZO

Ijambo rya nyuma ry'umwanditsi

Ndabashimiye mwebwe mwese mwakurikiranye inkuru kuva ku ntango gushika kwiherezo nizera ko mwakuyemwo ivyigwa birenze kimwe kuko nanje narize ndetse nahejeje kuyandika nabaye uwundi hanyuma harintererano canke ikibazo umwe wese mucubahiro ciwe arahawe ikaze ku mbuga zanje zose murasangako ni numéro zanje kubipfuza kunyandikira.

Imana nyen'ibihe ibandanye kubanzigamira !